

萬 有 文 庫

第 二 集 七 百 種

王 雲 五 主 編

宋 詩 鈔

(一)

呂 留 良 吳 之 振 吳 自 牧 選

李 宣 龔 校

商 務 印 書 館 發 行



宋 詩 鈔

(一)

呂留良 吳振之 吳自牧 選

李宣龔 校

國 學 基 本 叢 書

序

自嘉隆以還。言詩家尊唐而黜宋。宋人集覆瓿糊壁。棄之若不克盡。故今日蒐購最難得。黜宋詩者曰腐。此未見宋詩也。宋人之詩變化於唐。而出其所自得。皮毛落盡。精神獨存。不知者或以爲腐。後人無識。倦於講求。喜其說之省事。而地位高也。則羣奉腐之一字。以廢全宋之詩。故今之黜宋者。皆未見宋詩者也。雖見之而不能辨其原流。則見與不見等。此病不在黜宋。而在尊唐。蓋所尊者嘉隆後之所謂唐。而非唐宋人之唐也。唐非其唐。則宋非其宋。以爲腐也。固宜。宋之去唐也近。而宋人之用力於唐也尤精。以專。今欲以鹵莽剽竊之說。凌古人而上之。是猶逐父而禰其祖。固不直。宋人之軒渠。亦唐之所吐而不饜。非類也。曹學佺序宋詩。謂取材廣。而命意新。不勦襲前人一字。然則詩之不腐。未有如宋者矣。今之尊唐者。目未及唐詩之全。守嘉隆間固陋之本。皆宋人已陳之芻狗。踐其首脊。蘇而饜之久矣。顧復取而篋衍文繡之。陳陳相因。千喙一唱。乃所謂腐也。譬之膾炙。翻故出新。極烹苴之巧。則爲珍美矣。三朝三暮。數進而不變。臭味俱敗。猶以爲珍美也。腐乎不腐乎。故臭腐神奇。從乎所化。嘉隆之謂唐。唐之臭腐也。宋人化之。斯神奇矣。唐宋人之唐。唐宋之神奇也。嘉隆後人化之。斯臭腐矣。迺腐者以不腐爲腐。此何異狂國之狂。其不狂者歟。萬曆間。李蓑選宋詩。取其離遠於宋。而近附乎唐者。曹學佺亦云。選始萊公。以其近唐調也。以

此義選宋詩。其所謂唐終不可近也。而宋人之詩則已亡矣。余與晚村自牧所選。蓋反是。盡宋人之長。使各極其致。故門戶甚博。不以一說蔽古人。非尊宋於唐也。欲天下黜宋者。得見宋之爲宋如此。其爲腐與不腐。未知何如。而後徐議其合黜與否。或繇是而疑此數百年中。文人老學。游居寢食於唐者。不翅十倍。後人何獨於嘉隆之說。求一端之合而不可得。因忽悟其所以然。則是集也。未必非唐以後詩道之巫陽也夫。時

康熙辛亥仲秋之朔。洲錢吳之振書於鑑古堂

宋詩鈔初集凡例

宋詩向無摠集。亦無專選。東萊文鑑所錄無幾。至李子田宋藝圃集所選名氏二百八十餘人。詩僅二千餘首。宜其精且備矣。而漫無足觀。非其見聞儉陋。則所汰者殊可惜也。曹能始十二代詩選。所載有百數十家。中如陸務觀。楊誠齋。宋之大家也。集又最富。然存者甚少。誠齋尤寥寥。他可知矣。潘訥菴宋元詩集。亦止三四十種。雖去取未精。然每集所存較多。蓋宋集爲世所厭棄。其存者如秦火後之詩書。余兩家幸收得此。歐陽所謂物聚於所好。聚多而終必散。則古人之精靈。由我而滅矣。欲如古唐詩紀例全刻。則力有不能。故寬以存之。卷帙浩繁。亟於行世。先出初集。以見崖略。寓內同志之家。收藏必更多。倘有隱僻難得之集。近者乞以原書借抄。遠者望錄副本惠教。當厚酬繕值。以報明賜。至表章古昔之功。敬識集端。不敢輒忘所自也。

是刻皆以成集者入鈔。其不及五首以下。無可附麗者。或雖有集而所選不滿五首者。皆以未成集例。另作一編。附全集之後。雖稗史雜錄。地志山經。碑板家乘。所有無不摭摭。同志有得。亦望錄貽。

詩文選錄。古人間有品題。而無批點。宋以來方有之。亦自存其說。非爲一代理論也。若一加批點。則一人之嗜憎。未免有所偏著。而古人之全體失矣。是選於一代之中。各家俱收。一家之中。各法具在。不著圈點。

不下批評。使學者讀之。而自得其性之所近。則真詩出矣。由是取其所近者之全書。而鑿飫展拓焉。始足以盡古人之妙。朱子所云。以爲取足於此而可。則非今日纂集此書之意也。

癸卯之夏。余叔姪與晚村讀書水生草堂。此選刻之始也。時甬東高旦中。過晚村。姚江黃太沖。亦因旦中來會。聯牀分檠。蒐討勘訂。諸公之功居多焉。數年以來。太沖聚徒越中。旦中修文天上。晚村雖相晨夕。而林壑之志深。著書之興淺。余兩人補掇較讎。勉完殘稿。思前後意致之不同。書成展卷。不禁慨然。金元詩鈔。隨全集嗣出。其隱僻難得文集。亦望好我。或假或售。拜酬雅惠。

四方見投新篇。及家藏近時文集。幾於充棟。欲專選今詩爲一集。作家巨手。已刻未刻。俱望賜教。

校補宋詩鈔記

宋詩鈔目錄綜列百家。未刻者十六家。蓋吳氏此書標題初集。方謀續輯。適有呂氏文字之獄。嗣響闕然。後印之本。並匈奴單于夷狄胡虜等字。亦一一剝去。且吳氏所刻之本。元多殘損。闕文斷句。錯綜互出。亦可見當時刊行之匆促。今歲涵芬樓影印是書。予董其役。乃盡發樓中所藏宋人集部。據以是正。不足則從江陰繆藝風。嘉興沈乙齋。南陵徐隨庵。烏程劉翰怡諸君。展轉借勘。最後更就武林文瀾閣。金陵圖書館抄補。計補五十八家。凡七百二十有八字。較諸原缺字數。什得八九。其爲各本所無者。仍從缺疑。至原書譌舛之字。猶復不免。儻承海內君子。確加校正。俾成善本。則是書之幸矣。甲寅仲冬。閩縣李宜龔記。

小畜集鈔 用影宋鈔本補三字

安陽集鈔 用蔣氏重刊本補三十一字

滄浪集鈔 用舊鈔本補七十四字

宛陵集鈔 用明初刊本補六字

武溪集鈔 用廣東文獻二集本補二字

歐陽文忠集鈔 用嘉靖翻宋本補三字

徂徠集鈔用黃蕘翁藏抄本補七字

武仲清江集鈔用文瀾閣本補十五字

平仲清江集鈔用文瀾閣本補三十一字

南陽集鈔用舊抄本補五字

臨川集鈔用宋刻本補五字

東坡集鈔用成化七集本補八字

西塘集鈔用明刊本補一字

廣陵集鈔用懷德堂校本補八字

後山集鈔用趙氏學稼村莊本補六字

丹淵集鈔用明刊本補六字

襄陽集鈔用傳鈔吳匏菴本寶晉英光集補四字

山谷集鈔用樹經堂刊本祠堂本合補四字

宛丘集鈔用舊鈔本補十三字

具茨集鈔用海山仙館本補五字

陵陽集鈔 用影宋本補九字

雞肋集鈔 用明刻本補二字

淮海集鈔 用明刊本補十字

雲巢集鈔 用文瀾閣本補七字

節孝集鈔 用文瀾閣本補四字

簡齋集鈔 用武英殿聚珍本補十九字

盱江集鈔 用祠堂本補六字

雙溪集鈔 用明嘉靖本補三字

鴻慶集鈔 用常州先哲遺書本補一字

蘆川歸來集鈔 用影宋鈔本補一字

建康集鈔 用吳中後裔校正重刊本補二字

浮溪集鈔 用武英殿聚珍本補一字

香溪集鈔 用元刊明印本補四字

屏山集鈔 用明初刊本補十八字

章齋集鈔 用雍正六年十七世孫玉刻本補一字

北山小集鈔 用文瀾閣本補四字

益公集鈔 用瀛塘別墅刊本文瑞樓鈔本合補省齋藁鈔十八字平園續藁鈔十二字

文公集鈔 用宋本補十三字

石湖集鈔 用秀野草堂本補九十六字

劍南集鈔 用正德刊本補六十六字

止齋集鈔 用永嘉本補三字

誠齋集鈔 用影宋端平本補計江湖集十三字南海集四字江東集三字西歸集一字朝天集九字朝天續集三字

浪語集鈔 用永嘉本補二字

水心集鈔 用永嘉本補一字

攻媿集鈔 用武英殿聚珍本補四十九字

芳蘭軒集鈔 用江湖羣賢小集本補八字

後村集鈔 用賜硯堂抄本大全集補三十七字

盧溪集鈔 用文瀾閣本補六字

漫塘集鈔 用明刊本補六字

義豐集鈔 用文瀾閣本補二字

石屏集鈔 用明刻本補九字

秋崖小藁集鈔 用嘉靖刊本補六字

晞髮集鈔 用金溪陳琮刻本補十四字

文山集鈔 用明刊本補二字

山民集鈔 用知不足齋本補三字

水雲集鈔 用武林往哲遺箸本補三字

潛齋集鈔 用康熙刻本補二字

石門集鈔 用武林往哲遺箸本補八字

宋詩鈔初集目錄

王禹偁	小畜集
徐鉉	騎省集
韓琦	安陽集
蘇舜欽	滄浪集
張詠	乖崖集
趙抃	請獻集
梅堯臣	宛陵集
余靖	武溪集
歐陽修	文忠集
林逋	和靖集
石介	徂徠集
孔武仲	清江集

目錄

孔平仲	清江集
孔文仲	清江集
韓維	南陽集
王安石	臨川集
蘇軾	東坡集
鄭俠	西塘集
王令	廣陵集
陳師道	後山集
文同	丹淵集
米黻	襄陽集
黃庭堅	山谷集
張耒	宛丘集

一

晁冲之 具茨集

韓駒 陵陽集

晁補之 雞肋集

鄒浩 道鄉集

秦觀 淮海集

陳造 江湖長翁集

劉弇 龍雲集原闕

沈遄 雲巢集

沈遘 西谿集

沈與求 龜谿集

徐積 節孝集

陳與義 簡齋集

李覲 吁江集

鄧肅 栢欄集原闕

王炎 雙溪集

唐庚 眉山集

孫覲 鴻慶集

張元幹 蘆川歸來集

葉夢得 建康集

張九成 橫浦集

汪藻 浮溪集

范浚 香溪集

劉子翬 屏山集

朱喬年 韋齋集

朱松年 玉瀾集

程俱 北山集

吳儆 竹洲集

周必大 省齋集

朱熹 文公集

范成大 石湖集

陸游 劔南集

陳傅良 止齋集

楊萬里 江湖集

南海集

朝天續集

薛季宣 浪語集

葉適 水心集

林光朝 艾軒集

樓鑰 攻媿集

趙師秀 請苑齋集

翁卷 葦碧軒集

徐照 芳蘭軒集

徐璣 二薇亭集

黃公度 知稼翁集

劉克莊 後村集

王廷珪 瀘溪集

劉宰 漫塘集

黃幹 勉齋集原闕

王阮 義豐集

魏了翁 鶴山集原闕

戴敏才 東臯集

戴復古 石屏集

戴昺 農歌集

方逢辰 蛟峯集原闕

宋伯仁 雪巖集原闕

方岳 秋崖集

馮時行 縉雲集 原闕

岳珂 玉楮集 原闕

鄭震 清雋集

嚴羽 滄浪吟 原闕

裘萬頃 竹齋集 原闕

謝翺 晞髮集 晞髮續稿

文天祥 文山集

謝枋得 疊山集 原闕

許月卿 先天集

林景熙 白石樵唱集

真山民 山民集

汪元量 水雲集

梁棟 隆吉集

呂定 仲安集 原闕

鄭思肖 所南集 原闕

何夢桂 潛齋集

王柏 魯齋集 原闕

葛長庚 玉蟾集 原闕

僧道潛 參寥集

僧惠洪 石門文字禪

費氏 花蕊集

朱氏 斷腸集 原闕

小畜集鈔

王禹偁字元之。濟州鉅野人。九歲能文。太平興國八年進士。授成武主簿。徙知長洲縣。端拱初。召試擢右拾遺。直史館。拜左司諫。知制誥。坐劾妖尼。貶商州團練使。量移解州。進拜左正言。直弘文館。出知單州。尋召爲禮部員外郎。再知制誥。至道元年。入翰林爲學士。知審官院。兼通進銀臺封駁司。又坐謗訕。罷爲工部郎中。知滁州揚州。召還。知制誥。又坐實錄直書。出知黃州。徙蘄州。而卒。年四十八。今有小畜集六十二卷。紹興丁卯。沈虞卿所編也。當時元之自編。按其序則三十卷。宋史言二十卷。脫誤也。元之詩學李杜。故其贈朱巖詩云。誰憐所好還同我。韓柳文章李杜詩。學杜而未至。故其示子詩云。本與樂天爲後進。敢期子美是前身。是時西崑之體方盛。元之獨開有宋風氣。於是歐陽文忠得以承流接響。文忠之詩。雄深過於元之。然元之固其濫觴矣。穆修尹洙爲古文於人所不爲之時。元之則爲杜詩於人所不爲之時者也。

酬种放徵君一百韻

太歲在辛卯。九月萬木落。是時太陰虧。占云臣道剝。王生出紫薇。譴逐走商洛。扶親又抱子。迤邐過京索。弊車載詩史。病馬懸囊橐。西都不敢住。空負香山約。闔鄉正南路。秦嶺峭如削。肩輿礙巨石。十步三四卻。

妻孥亦徒步。磧礫不容腳。山店蓋木皮。煙火渾薰灼。夜深聞鬻虎。合家屢驚懼。山泉何縈回。切裂無橋釣。卸鞍引羸蹄。解襪事芒屨。晨瀾髮可鑿。朝涉脛如斲。商山六百里。天設皆峇嶧。上洛在其中。狴牢曾未若。逐臣自可死。何必在遠惡。刺史不我顧。古寺聊淹泊。卜居雜民叟。致養無精粦。知道由自寬。有親強爲樂。側聞种先生。終南臥雲壑。長沮旣躬耕。元禮仍開學。王績婦未娶。介潔翹孤鶴。之推母偕隱。教誨修天爵。詩情亦嗜酒。道氣不服藥。田衣翦荷芰。野飯烹蔗葍。霧豹澤文彩。冥鴻避矰繳。肯從羔雁聘。唯恐簪裾縛。如何宋右史。斥鷃議鵬鶚。起居舍人宋維翰。奏种放隱居終南。乞量才錄用。頗爲識者所笑。玄纁與丹詔。恩禮誠非薄。仍勅京兆府。敦諭辭恭恪。先生戀板輿。純孝心堅確。散髮走煙巒。拜章謝恩渥。巨材猶在澗。大玉不出璞。使者遂空回。軟輪何寂寞。賢母召徵君。庭責詞嗃嗃。胡爲事章句。漏名入街郭。府縣汚我山。胥徒謀吾幄。以茲近聲利。安得成高邁。誓將徙窮谷。庶可逃諠濁。先生拜引過。爲壽開樽杓。陶陶又熙熙。何啻聞竽籥。人傳到遷客。面目頓慚怍。器小識不遠。當年事頭角。遭時得一第。游宦何齷齪。逐羶甚蚍蜉。鬪耀同蝟螭。宰邑乏絃歌。諫垣無謔謔。便番朱紫綬。僭忝絲綸閣。方號駸駸虬。已困狺狺狔。待罪始知非。咄哉昧先覺。一聆高世行。罪髮庸可擢。忍恥賦三章。塵埃寄一作寥廓。明年會恩宥。量移井蛙躍。靡暇謁南山。征途望西嶽。黃河波洶湧。白徑苔斑駁。中條圍解縣。五老煙蟲蠹。此焉爲郡副。烏敢事隕穫。籠禽幸未死。尙且謀飲啄。米呼村婢舂。樵顧山童斫。飼馬捽寒蕪。看書爇秋葍。信口亦吟哦。放心無適莫。君恩已絕望。人事終難度。相府一

張紙喚起久屈蟻。誠知有梁棟。未忍棄椽桷。五城天上開。三殿雲間卓。重取政衣冠。籠裏山獐獍。病翼得風雲。壞牆勞赭堊。諫官與史氏。舊職聊羈絡。舉袖拂石螭。凝眸睨金雀。冥心想前事。一夢何揮霍。長恐先生聞。倚松成大噓。關中朋友來。遺我神仙作。繁華遠容綺。錚鏘美金錯。古澹啜劔羹。大雅鏗木鐸。千言距百韻。旨趣何綽綽。孰念氣如虹。翻然輕抵鵠。俊甚麻姑爪。快比屠門嚼。渾金豈在鎔。尺璧寧施琢。愈風齊捧檄。忘味同聞樂。置之向懷袖。日夕芬蘭若。褒我塵俗韻。鉛刀化干莫。同聲必有應。過實還疑謔。盛夸山中事。雲屋張霞幕。蘭茝含露採。石髓和煙酌。巢由泉滌耳。園綺芝盈握。有時上絕頂。星斗近可摸。下視塵世人。營營似蟲蠟。男兒既束髮。出處岐路各。苟非秉陶鈞。卽去持矛槊。致主比唐虞。安邊如衛霍。不爾爲逸人。深居返吾朴。胡然自碌碌。名節亦銷爍。行年過半世。功業無圭勺。無術鑄五兵。使民興錢鏹。無才統六師。逐寇開沙漠。空言說王道。肆目看人瘼。多慚指佞草。虛效傾心藿。一覽大雅文。起予亦何博。況茲山野性。謨畫昧方略。搔首謝朝簪。行將返耕鑿。

寄題陝府南溪兼簡孫何兄弟

甲湖在陝服。自昔名所重。許昌擅唐律。人口尙傳頌。舊迹因藁莽。勝槩猶出衆。前年謫商于。過此方憂恐。無暇濯溪泉。惻惻心甚痛。量移遇恩宥。方寸稍放縱。故人孫漢公。勤懇事迎送。柅車得三宿。延我入溪洞。春殘尙有蝶。夏首始見蝻。朱櫻實頗煩。黃鳥聲亦哢。地幽接府署。亭高瞰村壘。縈砌水逶迤。入簷山巖崿。

鯉翻自躍金。蝸篆燒餘汞。石危君子介。筍亂小人勇。虛涼集鷗鷺。爽塏無蚊蠓。芰葉巧如翦。萍根密非種。逕苔白斑駁。岸草玄蒼葦。官醞綠開瓶。時果青出籠。醉中猛別復。依約似一夢。唯愁當要路。時仗棲關茸。解梁雖近山。坑塍費耕種。常風自盪南。日夕塵塢埽。雲泉既遼遠。草樹非秀聳。況茲炎蒸月。紮縛何所動。緬懷八龍會。南溪與誰共。撮萼本多才。甘棠應少訟。枕簟與琴書。鴿原聊自奉。篇章取李杜。講貫本姬孔。古文閱韓柳。時策聞晁董。清吹席上來。當暑開冰凍。菱脆擘瓊枝。瓜甘浮蜜筩。氣秋綠篠戰。露睨圓荷捧。照湖小賀監。溪堂輕馬搃。此景且不同。此懷可長慟。平生好泉石。況復官散冗。近聞田紫微。漣水許就俸。田舍人量移軍州。表乞就漣水居。詔許之。援例苟得請。甲湖當日用。終老占溪居。臥看秋泉湧。

七夕商州作

去年七月七。直廬開獨坐。西日下紫垣。東窗昏青瑣。露柳蛸忽鳴。風簾燕頻過。寂寂紅藥階。檜花開一朵。時清無詔誥。性淡忘物我。兀然何所營。橫枕通中臥。夢入無何鄉。蛺蝶甚么麼。孰謂處深嚴。自得放慵惰。中官傳宣旨。御詩令屬和。驚起儼衣冠。拜舞蒼苔破。逸翰龍蛇走。雅調金石播。洋洋治世音。乃廣強牽課。暮隨丞相出。自謂天上墮。歸來備乞巧。酒肴間瓜果。海物雜時味。羅列繁且夥。家人樂熙熙。兒戲舞娑娑。寵辱方若驚。倚伏忽成禍。九月謫商于。羈縻伏窮餓。鳳儀因鴟嚇。驥足翻鼉跛。山城已僻陋。旅舍甚叢脞。夏早麥禾死。春霜花木挫。吾親極衰耄。吾命何蹇軻。稚子啼我前。孺人病我左。玄髮半凋落。紫綬空垂拖。

客計魚脫泉。年光蟻旋磨。昨夜枕簟涼。西郊忽流火。河漢勢清淺。牛女姿婀娜。商土本磽確。商民久勞瘵。霜旱固不支。水潦復無奈。今歲商山居人且艱食。行商不通貨。郡小數千家。今夕惟愁呵。吾兒索來禽。卽橋傾市得一顆。舉家成大笑。愁眉略舒蟬。自念一歲間。榮辱兩偏頗。賴有道依據。故得心安妥。窮乎止旅人。達也登王佐。匏瓜從繫滯。糠粃任揚簸。批鳳不足言。失馬聊自賀。委順信吾生。無可無不可。

不見陽城驛井序

予爲兒童時。覽元白集唱和陽城驛詩。時稹貶江陵。過南山。感陽道州而作是詩也。且改驛爲避賢郵。不忍呼其諱也。樂天在翰林。得而和之。又見杜紫微富水驛詩。題下解云。富水驛。舊名與陽諫議同。卒章曰。驛名不合。輕移改。留警朝天者。惕然。淳化二年九月。予自西掖左宦商于。訪其驛。則無有也。檢之圖經。求之郡境。則富水地存而驛廢。陽城之號。遂莫知矣。因作古風詩。申明三賢之作。且以不見陽城驛爲首句。至於道州之行事。元詩盡之矣。此不復云。

不見陽城驛。空吟昔人詩。誰改避賢郵。唱首元微之。微之謫江陵。顛顛爲判司。路道商山驛。一夕見嗟咨。所嗟陽道州。抗直貞元時。時亦被斥逐。南荒終一麾。題詩改驛名。格力何高奇。樂天在翰林。亦知遷客詞。遂使道州名。光與日月齊。是後數十年。借問經者誰。留題富水驛。始見杜紫薇。紫薇言驛名。不合輕移。欲遣朝天者。惕然知在茲。一以諱事神。名呼不忍爲。一以名警衆。名存教可施。爲善雖不同。同歸化之基。

邇來又百稔。編集空鱗差。我遷上洛郡。罪譴身繫維。舊詩猶可誦。古驛殊無遺。富水地雖在。陽城名豈知。空想數君子。貫若珠累累。三章詩未泯。千古名亦垂。德音苟不嗣。吾道當已而。前賢尙如此。今我復何悲。題此商于驛。吟之聊自怡。

感流亡

謫居歲云暮。晨起廚無煙。賴有可愛日。懸在南榮遷。高春已數丈。和暖如春天。門臨商于路。有客憩簷前。老翁與病嫗。頭髻皆皤然。呱呱三兒泣。惻惻一夫鰥。道糴無斗粟。路費無百錢。聚頭未有食。顏色頗飢寒。試問何許人。答云家長安。去年關輔旱。逐熟入穰川。婦死埋異鄉。客貧思故園。故園雖孔邇。秦嶺隔藍關。山深號六里。路峻名七盤。襁負且乞丐。凍餒復險艱。惟愁大雨雪。殭死山谷間。我聞斯人語。倚戶獨長歎。爾爲流亡客。我爲穴散官。在官無俸祿。奉親乏甘鮮。因思筮仕來。倏忽過十年。峨冠蠹黔首。旅進長素餐。文翰皆徒爾。放逐固宜然。家貧與親老。視爾聊自寬。

竹鼈

商嶺多修篁。蒼翠連山谷。有鼠生其中。薦食無厭足。春筍齧生犀。秋筠折寒玉。飫飽致肥腩。優游恣蕃育。林密鳶不攫。穴深犬難逐。鳳皇餓欲死。彼實無一掬。唯此竹間鼈。琅玕長滿腹。暖戲綠叢陰。舉頭傲鴻鵠。不知商山民。愛爾身上肉。有錡利其鋒。有錐銛於鏃。開穴窘如囚。洞胸聲似哭。膏血尙淋漓。攜來入市鬻。

竹也比賢良。鼠兮類商俗。所食既非宜。所禍誠知速。吁嗟狡小人。乘時竊君祿。貴依社樹神。俸盜太倉粟。笙簧佞舌鳴。藥石嘉言伏。朝見秉大權。夕聞罹顯戮。李斯具五刑。趙高夷三族。信有司殺者。在暗明與燭。彼狡無害賢。彼鼠無食竹。

送筇杖與劉湛然道士

有客遺竹杖。九節共一枝。鶴脰老更長。龍骨乾且奇。我問何所來。來從西南夷。因思漢武帝。求此民力疲。明明聖天子。德教嘉四維。蠻貊盡臣妾。縣道皆羈縻。僇僮與笮馬。入貢何累累。此竹日以賤。輕視如蒿藜。我年三十七。血氣未全衰。况在紫微垣。動爲簪笏羈。倚壁如長去聲物。歲月無所施。寸心空愛惜。惜此來天涯。忽承明主詔。來謁大乙祠。再見劉先生。氣貌清且羸。持此以爲贈。所謂得其宜。少助橘童力。好引花鹿隨。步月莫離手。看山聊搗頤。微物懶致書。故作筇竹詩。

對雪

帝鄉歲云暮。衡門晝長閉。五日免常參。三館無公事。讀書夜臥遲。多成日高睡。睡起毛骨寒。窗牖瓊花墜。披衣出戶看。飄飄滿天地。豈敢患貧居。聊將賀豐歲。月俸雖無餘。晨炊且相繼。薪芻未闕供。酒肴亦能備。數杯奉親老。一酌均兄弟。妻子不飢寒。相聚歌時瑞。因思河朔民。輸挽供邊鄙。車重數十斛。路遙數百里。羸蹄凍不行。死轍冰難曳。夜來何處宿。閭寂荒陂裏。又思邊塞兵。荷戈遇胡騎。城上卓旌旗。樓中望烽燧。

弓勁添氣力。甲寒侵骨髓。今日何處行。牢落窮沙際。自念亦何人。偷安亦如是。深爲蒼生蠹。仍尸諫官位。謔諤無一言。豈得爲直士。褒貶無一詞。豈得爲良史。不耕一畝田。不持一隻矢。多慚富人術。且乏安邊議。空作對雪吟。勤勤謝知己。

送朱九齡

吏隱不求貴。親老不擇祿。之子有俊才。弱冠中正鵠。弗墜先人業。何慚有道穀。一命佐碭山。枳棘聊容足。再命宰嘉興。絲桐幾易俗。率身甘萊茹。養母求梁肉。承顏苟不虧。折腰未爲辱。解印無餘貲。舟中只琴筑。十口寄淮泗。一身來輦轂。又說東南行。秋風江水淥。鄱陽古名郡。赤金流山谷。每歲鼓錢刀。從來設官局。還得便高堂。無辭縻逸躅。颺帆江湖思。木脫天地肅。楓葉紫爛熳。蓼花紅粲粲。津吏曉來迎。溪僧夜留宿。至止事方簡。優游從所欲。江城豐稻粱。水市多魚菽。三載奉甘飴。百錢飽家族。自有綵衣華。勿嘆藍袍綠。行年未三十。氣壯顏如玉。行義日以聞。焉能長碌碌。終列侍臣班。耀我同年錄。且賦白華詩。唱作離筵曲。

暴富送孫何入史館

孟郊嘗貧苦。忽吟不貧句。爲喜玉川子。書船歸洛浦。孟郊有忽不貧喜盧全書船歸洛詩乃知君子心。所樂在稽古。漢公得高科。不足惟墳素。二年佐棠陰。眼黑怕文簿。躍身入三館。爛目閱四庫。孟貧昔不貧。孫貧今暴富。暴富亦須防。文高被人妒。

送馮尊師時馮再爲拾遺

前日訪潘闥。下馬入窮巷。忽見雙筍石。臥向青苔上。云是馮尊師。秋來留在茲。今說東南行。問我堅乞詩。又見宋開老。亦言詩甚好。欲去天台山。卽別長安道。臺閣有羣英。贈別瑰與瓊。瑤然滿懷袖。此事殊爲榮。安用徵吾句。吾道方齟齬。老爲八品官。有山未能去。束髮號男兒。出處貴得宜。出則學皋夔。獨立稱帝師。處則同喬松。決起如冥鴻。誰能似蚯蚓。蟠屈泥土中。師行甚可羨。雲鶴無羈絆。爲我持此詩。題於桐柏觀。

庶子泉

物趣同天造。物景不自勝。泉乎未遇人。石罅徒流迸。宮相政多暇。行樂攝巖磴。發蒙漲爲溪。幽致茲焉盛。唐賢大曆後。峭壁刻名姓。我來一何暮。今秋始乘興。山勢環有缺。山門壺引柄。乍挹清泚香。頗愜幽閑性。味將春茗宜。光與曉嵐暝。架竹落僧廚。遠聲入晴磬。何當宿禪室。欹枕終夜聽。飲多病骨換。照久塵襟迫。銷盡謫居愁。無心治歸艇。

陽冰篆

泠泠庶子泉。落落陽冰筆。雲氣勢奔垂。龍蛇互蟠屈。嶧山旣剽滅。石鼓又缺失。唯茲數十字。逾勁倚雲窟。模印徧華夷。流傳耀細帙。書誠一藝爾。小道詎可忽。乃知出人事。千古名不沒。

東門送郎吏行寄承旨宋侍郎

西門送僕射鞍馬照路光。南門送貳卿冠蓋遙相望。東門送郎吏。鱗舟隋隄傍。郎吏誠隔品。同直白玉堂。丈人况知己。振拔在舉揚。攜手惜我去。深勸離別觴。醉中不記事。煙水空茫茫。醒來聞鳴櫓。嘔軋獨一傷。猶疑在禁中。殘漏寒丁當。迴望銀臺間。五雲遮帝鄉。聚散今如此。升沉庸何傷。丈人名位峻。只欠登巖廊。平居倦朝請。高論思退藏。圃田有別業。古木羅修篁。草亭寒蕭蕭。池波碧泱泱。嘗云拂袖去。可以傲羲皇。丈人果能爾。識度非尋常。安車比疎廣。辟穀如張良。再拜願丈人。壽考乃康強。自念山野士。不解隨圓方。宦途多齟齬。身計頗悲涼。行將解簪笏。歸去事農桑。幸容操履杖。灑掃循丘牆。

北樓感事有序

唐朱崖李太尉衛公。爲滁州刺史。作懷嵩樓。取懷歸嵩洛之義也。衛公自爲之記。其中述直翰林時。同僚存沒。且有白雞黃犬之歎。頗露知退之心。及自滁徵拜。再秉鈞軸。卒以怙權賈禍。貶死海外。則向之立言。誠空文爾。皇宋至道元年夏五月。僕自翰林學士尙書禮部員外郎。知制誥。除工部郎中。知滁州軍州事。到郡之日。訪衛公舊迹。樓之與記。皆莫知也。而郡有北樓。通刺史公署。登眺終日。甚亦自得。作北樓感事詩。以見意。

北樓出林杪。登覽開病姿。旁帶滁州城。雉堞何逶迤。下入刺史宅。卻臨統軍池。孟統軍作小池。在樓下。伊子翰林客。失職方在茲。兩衙部領外。盡日吟望時。晚窗度急雨。夏木交繁枝。淮南氣候殊。經秋嘯黃鸝。簷前有

山果採掇亦甘滋。樽中有官醞。傾酌任醇醪。忘機得真趣。懷古生遠思。念昔李太尉。落落邦家基。下筆到西漢。料兵如六奇。謫官來此郡。鬱鬱持一麾。嘗在懷嵩樓。記文悲盛衰。甚得進退理。深明禍福機。未幾再入用。斯言忽如遺。君恩匪膠柱。天殃若影隨。六月萬里行。炎荒竟不歸。功成又名遂。不退將安之。姑以人事較。勿憑天命推。矧予草澤士。被褐復羹藜。謬因弄文翰。八載侍丹墀。三入承明廬。古人期並馳。玉堂百日罷。所累非文辭。強仕未爲老。望郎不爲卑。淮邊永陽郡。人物自熙熙。費用量所入。豐約從其宜。一妻本糟糠。不識金翠施。三男無庶孽。詎愛紈綺貲。甘貧絕誅求。易退無羈縻。五十擬歸耕。何必懸車期。且予望衛公。雲龍與山麋。唐賢昔際遇。文雅道光輝。進士取將相。易於俯拾棊。自從五代來。素風已陵遲。干戈爲政事。茅土輸健兒。儒冠筮仕者。僅免寒與飢。至今明聖代。此風猶未移。自無經濟術。焉能碌碌爲。歸歟復歸歟。無忘北樓詩。

官醞

爲郡得官醞。月給盈三斛。地僻少使車。時清罕留獄。老大復遷謫。吾懷頗幽獨。嬋娟樓上月。爛熳池邊菊。東院與西亭。脩脩風弄竹。對此不開樽。騷人應慟哭。獨酌入醉鄉。陶然瞑雙目。醒來成浩歎。胡爲事口腹。彝酒書垂戒。羣飲聖所戮。漢文亦禁酒。患在糜人穀。自從孝武來。用度常不足。推醴奪人利。取錢入官屋。古今事相倍。帝皇道難復。吾無奈爾何。更盡杯中滌。

黑裘

野蠶自成繭。繰密爲山紬。此物產何許。萊夷負海州。一端重數斤。裁染爲黼裘。守黑異華侈。崇儉非輕柔。燠香則無取。風雪曾何憂。朝可奉冠帶。夜以爲衾裘。一作裯晏嬰三十年。庶幾跡相伴。季子歎貂弊。吾服已爲優。不取狐貉者。亦當師仲由。况我屢遷謫。行探賡歌謳。映髮垂鸞頂。植杖昂鳩頭。袖寬可以舞。老農卽爲儔。不曳銀臺門。任爾爭封侯。

聞鴉有序

滌淮地也。郡堞之上。鴟鴞巢焉。永夕鳴嘯不已。妻子驚死。或終夜不寐。因作詩以喻之。並徵前賢放逐而聞是鳥者。摠而述之。以見吾志。

元精自萬彙。羽族何茫茫。爲怪有鴟鴞。爲瑞稱鳳皇。鳳皇不時出。未識五色章。吾生在鄒魯。風土殊遠方。鳴鳩隨乳燕。日夕巢吾梁。翩翹雜鳥雀。比屋率爲常。又從筮仕來。五年居帝鄉。更直入承明。侍宴夜未央。上林聞鶯囀。巧舌如笙簧。鴟鴞徒知名。聞見實未嘗。頃年謫商山。聽之已悲涼。今茲出內庭。罰郡來永陽。誰知爾鸚鵡。營巢在城牆。年加睡漸少。秋盡漏且長。鳴嘯殊不已。歷歷含微霜。孺人泣我右。稚子啼我傍。吾心非達士。詎免亦悵悵。人生縱百歲。忽若石火光。其間有窮通。幽昧難自量。我愛皋與夔。峨冠虞舜堂。簫韶聞九成。丹穴來鏘鏘。又愛閔與散。陳力遇文王。鸞鷲聽岐山。多士周道昌。嗟嗟漢賈誼。年少謫南荒。

故有鵬鳥賦。倚伏理甚詳。郇公暨鄴侯。放逐同一邦。夜深聞此鳥。韋公涕沾裳。李侯舉酒令。斯音非不祥。坐客如不聞。罰之以巨觴。遂使惡聲鳥。聽之無所傷。天寶中。韋郇公謫守蕪州時。李鄴侯亦以處士放逐。因夜飲聞鷓鴣。韋公泣下。李公曰。此鳥人以爲惡。其聲可聽。乃令坐客有不聞其聲者。罰以大杯。由是聽之不厭。贊皇貶袁州。懷鶚義亦臧。李太尉有懷鶚賦。乃知昔賢哲。未免亦悽惶。况予不肖者。邀寵在朝行。報國惟直道。謀身昧周防。四年兩度黜。髻髮已蒼蒼。雖得五品官。銷盡百鍊鋼。何當解印綬。歸田謝膏粱。教兒勤稼穡。與妻甘糟糠。鳳來非我慶。鵲集非我殃。優游盡天年。身世俱可忘。

甘菊冷淘

經年厭梁肉。頗覺道氣渾。孟春致齋戒。勅廚惟素飧。淮南地甚暖。甘菊生籬根。長芽觸土膏。小葉弄晴暉。采采忽盈把。洗去朝露痕。俸麪新且細。溲牢如玉墩。隨刀落銀鏤。煑投寒泉盆。雜此青青色。芳香敵蘭蓀。一舉無子遺。空媿越盤存。解衣露其腹。稚子爲我捫。飽慚廣文鄭。飢謝魯山元。廣文先生飯不足。元魯山飢而死。况我草澤士。藜藿供朝昏。謬因事筆硯。名通金馬門。官供政事食。久直紫薇垣。知制誥給政事食。自小許公始。誰言謫滌上。吾族飽且溫。既無甘旨慶。焉用味品煩。子美重槐葉。直欲獻至尊。事見杜工部槐葉冷淘詩。起予有遺韻。甫也可與言。

訓楊遂

楊君江左士。文律何飄飄。人言未冠時。作賦陵洞簫。甲科中南國。江南狀元及第。通籍趨東朝。入中朝爲轅軻位不進。陶潛還折腰。復爲縣令。宰邑向蜀道。萑蒲忽興妖。官小力不支。犇竄避搶刀。朝廷責守土。黜入縣佐僚。昨朝寫孤憤。遺我有客謠。伊子亦左遷。諷之心無慄。人生一世間。否泰安可逃。但問道何如。未必論卑高。自古富貴者。撩亂如藜蒿。德業苟無取。未死名已消。豈期顏子淵。不朽在一瓢。推此任窮達。其樂方陶陶。達則爲鷓鴣。窮則爲鷦鷯。垂天與巢林。識分皆逍遙。

和楊遂賀雨

我罷內廷職。出臨永陽民。永陽民雖庶。未免多飢貧。富之既無術。齷齪爲謹身。可堪今夏旱。如燎復如焚。厥田本塗泥。坐見生塵氛。稚老無所訴。嗷嗷望穹旻。食祿憂人憂。早夜眉不伸。從決獄中囚。徧禱境內神。楚辭有山鬼。廟貌羅水濱。胡法有浮圖。寺宇連城闔。齋莊命寮案。供給抽俸緡。鼓笛迎湫水。香花照金輪。誠知非典故。且慰旱爇人。偶與天雨會。霧霏四郊勻。插秧復修堰。野叟何欣欣。可辦官府調。亦免農艱辛。變調賴時相。感應由聖君。於吾復何有。敢望歌頌云。清流楊水部。德與我爲鄰。仇香官位屈。何遜詩格新。見投賀雨詩。言自人口聞。夫君蓋私我。過實豈相親。爲霖非我事。職業惟詞臣。若有民謠起。當歌帝澤春。庶使採詩官。入奏助南薰。

揚州寒食贈屯田張員外成均吳博士同年殿省柳丞

前年寒食節。待詔直內庭。休假百官出。獨掩深嚴扃。近侍不敢醉。賜酒空滿罍。閑就通中枕。時聞索上鈴。思入無何鄉。兀然欲忘形。去年寒食日。滌上忝專城。山歌喧里巷。春物媚池亭。永陽溪水綠。琅琊山色青。謫宦自消遣。不敢誇獨醒。往往取官醞。時時對花傾。醉來念身世。翻使淚縱橫。今年蒞淮海。時節又清明。對案有留事。聽歌無歡聲。胥徒費簿領。使客煩送迎。狴牢未空歇。堰塚勞修營。衰病力不支。懶慢性已成。虛花滿雙目。素髮添數莖。酒肴略無味。妓樂固難聽。誰言寒食下。終日取茶烹。屯田布素交。屈此關市征。昔年同應舉。典衣飛巨觥。博士東觀客。求官得步兵。況且丹陛前。同爲出谷鶯。殿丞尹我邑。桑梓復弟兄。吏隱掌齏茗。終朝談道經。三賢宴會少。七夕休假并。何不策我馬。廢苑尋流螢。何不蕩我舟。樓臺訪摘星。三春景欲盡。九曲波始平。居然逼吏後。頓此阻交情。老態厭春華。病身憂宿醒。如水若不改。藉糟亦胡寧。解印蓄素志。吟詩露丹誠。維揚非所愛。有便卽爲耕。

揚州池亭卽事

冥心閱羣動。亦各趨所安。胡爲名利人。戚戚常鮮歡。吾生四十四。結珮呼郡官。掌言入綸閣。待詔直金鑾。匪謂得祿少。所嗟行道難。前年謫滁州。憂時雙鬢殘。賴有琅琊溪。時濯塵纓冠。朝僉徒淮海。任重力易殫。君恩詎可報。感激涕汎瀾。民瘼不能治。惻隱情悲酸。况復多病身。名宦心已闌。歸田未果決。懷祿尙盤桓。公退何所適。池亭一凭闌。旭日媚春弄。微風生鳴湍。呵僮勿挾彈。留客不持竿。用冀魚鳥馴。熙熙肆游觀。

神仙未可學。吏隱聊自寬。孤吟刻幽石。此義非考槃。

一品孫鄭昱。鄭綸元和中拜相。至鄭昱六世矣。

卜葬得假官。南出安上門。鞭馬六十里。暮投中書村。村翁館我宿。茆屋欲黃昏。有客忽投刺。自稱一品孫。氣貌不凡俗。因爲開酒罇。坐久問家諜。其族大且繁。池州有清節。濫觴發洪源。大傅擅鴻筆。入相又出藩。其家本開封。改號一何尊。至昱始六代。布衣老丘樊。跨驢入府縣。驅犢耕郊原。家廟固已毀。國史空具存。盛德百世著。功必格乾坤。高大已不祀。羨細何可論。况復起章句。乘時寵便蕃。子孫雖替後。尙得守田園。我愛三代時。法度有深根。卿大夫稱家。世世奉蘋蘩。四民有定分。宦路無馳奔。自從雜霸道。傾奪日喧喧。脫未秉金鉞。吮筆乘朱軒。朝榮暮又辱。容易如掌翻。古道不可仗。頽波益以渾。何况度木者。倒置輪與轅。我亦起白屋。兩朝直紫垣。蔭子有冠裳。賞延弟與昆。盡待食人祿。將何報君恩。農桑國之本。孝義古所敦。五族不力穡。終歲飽且溫。雖非享富貴。亦以蠹黎元。唐賢尙消歇。我輩奚足言。呼兒諷此詩。播在篋與笈。

月波樓詠懷有序

月波之名。不知得於誰氏。圖綴故老。皆無聞焉。因作古詩一章。凡六百八十字。陷於樓壁。庶使茲樓之名。得與詩俱不泯也。

郡城無大小。雉堞皆有樓。其間有名者。不過十數州。吹簫事遼邈。仙迹難尋求。庾公在九江。締構何風流。

謝守鎮宣城。疊嶂名有由。東陽敞八詠。吾聞沈隱侯。白雪架郢中。調高誰和酬。黃鶴倚鄂渚。仙去事悠悠。贊皇謫滌上。作賦懷嵩丘。樓居出俗態。澤國多勝遊。好景不遇人。安得名存留。齊安古郡廢。移此清江頭。築城隨山勢。屈曲伏環周。茲樓最軒豁。曠望西北陬。武昌地如掌。天末入雙眸。平遠無林木。一望同離婁。山形如八字。會合勢相勾。東晉方士戴洋言。武昌有山無林。山形八字。勢不及九。故孫權以黃武元年都武昌。八年遷建業。三國事既遠。六朝名亦休。近從唐末來。爭奪互仇仇。斯樓備矢石。此地控咽喉。終朝望烽燧。連歲事戈矛。可憐好詩景。牢落無人收。皇家統萬國。遠邇盡懷柔。三聖四十年。蕩蕩文德修。淮甸爲內地。黃岡爲上游。儒冠假郡印。踐更若公郵。况多辦職吏。誰肯恣吟謳。伊余何爲者。竊慕騷人儔。兩朝掌文翰。十年侍冕旒。去歲出西掖。謫居抱窮愁。日日江樓上。風物得冥搜。何人名月波。此義頗爲優。西南新桂魄。初上懸玉鈎。晚瀨清且淺。漂蕩影沉浮。三五金波滿。夜光如暗投。驪龍弄領珠。晃朗照汀洲。澹臺披寶劍。碎壁斬長虬。冰輪曉入地。推下赤金毬。闌干四五星。斜漢印清秋。誰家上元燈。兒盛劖菹蕪。此景吟不出。謾使聲啾啾。千里畫圖闔。四時詩興幽。野花媚宮纈。芳草鋪碧紉。火雲照沙浦。暴雨傾瓦溝。白亂蘆花散。紅殷藜穗稠。簷冰垂若鍊。雪片大於鷗。江籬煙漠漠。官柳雨颼颼。舟子斜盪槳。牧童倒騎牛。水獺有時戲。江豚頗能洄。山鳥奏竽籟。落霞展衾裯。魚網雪離離。酒旗風颼颼。旅懷雖自適。詩物奈相尤。右顧徐邈洞。精靈如在不。左瞰伍員廟。荒隙令人羞。樓中何所有。官醞湛蚍蜉。棋枰留客坐。琴調待僧抽。橘苞鄰藥鼎。墨筆問茶甌。平生性幽獨。寂寞誰

獻酬官常已三黜。懷抱罹百憂。凭闕憶王粲。望闕同子牟。自甘成潦倒。無復事聲猷。身世喻泡幻。衣冠如贅瘤。放意無何鄉。誰分親與仇。寓形朝籍中。毀譽任啁啾。君恩無路報。民瘼無術瘳。唯慚戀祿俸。未去耕田疇。題詩郡樓上。含毫思義猷。功名非范蠡。何必泛扁舟。

十月二十日作是日甚寒。始有冰。

重衾又重茵。蓋覆衰爛身。中夜忽涕泗。無復及吾親。須臾殘漏歇。吏報國忌辰。陵旦騎馬出。溪水薄潏潏。路傍飢凍者。顏色頗悲辛。飽暖我不覺。羞見黃州民。昔賢終祿養。往往歸隱淪。誰教爲妻子。頭白走風塵。修身與行道。多媿古時人。

成武縣作

釋褐來成武。初官且自強。位卑松在澗。俸薄葉經霜。雨菌生書案。飢禽啄印牀。猶驚寫秋卷。枕砌落花黃。

寄碭山主簿朱九齡

忽思蓬島會羣仙。二百同年最少年。利市欄衫拋白紵。風流名紙寫紅牋。歌樓夜宴停銀燭。柳巷春泥污錦韉。今日折腰塵土裏。共君追想好淒然。

寄魚臺主簿傅翹

聽說魚臺景最奇。鮑參軍到語多時。時林法椽。來自魚臺。因天晴綠野懸魚網。木脫空城露酒旗。錦

擲鮮鱗紅撥刺。雪翻寒鷺白攏毳。仍誇縣尹風騷客。應有秋來唱和詩。

寄寧陵陳長官

吏隱寧陵縣。琴堂枕古河。家山隔江遠。風雨過船多。假日親尋藥。公庭自種莎。相逢如舊識。執手動勞歌。

寄金鄉張贊善

年少辭榮自古稀。朝衣不着着斑衣。北堂侍膳侵星起。南畝催耕冒雨歸。種竹野塘春筍脆。採蘭幽澗露牙肥。伊予自是徒勞者。未得同尋舊釣磯。

遊虎丘山寺

寺牆圍着碧屏顏。曾是當年海湧山。盡把好峯藏院裏。不教幽景落人間。劍池草色經冬在。石座苔花自古斑。珍重晉朝吾祖宅。一迴來此便忘還。

寄獻潤州趙舍人

南徐城古樹蒼蒼。衙府樓臺盡枕江。甘露鐘聲清醉榻。海門山色滴吟窗。直廬久負題紅藥。出鎮何妨擁碧幢。聞說秋來自高尚。道裝筇竹鶴成雙。

記言彩筆罷摛華。郡閣高閑似道家。琴院坐聽江寺磬。郡樓吟見海山霞。春園遺母親燒筍。夜榻留僧自煮茶。應笑陶潛未歸去。折腰奔走在泥沙。

寄毗陵劉博士

毗陵古郡接江堧。赴任琴書共一船。下岸且尋甘露寺。到城先問惠山泉。秋蟾吐檻供吟興。野鶴偃床伴醉眠。官散道孤詩筆老。不應雙鬢更皤然。

除夜寄羅評事同年二首

歲暮洞庭山。知君思浩然。年侵曉色盡。人枕夜濤眠。移棹風搖浪。開窗雪滿天。無因一乘興。同醉太湖船。郡僚方賀正。獨宿太湖稜。階下羞爲吏。船中祇載僧。折梅和薄雪。煮茗對孤燈。應笑排衙早。寒靴踏曉冰。

春日官舍偶題

薄宦苦流離。壯年心已衰。鶯花愁不覺。風雨病先知。曉月晃竹屋。寒苔疊槿籬。無人慰幽寂。庭柳自低垂。

寄獻翰林宋舍人

金鼎鹽梅偶未和。位高猶說野情多。宮牆月上開琴匣。道院風清响藥籬。留客旋燒含露筍。倩僧教種耐霜莎。孤寒知有爲霖望。未忍江頭釣綠波。

吳江縣寺留題

松江江寺對峯巒。檻外生池接野灘。幽鷺靜翹春草碧。病僧閑說夜濤寒。晨齋施筍惟溪叟。國忌行香祇盡日。門前照流水。塵纓渾擬濯沅瀾。

中元夜宿余杭山仙泉寺留題

祭廟迴來略問禪。薛牆莎徑碧山泉。風疏遠磬秋開講。水響寒車夜救田。藍綬有香花菡萏。竹窗無寐月嬋娟。自慚政術貽枯旱。忍臥松陰漱石泉。

言懷

宦途日日與心違。人事紛紛任是非。却爲遊山置行李。漁家船舫道家衣。

泛吳松江

葦蓬疎薄漏斜陽。半日孤吟未過江。唯有鷺鷥知我意。時時翹足對船窗。

蘇州寒食日送人歸觀

江城寒食下花木。慘離魂。幾宿投山寺。孤帆過海門。篷聲潑火雨。柳色禁煙村。定省高堂後。斑衣減淚痕。

春晚遊太和宮

數里新萍夾岸莎。春來乘興宿煙蘿。隨風蝴蝶顛狂甚。當路花枝採折多。絳節參差抽苦筍。翠鈿狼藉撒圓荷。湖山滿眼不歸去。空羨漁翁雨一蓑。

再泛吳江

二年爲吏住江濱。重到江頭照病身。滿眼碧波輸野鳥。一蓑疎雨屬漁人。隨船曉月孤輪白。入座晴山數

點青。張翰精靈還笑我。綠袍依舊惹埃塵。

贈湖州張從事

前年春榜亞龍頭。詞賦曾推第一流。上直未歸紅藥院。供吟先得白蘋洲。酒醒野寺烹山蕨。公退溪亭狎海鷗。自是吳門折腰吏。滿衣塵土爲君羞。

送李中舍罷蕭山赴闕

吏隱江東五六年。歸時猶戀好山川。野僧送別攜詩句。瘦馬臨歧當酒錢。吳苑醉逢梅弄雪。隋隄吟見柳垂煙。自言更共秋濤約。未捨西興一釣船。

和郡寮題李中舍公署

樹影池光映曉霞。綠楊陰下吏排衙。閑拖屐齒妨橫筍。靜拂琴床有落花。地脈暗分吳苑水。廚煙時煮洞庭茶。青宮詞客多閑暇。按曲飛觴待歲華。

題張處士溪居

雲裏寒溪竹裏橋。野人居處絕塵囂。病來芳草生漁艇。睡起殘花落酒瓢。閑把道書尋晚逕。靜攜茶鼎洗春潮。長洲懶吏頻過此。爲愛盤飧有藥苗。

送查校書從事彭門

佐幕徐方髻未秋。官升芝閣更風流。姓名舊在鶯遷榜。詩什重題燕子樓。漸有俸錢供藥債。應無歸夢到漁舟。公餘時上臺頭寺。珠履金貂共勝遊。

送羅著作奉使湖湘

使星躔次入長沙。曉別延英去路賒。數刻漏中承密旨。幾重湖外奉皇華。山行馬拂湘川石。寺宿僧供嶽麓茶。迴日期君直西掖。當階紅藥正開花。

送馮學士入蜀

錦川宣共少年期。四十風情去未遲。蠶市夜歌欹枕處。峨眉春雪倚樓時。休誇上直吟紅藥。多羨乘軺聽子規。莫學當初杜工部。因循不賦海棠詩。

賀將作孔監致仕

泣辭明主挂冠簪。便約幽雲老舊林。朝請罷來頻典笏。田園歸去只攜琴。焚香靜院當山色。晒藥空庭避竹陰。一子得官三品祿。未饒疎傅有黃金。

和陳州田舍人留別

演綸多暇每封章。暫去頒條道更光。郡吏好排紅粉妓。使君曾是紫薇郎。樓臺有月新詩出。囿園無人綠草長。地接清淮足佳致。水村煙塢是魚鄉。

閣下暮春

詔書稀少日何長。閑枕通中睡一場。院吏報來丞相出。紫薇花影上東廊。

初入山聞提壺鳥時秋暖。此鳥忽聞。

遷客由來長合醉。不煩幽鳥道提壺。商州未是無人境。一路山村有酒沽。

初到商州館於妙高禪院佛屋壁上見草聖數行讀之乃數年前應制時所作皇帝試貢士歌

思追前事有感而成章

應制歌篇對玉除。是誰傳寫到商于。昔從莫莢階前作。今向蓮花座畔書。商嶺未甘隨綺季。漢庭曾忝用相如。山僧莫怪頻垂淚。乍別承明舊直廬。

謫居感事一百六十韻

遷謫獨熙熙。襟懷自坦夷。孤寒明主信。清直上天知。消息還依道。生涯只在詩。唯當諭山木。詎敢詠江蘺。偶嘆勞生事。因思志學時。讀書方覩奧。下筆便搜奇。賦格輕鸚鵡。儒冠薄鷓鴣。耕桑都不事。園井未曾窺。必欲縑緗富。寧教杼軸紕。光陰常矻矻。交友盡恹恹。步驟依班馬。根源法孔姬。收螢秋不倦。刻鵠夜忘疲。流輩多相許。時賢亦見推。叨榮偕計吏。濫吹謁春司。僕瘦途中病。驢寒雪裏騎。空拳入場屋。拭目看京師。技癢初調箭。鋒銛欲試錐。甲科登漢制。太平興國五年。予首中甲科。內殿識堯眉。數刻愁晡矣。三題亦勉之。先鳴輸

俊彥上第遂參差。罷舉身何託。還家命自奇。惟慚親倚戶。敢望嫂停炊。竭力求甘旨。終朝走路岐。貪希仲由米。多廢董生帷。丹桂何時折。孤蓬逐吹移。知憐無國士。志氣自男兒。季子貂裘弊。狂生刺字隳。廣場重考覆。蹇步載馳驅。明代寧甘退。青雲暗有期。禮闈冠多士。御試拜丹墀。澤霧寧慚豹。搏風肯伏雌。重瞳念孤迹。一第忝鴻私。得告還鄉貴。除官佐邑卑。折腰稱小吏。矩步慎初資。予解褐得主簿。枳棘心何恨。松筠操自持。及親家有養。事長禮無虧。銅墨官常改。煙霄雨露垂。縣花聊主管。寺棘且羈縻。予九年授大理評事。吳郡包山側。長洲巨海湄。萬家呼父母。民間多呼縣令為父母官。百里撫惇嫠。敢起徒勞嘆。長憂竊祿嗤。官途甘碌碌。官業亦孜孜。政事還多暇。優游甚不羈。村尋魯望宅。寺認館娃基。甫里有陸魯望宅。靈輿寺。館娃故宮。西子留香逕。吳王有劍池。探香徑在靈巖寺。劍池在虎丘寺。狂歌殊不厭。酒興最相宜。草織登山履。蒲紉挽舫綏。果酸嘗橄欖。花好插薔薇。震澤柑包火。松江繪縷絲。三年無異政。一篋有新詞。多戀南園臥。蘇州南園。最爲勝景。俄從北闕追。熙

四年。予奉徵召赴闕。呈材真樸楸。召對立茅茨。載筆居三館。登朝忝拾遺。紫泥天上降。朱紱御前披。侍從殊爲貴。圖書頗自怡。史才媿班固。諫筆謝辛毗。擬把微軀殺。慚將厚祿尸。安邊上章疏。端拱三年。詔百官各言邊事。因上封章極言。

爲上容納。端拱獻箴規。予初拜拾遺。頗有諷諭。精鑒逢英主。知憐是首夔。予論邊事。特爲趙許公所器。賡歌才不稱。掌誥筆難摛。是歲蒙上召予殿上作歌。遂有西掖之拜。制曆多無事。閣下有制曆。當直舍人。如無除目。書名而出。詞頭每怯遲。繁陰温室樹。清吹萬年枝。青瑣霞光透。蒼苔露片萎。御香飄硯席。宮葉落纓綉。看浴池心鳳。閑捫殿角螭。上林花掩映。仙

掌露淋漓對近瞻。旒冕班清辟虎貔。宮簾垂翡翠。御水動漣漪。紀號年淳化。朝元月建寅。叶攝官捧寶冊。

淳化元年立正伏。別上尊號。祝壽執樽彝。表案行低折。時予又押諸宮懸聽肅祇德音王澤潤。是月

予攝中書侍郎。捧玉冊玉寶。降謙柄斗杓移。時上省尊號。貴接臯夔步。深窺龍鳳姿。策勳何煊赫。賜紫更萎蕤。是歲加柱國。謝蚊力山難

負。鶉梁翼易滋。論功慚八柱。受服欲三褫。音祇慮殃將至。曾無事可裨。趁朝空俯偃。退食自逶迤。更直當

春好。橫行隔宿咨。每休假三日。後謂之橫行。於內朝長得對。駕幸每教隨。瓊院觀雲稼。金明閱水嬉。

賞花臨鳳沼。侍釣立魚坻。拂面黃金柳。醜顏白玉卮。分題宣險韻。每應制賦詩。翻勢得仙基。上嘗賜兩

底取明珠。四曰妙算無窮。人莫能曉。竟舉窺天管。爭燃煮豆其恨無才應副。空有表虔祈。每有

詩韻。難并新基勢。但上睿睠偏稱賞。天顏極撫綏。中官賜大字。兩朝每賜御詩。皆院吏捧巾綦。遭

表免和訴不曉而已。遇誠堪惜功名竊。自思請纓無壯志。硯草亦胡爲。未獻東封頌。空鑄北嶽碑。淳化元年。予撰碑。深慚專

俎豆。長欲議邊郵。但可懷驕子。何須斬谷蠡。胸中貯兵甲。堂上有熊羆。成敗觀千古。施張在四維。兼磨斷

佞劍。擬樹直言旗。已上蓋言予平遇事難緘默。平居疾喔咻。無權逐鳥雀。俛首任狐狸。廷尉專刑煞。以制

人兼大理寺事。詞臣益等衰。五花儀久廢。三尺法聊施。書命猶無詔。予在閣下草詞。多不虛評刑肯有欺。厚

誣凌近侍。內亂疾妖尼。妖尼道安。誣丹筆當無赦。金科了不疑。拜章期悟主。仆法更防維。萋菲終無已。

雷霆遂赫斯。如弦傷訐直。投杼覓瑕疵。衆鑠金須化。羣排柱不支。佞權迴北斗。讒舌簸南箕。闕下羊腸險。

朝端虎尾危。道孤貽衆怒。責薄賴宸慈。西掖除三字。南山佐一麾。蒼黃塵滿面。揮洒涕交頤。目斷九重闕。魂銷八達衢。尊親遠扶持。兄弟盡流離。秦嶺偏巉絕。商于更嶮巇。吾廬何處是。我馬忽長辭。六里山蒼翠。丹河浪渺瀰。分封思衛鞅。割地憶張儀。懶讀三間傳。空尋四皓祠。畚煙濃似瘴。松雪白如梨。壞舍床鋪月。寒窗硯結澌。振書衫作拂。解帶竹爲梳。呼童泥茶竈。從僧借藥篩。鐘愁上寺起。角怨水門吹。上寺在州北子城。有水

門。舊友誰青眼。新秋出白髭。予到商州始有白髭。煙嵐晴鬱鬱。風雨夜颼颼。我過徒三省。吾生自百罹。初來聞旅雁。不覺見黃鸝。市井攜山菜。房廊蓋木皮。商州民多以木皮蓋屋。野花紅爛熳。山草碧樵樵。副使官資冷。商州酒味醜。尾因求食掉。角爲觸藩羸。有夢思紅藥。無心採紫芝。瘦妻容慘戚。稚子淚漣洏。暖怯蛇穿壁。昏憂虎入籬。松根燃夜燭。山蕨助朝飢。豈獨堂虧養。還憂地乏醫。跡飄萍渤海。親老日崦嵫。閣下辭巢鳳。山中伴野麋。風欺秀林木。雲隔向陽葵。屈產遭駑馬。丹山困嚇鴟。悔須分黑白。本合混妍媸。自此韜餘刃。終當學鈍錐。窮通皆有數。得喪又奚悲。自顧才何者。空憐道在茲。宣尼猶削伐。大禹亦胼胝。運去當如鼠。投來且禦魑。避風聊戢翼。得水會揚鬚。琴酒圖三樂。詩章效四蟲。白公有四蟲詩。魚須從典賣。貂尾任傾欵。兀兀拖腸鼠。悠悠曳尾龜。北窗尋蛺蝶。南岸看鷓鴣。山翠樓頻上。雲生杖獨搯。簟閑留曉魄。簷暖負冬曦。松柏寒仍翠。瓊瑤涅不淄。望誰分曲直。祇自仰神祇。吾道寧窮矣。斯文未已而。狂吟何所益。孤憤洩黃陂。

龍鳳茶

標龍鳳號題新。賜得還因作近臣。烹處豈期商嶺水。碾時空想建溪春。香於九畹芳蘭氣。圓似三秋皓月輪。愛惜不嘗惟恐盡。除將供養白頭親。

上寺留題 在商州北山作

松杉疎瘦簇山根。樓殿參差對郭門。不惜馬蹄來北寺。爲憐熊耳在西山。一作軒雲生石砌搖寒影。泉汲銅餅露凍痕。遷客頻來何所得。一叢修竹拂吟魂。

歲暮感懷貽馮同年中允二首

謫居商于郡。閑門車馬稀。塵侵書命筆。香散入朝衣。燒盡峯巒出。霜晴木葉飛。夜來天欲雪。寒夢不成歸。
謫居京信斷。歲暮更淒涼。郡僻青山合。官閑白日長。燒煙侵寺舍。林雪照街坊。爲有遷鶯侶。詩情不敢忘。

畚田調井序

上洛郡南六百里。屬邑有豐陽上津。皆深山窮谷。不通轍迹。其民力耕火種。大底先斫山田。雖懸崖絕嶺。樹木盡仆。俟其乾且燥。乃行火焉。火尙熾。卽以種播之。然後釀黍稷。烹雞豚。先約曰。某家某日有事於畚田。雖數百里。如期而集。鉏斧隨焉。至則行酒啗炙。鼓譟而作。蓋斲而掩其土也。斲畢則生。不復耘矣。援椽者有勉勵督課之語。若歌曲然。且其俗更互力田。人人自勉。僕愛其有義。作畚田五首。以侑其氣。亦欲採詩官聞之。傳於執政者。苟擇良二千石。暨賢百里。使化天下之民。如斯民之義。庶乎汙萊盡。

關矣。其詞則取乎俚。蓋欲山民之易曉也。

大家齊力斲屏顏。耳聽田歌。手莫閑。各願種成千百索。山田不知畝。某家今年種得若干索。以百尺繩量之。曰豆萁禾

穗滿青山。

殺盡雞豚喚斷畬。由來遞互作生涯。莫言火種無多利。林樹明年似亂麻。種穀之明年。自然生木。山民獲濟。

穀聲獵獵酒醺醺。斫上高山入亂雲。自種自收還自足。不知堯舜是吾君。

北山種了種南山。相助力耕豈有偏。願得人間皆似我。也應四海少荒田。

畚田鼓笛樂熙熙。空有歌聲未有詞。從此商于爲故事。滿山皆唱舍人詩。

賀畢翰林新入

閒步花磚喜復悲。所悲君較十年遲。銀臺曉入批丹詔。銅鏡秋開鑷白髭。宮錦細袍宜與着。內閑驕馬賜來騎。家門記得咸通事。莫忘論兵夜召時。咸通中。畢相在翰林時。懿宗將復河湟。夜召論邊事。數陳方略。甚稱旨。上曰。吾方謀帥。不意頗牧在吾禁苑。遂有登壇之命。

商山海棠

錦里名雖盛。商山豔更煩。別疑天與態。不類土生根。淺著紅蘭染。深於絳雪噴。待開先釀酒。怕落預呼魂。香裏無勍敵。花中是至尊。桂須辭月窟。桃合避仙源。浮動冠頻側。霓裳袖忽翻。望夫臨水石。窺客出牆垣。

贈別難饒柳。忘憂肯讓萱。輕輕飛燕舞。脈脈息嬌言。蕙陋虛侵逕。梨凡浪占園。論心留蝶宿。低面厭鶯喧。不忝神仙品。何辜造化恩。自期栽御苑。誰使擲山村。綺季荒祠畔。仙娥古洞門。煙愁思舊夢。雨泣怨新婚。晝恐明妃恨。移同卓氏奔。祇教三月見。不得四時存。繡被堆籠勢。燕脂浥淚痕。貳車春未去。應得伴芳罇。

翰林畢學士寄示醫瘦疾藥方。因題四韻。兼簡兩制諸知。

預憂囊瘦病龍鍾。乞得仙方必有功。縱免項如樗里子。也應頭似夏黃公。西暉亭下峯巒碧。亭在州之西峯。每日落時。有如亭午。南靜川中木葉紅。川在州之南二三里。平如掌。居人百餘家。秋來一川盡是貳車紅葉。又有小桃細竹。夾水而生。春間此景不惡矣。堪醉處。春來唯恐酒樽空。

賀柴舍人新入西掖

早折蟾宮第一枝。綸闈恩命若何遲。久爲俗吏殊無味。合掌王言亦有時。好繼忠州文最盛。應嫌長慶格猶卑。舍人嘗與余評前賢詔語。以爲陸相首出。若奉天罪己詔。元白之徒。可坐在廡下。他年莫忘中吳宰。六里山前歌紫芝。

歲除日同年馮中允攜觴見訪。因而沈醉。病酒三日醒而偶贈。

除夜渾疑便白頭。攜壺相勸醉方休。敢辭枕上三朝臥。且免燈前一夕愁。薄命我甘離鳳闕。多才君亦滯龍樓。相逢不盡杯中物。何以支當寂寞州。

放言

誰信人間是與非。進須行道退忘機。卦逢大壯羝羊困。鄉入無何蛺蝶飛。澤畔衣裳蘭作佩。山中生計竹爲扉。飢腸已共夷齊約。一曲高歌去採薇。

回襄陽周奉禮同年因題紙尾

武關西畔路巉岩。兩月勞君寄兩緘。鏡裏想添新白髮。篋中猶貯舊青衫。扶頭酒好無辭醉。縮項魚多且放嚙。譬似元和張太祝。十年不改舊官銜。

清明日獨酌

一郡官閑惟副使。一年冷節是清明。春來春去何時盡。閑恨閑愁觸處生。漆燕黃鸝誇舌健。柳花榆莢鬪身輕。脫衣換得商山酒。笑把離騷獨自傾。

寒食

今年寒食在商山。山裏風光亦可憐。稚子就花拈蛺蝶。人家依樹繫鞦韆。郊原曉綠初經雨。巷陌春陰乍禁煙。副使官閑莫惆悵。酒錢猶有撰碑錢。

山僧雨中送牡丹

數枝香帶雨霏霏。雨裏攜來叩竹扉。擬戴卻休成悵望。御園曾插滿頭歸。

春居雜興

兩株桃杏映籬斜。粧點商山副使家。何事春風容不得。和鶯吹折數枝花。
春雲如獸復如禽。日照風吹淺又深。誰道無心便容與。亦同翻覆小人心。

登郡南樓望山感而作

西接藍田東武關。有唐名郡數商顏。二千石盡非吾道。一百年來負此山。
自唐末至今百餘年。無文臣爲刺史。 重疊曉嵐新雨後。參差春雪夕陽間。唯供遷客風騷興。醉望吟看不暫閒。

道服

楮符布褐阜紗巾。曾奉西垣寓直人。此際暫披因假日。如今長著見閑身。
濯纓未識三湘水。漉酒空經六里春。不爲行香著朝服。二車誰信舊詞臣。

春遊南靜川

南過高車嶺。一云齊車嶺。齊音告。 川源似掌平。峯巒開畫障。畎畝列棊枰。
帝女柔桑綠。王孫野草生。提壺催我醉。戴勝勸人耕。商嶺堪攜妓。丹河好濯纓。蓋圓松影密。鞭亂竹根穉。
勃勃畝田氣。磷磷水磴聲。野桃誰似主。山鳥不知名。欲舞寧無蝶。思歌亦有鶯。官閑春日永。擔酒此中行。

南郊大禮詩七首

聖君重卜祀南郊。仗擁黃麾間白旄。仙吹冷翻蒼玉佩。曉霞晴透絳紗袍。
天開兜率齋宮靜。海湧蓬萊帳

殿高。遷客生還知有望。商山不敢讀離騷。
嚴配郊丘展孝思。質明參酌禮無違。大羹味薄牲牲潔。至樂聲和鳳鳥飛。黃道月斜風細細。紫壇天曉露
霏霏。可憐此夜商山客。畫盡爐灰淚滿衣。
綵城殘月帶微霜。版奏中嚴夜未央。三獻欲終侵曙色。百神齊下散天香。珠旒微亂墀簾韻。柴燎輕籠劍
佩光。此夕商山對何物。猿啼鳥哭樹蒼蒼。
嚴禋禮退一陽生。抃賀歡呼動四溟。聖壽久長南至日。寶圖高大北辰星。九重城闕天將曙。百萬人家戶
不扃。知有化工無棄物。海波分細一浮萍。
乾元門上赭袍光。雉扇初開散御香。郊祀一千年運祚。赦書三萬里封疆。人間草木沾皇澤。天上咸韶送
壽觴。惆悵昔年曾侍從。而今翻似鼠拖腸。
千官雲擁御樓時。朝服紛紛換禮衣。萬里梯航歸大國。一聲雷雨破圓扉。青蠅傳去人人喜。丹鳳啣來處
處飛。收盡洛南遷客淚。全家潛望日邊歸。
年來不見祀圓丘。謫宦攜親嘆白頭。作賦有時悲鵬鳥。殺身無路學犧牛。非才豈合居臺閣。歸夢徒勞近
冕旒。千載遭逢如未替。此時重見帝王州。

恭聞种山人表謝急徵不赴

表讓皇家買酒錢。上令京兆府。賜山人。酒錢。讓而不受。醉鄉歸去更陶然。吾君若問徵君意。自有東臯種黍田。不應明時鵠板書。可能終老傲唐虞。神仙見說須陰德。肯爲蒼生一出無。

五更睡

數載直承明。寵深還若驚。趁朝雞喚起。殘夢馬馱行。左宦離雙闕。高眠盡五更。如將閑比貴。此味敵公卿。

遣興

百年身世片時間。況是多愁鬢早斑。貧有琴書聊自樂。貴無功業未如閑。波平南浦堪垂釣。日滿東窗尙掩關。祇爲慈親憶歸去。商山不隱隱何山。

新秋卽事二首

宦途流落似長沙。賴有詩情遣歲華。吟弄淺波臨釣渚。醉披殘照入僧家。石換苦竹旁抽筍。雨打戎葵臥放花。安得君恩許歸去。東陵閑種一園瓜。

百歲浮生一夢中。夢中何事有窮通。姓名舊署黃麻紙。顏狀今成白髮翁。煙暝小窗螢火碧。雨昏幽徑蓼花紅。謫居始信爲儒苦。生計兼無一畝宮。

秋居幽興三首

秋光雖寂淡。幽興入詩家。籬暗蟹啼菊。園荒蟻上茄。圍碁知日影。理髮見霜華。向曉兒童喜。溪僧遺晚瓜。

園林經積雨。晚步思幽哉。宿鳥頭相並。秋瓜頂自開。藥田荒野蔓。屐齒沒蒼苔。幽興將何遣。焦琴貫酒來。
謫居人事慵。幽興與誰同。僧到烹秋菌。兒啼索草蟲。掃苔留嫩綠。寫葉惜殘紅。歲晏琴樽好。籬邊有竹叢。

前賦村居雜興詩二首。間半歲不復省視。因長男嘉祐讀杜工部集。見語意頗有相類者。咨於予。且意予竊之也。予喜而作詩。聊以自賀。

命屈由來道日新。詩家權柄敵陶鈞。任無功業調金鼎。且有篇章到古人。本與樂天爲後進。予自謫居時多取白公
詩。時時玩之。
敢期子美是前身。從今莫厭閑官職。主管風騷勝要津。

村行

馬穿山徑竹初黃。信馬悠悠野興長。萬壑有聲含晚籟。數峯無語立斜陽。棠梨葉落胭脂色。蕎麥花開白雪香。何事吟餘忽惆悵。村橋原樹似吾鄉。

淳化二年八月晦日夜夢於上前賦詩。既寤。唯省一句云。九日山川見菊花。間一日有商于二車之命。實以十月三日到郡。重陽已過。殘菊尙多。意夢已徵矣。今忽然一歲。又逼登高。追續

前詩因成四韻

節近登高忽嘆嗟。經年憔悴別京華。二車何處搔蓬髻。九日山川見菊花。夢裏榮衰安足道。眼前杯酒且須賒。商于鄒魯雖迢遞。大底攜家卽是家。

仲咸就嘉郡印。因以四韻爲賀。且有以勉之。

如何小郡滯清賢。未得徵歸振鷺班。莫怕三年持漢詔。猶勝遷客臥商山。俱諳宦路須推命。同有詩情令好閑。唯是謫官無考限。比君知向幾時還。

寄豐陽喻長官

七十年華鬢未霜。道情偏稱宰豐陽。旦衙請印無仇覽。豐陽戶不滿千。例省主簿。夜榻圍棋祇孟光。喻好碁。與內子敵手。

庭戶萬重嵐氣盛。盤餐數釘藥苗香。猶言彭澤終歸去。門柳青青檻菊黃。

喜雪貽仲咸

半冬無雪懶吟詩。薄暮紛紛喜可知。衣上惹來看不足。竹邊聽處立多時。光迷曙色侵窗早。片舞寒空到地遲。今日使君吟望好。一車飛絮醉褰帷。

霽後望山中春雪

誰種離離碎玉苗。曉樓吟望興偏饒。白雲作伴宜長在。紅日無情已半銷。聚映早霞明野寺。散隨春水過溪橋。世間安得王摩詰。醉展霜縑把筆描。

杏花七首

紅芳紫萼怯春寒。蓓蕾黏枝密作團。記得觀燈鳳樓上。百條銀燭淚闌干。

暖映垂楊曲檻邊。一堆紅雪罩春煙。春來自得風流伴。榆莢休拋買笑錢。
桃紅梨白莫爭春。素態妖姿兩未勻。日暮牆頭試回首。不施朱粉是東鄰。
長愁風雨暗離披。醉遠吟看得幾時。只有流鶯偏稱意。夜來偷宿最繁枝。
登龍曾入少年場。錫宴瓊林醉御觴。爭戴滿頭紅爛熳。至今猶雜桂枝香。
長安廢棄遷都後。曲沼荒涼一夢中。見說舊園爲茂草。寂寥無復萬枝紅。
陌上紛披枝上稀。多情猶解撲人衣。雙成灑道迎王母。十里濛濛絳雪飛。

日長簡仲咸

日長何計到黃昏。郡僻官閑晝掩門。子美集開詩世界。伯陽書見道根源。風騷北院花千片。月上東樓酒一樽。不是同年來主郡。此心牢落共誰論。

自嘲

三月降霜花木死。九秋飛雪麥禾災。蟲蝗水旱霖霑雨。盡逐商山副使來。

偶圃小園因題二首

千眼春畦兩眼泉。置來因得弄潺湲。三年謫宦供廚菜。數月朝行貫宅錢。空媿先師輕學圃。未如平子便歸田。此心久畜耕山計。不敢拋官爲左遷。

偶營菜圃爲盤飧。淮瀆祠前水北村。泉響靜連衙鼓響。柴門深近子城門。濛濛細雨春蔬甲。疊疊寒流老樹根。從此商于地圖上。畫工添個舍人園。

三月二十七日偶作簡仲咸

一未量移一轉勳。時數後予未量移仲咸祗加騎都尉。貂冠羊胃總非眞。予檢校常侍仲咸騎都尉故云羊胃。韶光祗有兩三日。浮世稀逢七十人。青杏勸君重酌酒。牡丹邀我且尋春。請看富貴趙中令。已作北邙山下塵。

別丹水

曾經爛漫濯吾纓。忍別潺湲月夜聲。便入紅塵染詩思。吟魂猶合數年清。

寄潘處士

賣藥先生白布衣。書來方信在京師。減君爐裏燒丹術。助我山中買酒貲。處士自京寄白金相贈。閑似野雲終不住。閉如籠鶴已多時。飄飄又去黃河北。更負中條幾首詩。

自寬

身世龍鍾且自寬。追量才分合飢寒。朝中舊友休誇貴。篋裏新詩不博官。曉髮靜梳微霰落。夜琴閑拂古風殘。會須歸去滄江上。累石移莎擁釣灘。

贈衛尉宋卿二十二丈

謫宦歸來髮更斑。徊翔猶在寺卿閑。幾多僚友三台上。大半生徒兩制間。舊賜錦袍多貰酒。新裁紗帽欲歸山。東垣小諫龍鍾甚。空媿洪爐早鑄顏。

送融州任巽戶曹撰越王愛姬墓誌得罪

御前曾取好科名。一椽如何萬里行。身落蠻方人共惜。罪因文學自爲榮。吏供版籍多魚稅。民種山田見象耕。君看咸通十司戶。投荒終久是公卿。

寧公新拜首座因贈

著書新奏御。上詔承旨。蘇公道士韓德純。與公集三教聖賢事迹。各五十卷。故有首座之命。優詔及禪扉。首座名雖貴。家山老未歸。馨聲寒遶枕。塔影靜侵衣。終憶西湖上。秋風白鳥飛。

幕次閑吟三首

二年憔悴詠江籬。恩詔重教侍玉墀。寓直掖垣休入夢。常參幕次且吟詩。新文自負山中集。舊吏多驚髩畔絲。莫道諫官無一事。猶勝閑臥解州時。

文章曾受帝褒稱。幕次孤吟冷似冰。借馬趁朝長後到。問人求米盡難憑。僮教罷樂朝無酒。兒廢看書夜絕燈。除卻金章在腰下。其餘滋味一如僧。

江籬吟盡髩成霜。謫宦歸來夢一場。每日祇窺丹鳳案。被人猶喚紫薇郎。齋宮獨坐風翻幕。客舍閑吟葉

滿床。若是承明容再入。未曾荒廢舊文章。

寄題義門胡氏華林書院

水閣山齋架碧虛。亭亭華表映門閭。力田歲取千箱稻。好事家藏萬卷書。旋對杯盤燒野筍。別開池沼養溪魚。吾生未有林泉計。空媿妨賢臥直廬。

送張監察通判餘杭

郡城瀟灑浙江濱。暫輟乘驄慰遠民。莫放霜威誇御史。且收風景屬詩人。雪侵樓上迎潮眼。花擁湖中泛月身。盡是公餘吟咏處。好飛佳句寄詞臣。

書齋

年年賃宅住閑坊。也作幽齋作道裝。守靜便爲生白室。著書兼是草玄堂。屏山獨臥千峯雪。御札時開一炷香。莫笑未歸田里去。宦途機巧盡能忘。

送柴諫議之任河中

蒲津名郡得名公。諫紙盈箱且罷封。紅藥塔墀曾吐鳳。綠莎廳事舊鳴螿。故事河府院。好。有綠莎廳。唐

兵興之後。爲不好事。劃去之。故云。下車首謁重華廟。入境先經五老峯。見說丘門詩版在。應教回也繼

遺蹤。故兵部王侍郎。常知河府。公之座主也。

送李著作

芸閣新銜捧詔歸。歷陽湖畔拜庭闈。已聞愛子披朱綬。著作郎君已賜服色。猶學嬰兒著綵衣。飯饋海陵紅稻軟。鱸膾淮水白魚肥。吾生白矢榮親祿。謾踏花磚入北扉。

滁州官舍

忽從天上謫人間。知向山州住幾年。俸外不教收果實。公餘多愛入林泉。朝簪未解雖妨道。宦路無機卽是禪。鈴閣悄然私自問。郡齋何異玉堂前。

今冬

休思官職落青雲。且算今冬病養身。白紙糊窗堪聽雪。紅爐着火別藏春。旋籩官醞漂浮蟻。時取溪魚削白鱗。況是豐年公事少。爲郎爲郡似閑人。

高閑

謫官滁上欲何爲。惟把高閑度歲時。費盡俸錢因合藥。忙於公事是吟詩。京中吏去慵傳信。江外僧來與撰碑。更待吾家婚嫁了。解龜休致未全遲。

臘月

臘月滁州始覺寒。年豐歲暮郡齋閑。官供好酒何憂雪。天與新詩合看山。日照野塘梅欲綻。燒迴荒徑草

猶斑吏人散後無公事。門戟森森夕鳥還。

有傷

壁上時牌催晝夜。案頭朝報見存亡。懸車又喪司空相。延閣新薨賈侍郎。二公相繼薨。陶鑄官資經化筆。某登朝後

空。所任官皆司品題名姓在文場。予應舉時。賈公以駕部員外知制誥。同知貢舉。遂蒙首冠多士。總惟一慟無由得。徒灑春風淚數

行。

寄杭州昭慶寺華嚴社主省常上人

夢幻吾身是偶然。勞生四十又三年。任誇西掖吟紅藥。何似東林種白蓮。入定雪龕燈焰直。講經霜殿磬聲圓。謫官不得餘杭郡。空寄僧高結社篇。

詩酒

白頭郎吏合歸耕。猶戀君恩典郡城。已覺功名乖素志。祇憑詩酒送浮生。剛腸減後微微諷。病眼昏來細細傾。樽杓不空編集滿。未能將此換公卿。

贈朱巖

未得科名鬢已衰。年年憔悴在京師。妻裝秋卷停燈坐。兒趁朝餐乞米炊。尙對交朋賒酒飲。偏看卿相借驢騎。誰憐所好還同我。韓柳文章李杜詩。巖妻能書

戲和壽州曾祕丞黃黃詩

黃黃真是小巫娥。買恐千金價不多。別母語嬌空有淚。對人聲顫未成歌。產從南國勝桃李。攜去東山隱薜蘿。滌上老郎無妓女。草玄讀易擬如何。

和朱巖留別依本韻

之子有文行。常流竊比難。揮毫秋露下。生文學餘力。尤工篆隸。開卷古風寒。場屋推盟主。聲詩立將壇。論儒輕五

伯。議古嫉三桓。師仰惟韓愈。才名壓李觀。生有師韓說。固窮多短褐。憂道即忘餐。見訪山園郡。相逢菊滿欄。眼

青憐造士。頭白愧郎官。罷舉層霄遠。監州勺水蟠。貧廚兼味少。市醞數杯酸。舊業煩君勸。新題爲我刊。爲生

予刊小畜集。又書八絕詩石。臨歧留雅什。天馬感金鑾。

歲暮感懷

歲暮山城放逐臣。老從霄漢委泥塵。公卿別後全無信。兄弟書來祇說貧。眼看青山休未得。鬢垂華髮摘空頻。文章氣槩成何事。霑惹虛名誤此身。

茶園十二韻

勤王修歲貢。晚駕過郊原。蔽芾餘千本。青葱共一園。牙新撐老葉。新牙之上。年舊葉尙在。去土軟迸新根。舌小侔黃

雀。毛獐摘綠猿。出蒸香更別。入焙火微溫。採近桐華節。生無穀雨痕。絨膝防遠道。進獻趁頭番。待破華胥

夢先經閩闔門。汲泉鳴玉甃。開宴壓瑤罇。茂育知天意。甄收荷主恩。沃心同直諫。苦口類嘉言。未復金鑾召。年年奉至尊。

寒食

寒食江都郡。青旗賣楚醪。樓臺藏綠柳。籬落露紅桃。妓女穿輕屐。笙歌泛小舸。使君慵不出。愁坐讀離騷。

牡丹十六韻

豔絕百花慚。花中合面南。賦詩情莫倦。中酒病先甘。國色渾無對。天香亦不堪。遮須施錦帳。戴好上瑤簪。苞拆深擎露。枝拖翠出藍。半傾留粉蝶。微亞摘宜男。鄰妓臨妝妒。胡蜂得蕊貪。忽行晴吹動。濃睡曉煙含。話別年經一。相逢月又三。遣誰擗白髮。爲爾換新衫。池館邀賓看。衙庭放吏參。仙娥喧道院。魔女逼禪庵。道院禪庵。皆公署內所有。亂折窠難惜。分題韻更探。歌歡殊未厭。零落痛曾諳。穀雨供湯沐。黃鸝助笑談。顏生如見此。未免也醺酣。顏回不飲酒。

芍藥開花憶牡丹

風雨無情落牡丹。翻階紅藥滿朱欄。明皇幸蜀楊妃死。縱有嬪嬙不喜看。

海仙花詩并序

海仙花者。世謂之錦帶。維揚人傳云。初得於海州山谷間。其枝長而花密。若錦帶然。其花未開。如海棠。

既開如木瓜。而繁麗孌弱過之。一朵滿頭。冠不克荷。惜其不香。而無子。第可鈎壓其條。移植他所。因以釋草釋木驗之。皆無有也。近之好事者。作花譜。以海棠爲花中神仙。予謂此花不在海棠下。宜以仙爲號。目之錦帶。俚俗甚焉。又取始得之地。名曰海仙。且賦詩三章。以存其名。題諸僧壁。

一堆絳雪壓春叢。孌孌長條弄晚風。借問開時何所似。似將繡被覆薰籠。

春憎窈窕教無子。天爲妖嬈不與香。盡日含毫難並比。花中應是衛莊姜。

何年移植在僧家。一簇柔條綴綵霞。錦帶爲名俚且俗。爲君呼作海仙花。

后土廟瓊花詩二首并序

楊州后土廟。有花一株。潔白可愛。且其樹大而花繁。不知實何木也。俗謂之瓊花云。因賦詩以狀其態。

誰移琪樹下仙鄉。二月輕冰八月霜。若使壽陽公主在。自當羞見落梅粧。

春冰薄薄壓枝柯。分與清香是月娥。忽似暑天深澗底。老松擎雪白娑婆。

芍藥詩并序

芍藥之義。見毛鄭詩。百花之中。其名最古。謝公直入中書省詩云。紅藥當堦翻。自後詞臣引爲故事。白少傅爲主客郎中。知制誥。有草詞畢詠芍藥詩。詞彩甚爲該備。然自天后以來。牡丹始盛。而芍藥之豔衰矣。考其實牡丹初號木芍藥。蓋本同而未異也。予以端拱己丑歲。由左司諫爲制誥舍人。後坐事黜

棄淳化甲午年。又以禮部員外郎。牽復舊職。尋以本官充翰林學士。則謝公白傅之任。皆蹂躪矣。自出滌上。移廣陵。追念綸闈。於今九載。而編集之內。未嘗有芍藥詩。言於詞臣。不得無過。揚州僧舍植數千本牡丹。落時繁豔可愛。因賦詩三章書於僧壁。

牡丹落盡正淒涼。紅藥開時醉一場。羽客諳傳尸解術。仙家重爇返魂香。蜂尋檀口論前事。露溼紅英試曉粧。曾忝掖垣真舊物。多情應認紫薇郎。

東君留着占殘春。得得遲開亦有因。曾與掖垣留故事。又來淮海伴詞臣。日燒紅豔排千朵。風遞清香滿四鄰。更愛綠頭弄金縷。異時相對掌絲綸。

滿院勻開似赤城。帝鄉齊點上元燈。感傷綸閣多情客。珍重維揚好事僧。酌處酒杯深蘸甲。拆來花朵細含稜。老郎爲郡辜朝寄。除卻吟詩百不能。

暮春

索寞紅芳又一年。老郎空解惜春殘。纔聞鶯囀誇楊柳。已被蟬聲哭牡丹。壯志休磨三尺劍。白頭誰藉兩梁冠。酒樽何必勞人勸。且折餘花更盡歡。

贈呂通祕丞楚州監倉

聞君公事苦喧卑。紅粟堆邊獨斂眉。已入朝行翻掌庾。未如畿尉且吟詩。君前任畿尉。堰頭笑傲同張祐。市裏

優游比路隨。惟有才名藏不得。山陽留滯肯多時。

贈省欽師師善八分書。太宗召於殿上。書數行。得賜紫衣。

舊隱何年別翠微。瀑泉聲外鎖禪扉。御前曾寫八分字。天上曾宣三事衣。燈照夜寒霜後冷。鼎烹秋菌雨中肥。終歸五老峯邊去。杯渡長江一錫飛。

送宋澥處士之長安

簪笏盈門獨紹蘭。臥龍潛在入龍間。鶴鷺惟稱處士閑。靜按仙經燒大藥。狂挨僧壁畫遙山。老郎見說休歸計。分取圭峯並掩關。

贈狀元先輩孫僅

病中何事忽開顏。記得詩稱小狀元。予淳化辛卯歲。贈君詩云。明年再就堯階試。應被人呼小狀元。粉壁乍懸龍虎榜。錦標終屬鶴鷺原。青雲隨步登花塔。紅雪飄衣醉御園。還有一條遺恨處。不教英俊在吾門。

贈浚儀朱學士

潘岳花陰覆杏壇。門生參謁絳紗寬。西垣久望神仙侶。北部休誇父母官。雨屐送僧莎逕滑。夜棋留客竹齋寒。何時僂直來相繼。三入承明興漸闌。

青猿

小僕如猿狖。貧家備指呼。未堪隨馬足。已慣典魚須。時洗塵侵硯。閒收雨滴圖。歸田如有計。留負酒胡蘆。
頃年謫官解梁。收得令狐補闕毛詩音義。其本乃會昌三年所寫。數行殘闕。後人添之。其筆跡乃工部畢侍郎所補也。昨因問之。乃云亡失多年矣。作四韻以還之。

謫宦山州自訓童。因求書籍有遭逢。偶收毛鄭古詩義。認得歐虞舊筆蹤。南郡攜行心不足。此本自解梁徵迴。便合
納上。尋值侍郎。入聖上幕府。不敢私謁。遂攜去滁揚二州。西齋送去手親封。塵侵煙染尤堪重。年號標題歷武宗。

伏日偶作

移牀施簟就南軒。門掩閑坊半樹蟬。多病形容只有骨。食貧生計旋無錢。掖垣已忝年深直。朝謁終妨日晏眠。會解綸闈求郡印。早收餘俸卜歸田。

贈密直張諫議

先皇憂蜀輟樞臣。獨冒兵戈出劍門。萬里辭家堪下淚。四年歸闕似還魂。弟兄次序元投分。兒女親情又結婚。且喜相逢開口笑。甘陳功業不須論。

送第三人朱嚴先輩從事和州

賃船東下歷陽湖。榜眼科名釋褐初。賓職不憂無厚俸。郡齋惟喜有藏書。伴吟先買秋江鶴。醒酒時烹晚市魚。廉使多情應問我。爲言衰病似相如。

對雪示嘉祐

去年看雪在商州。使君命我山寺頭。峯巒草樹六百里。飢颺凍鳥聲啾啾。山城窮陋無妓樂。何以銷得騷人愁。抱餅自瀉不待勸。乘興一引連十甌。晚歸上馬頗自適。狂吟醉舞夜不休。今年看雪在帝里。瑤臺瓊樹佳氣浮。朝回攬轡聊四望。移下五城十二樓。樽中有酒翻不飲。鬱鬱不快非怨尤。吾兒嬌駿未曉事。問我胡不私獻酬。因令把筆寫我意。爲渠吟作雪中謳。昔爲副使不理事。待罪且免憂人憂。今爲諫官非冗長。拾遺三館俸人優。秋來連澍百日雨。禾黍飄溺多不收。如今行潦占南畝。農夫失望無來甦。爾看門外飢餓者。往往殭殍填渠溝。峨冠旅進又旅退。曾無一事裨皇猷。俸錢一月數家賦。朝衣一襲幾人裘。安邊不學趙充國。富民不作田千秋。胡爲碌碌事文筆。歌時頌聖如俳優。一家衣食仰在我。縱得飽暖如狗偷。況我眼昏頭漸白。安能隱几勤校仇。何時提汝歸田去。賣馬可易數隻牛。深耕淺種苟自給。藜羹豆粥充飢喉。黍畦鋤理學元亮。瓜田澆灌師秦侯。素飧免作疲人蠹。開卷免對古人羞。未行此志吾戚戚。對酒不飲抑有由。斯言不敢向人道。語爾小子爲貽謀。

送晁監丞赴婺州關市之役

關征市賦糜賢俊。誰愛此官爲吏隱。將作晁丞于役時。婺女星臨海邊郡。黃絹辭高位尙卑。白華行潔身猶困。會待時來卽併伸。也知道在終無悶。君不見路隨含笑坐市中。屈身豈愧丹陽尹。又不見張生狂醉

戀揚州。冬瓜堰下甘肥遯。此行況是奉皇華。數丈輕舸載一家。攜餅下岸買竹葉。挂席背風穿蓼花。霜晴震澤初嘗橘。泉過惠山應試茶。虎丘曉露靈隱雪。錢塘夜潮照湖月。密排詩景在途中。旋吟新句教兒童。漸近金華見隼旗。五馬來迎使者車。應知驥足暫拘絆。八詠樓開頻啓宴。醉中官妓乞歌詩。剡溪紙貴抄新詞。他年誰獻子虛賦。召入金門五雲路。因思元白在江東。不似晁丞今獨步。

還揚州許書記家集許渾孫進家集得官

君不見近代詩家流。胡爲蹇滯多窮愁。孟郊憔悴死逆旅。浪仙斥逐長江頭。張生飄泊冬瓜堰。徒云輕薄萬戶侯。浩然無成鹿門去。李洞慟哭昭陵休。生無風教興王化。死無勳爵貽孫謀。可憐詩道日已替。風騷委地何人收。高陽許公精六義。獨向聖朝生後嗣。因將先集進九重。高步金臺曳珠履。祖德光輝聖主知。府尹賢明丞相子。時維揚權牧。故中令薛相子。卽廣陵郡大古九州。記室官清外三事。遂令天下學詩人。徒羨君家窮四始。我來迎侍遊江都。玳筵往往陪歡娛。遂求家集恣吟諷。海波乾處堆珊瑚。因思賈孟數家一何苦。詩鬼嗷嗷餒無主。子孫淪沒誰及君。閑倚紅蓮傾淥醕。草檄餘閑好賦詩。莫放風情忝爾祖。

酬處才上人

我聞三代淳且質。誰人熙熙誰信佛。茹蔬剃髮在西戎。梵法不敢干華風。周家子孫胡不肖。奢淫悖亂墮王道。秦皇漢帝又雜伯。亦以威刑取天下。蒼生哀苦不自知。從此中國羨西陲。無端更作金人夢。萬里迎

來萬民重爲君爲相。猶皈依。嚙嚙。誰敢非若教。卻似周公時。生民豈肯顧。披緇可憐。嗷嗷避征役。半入金田不耕織。君子之道動卽窮。亦有賢達藏其中。上人來自九華山。叩門遺我瓊瑤編。錚錚五軸餘百篇。定交仍以書爲先。書中不說經。文中不言佛。有心直欲興文物。感師自遠來相親。爲師畫卦成同人。出門無咎非羣分。袈裟墨綬何足云。

和馮中允爐邊偶作

誰爲東君掌青律。故將春日連人日。春日雨絲暖融融。人日雪花寒慄慄。雨雪寒暖苦不同。可比交情去就中。仲咸擁爐發歌詠。古風激破澆漓風。人情離合古來有。召公初亦疑周公。汾陽臨淮本仇隙。一旦分兵若親戚。四公翻覆人不譏。各各操心爲邦國。此外譁張多爲己。反掌背面如千里。張耳陳餘不忍言。魏其武安何足齒。我愛中允君子心。心與人交淡如水。別有人間勢利徒。一去一就隨榮枯。西漢董賢方佞倖。孔光迎拜卑如奴。是時楊雄在東觀。投閣欲死無人扶。有唐力士夫人死。朝士執喪平聲如喪妣。是時李白放江邊。憔悴無人供酒錢。小人之性何所似。真如蜂蝶并螻蟻。尋香逐臭苟朝昏。豈願松篁與蘭茝。重君誓心一何極。澗底松兮陵上柏。澗松陵柏有朽時。我約君心無改易。

烏啄瘡驢詩

商山老烏何慘酷。喙長於釘利於鏃。拾蟲啄卵從爾爲。安得殘我負瘡畜。我從去歲謫商于。行李惟存一

蹇驢來登秦嶺又巉岩。爲我馱背百卷書。穿皮露脊痕連腹。半年治療將平復。老鳥昨日忽下來。啄破舊瘡取新肉。驢號僕叫鳥已飛。劇鶩振毛坐吾屋。我驢我僕奈爾何。悔不挾彈更張羅。賴是商山多鷲鳥。便問鄰家借秋鷓。鐵爾拳兮鈎爾爪。折鳥頸兮食鳥腦。豈惟取爾飢腸飽。亦與瘡驢復仇了。

拍板謠

麻姑親採扶桑木。鏤脆排焦其數六。雙成捧立王母前。曾按瑤池白雲曲。幾時流落來人間。梨園部中齊管絃。管絃纔動我能應。知音審樂功何全。吳宮女兒手如筍。執向玳筵爲樂準。數聲慢仙人。屐齒下雲棧。老狐臘月渡黃河。緩步輕輕踏冰片。數聲急空江。雹打漁翁笠。鮫人泣對水精盤。滿把珠璣連瀉入。劃然一聲送曲徹。由基射透七重札。金壘冷落閭無聞。隴頭凍把泉聲絕。律呂與我數自齊。絲竹望我爲宗師。總驅節奏在術內。歌舞之人無我欺。所以唐相牛僧孺。爲文命之爲樂句。

筵上詩送侍棊衣襖天使

昔事先皇叨近侍。北門西掖華清地。太宗多材復多藝。萬機餘暇翻棊勢。對面千里爲第一。獨飛天蛾爲第二。第三海底取明珠。三陣堂堂皆御製。中侍宣來示近臣。天機祕密通鬼神。乃知棊法同軍法。旣戒貪心又嫌怯。惟宜靜勝守封疆。不樂窮兵用戈甲。先皇三勢有深旨。豈獨一杯而已矣。當時受賜感君恩。藏於篋笥傳子孫。至道年中出滌上。失腳青雲空悵望。移典維揚日望還。軒轅鼎成飛上天。龍髯忽斷攀不

得舊朝衣上淚潺湲。吾皇曲念先朝物。徵歸再掌西垣筆。悲涼忽見紅藥開。哭臨空隨梓宮出。去年領郡得齊安。山州僻陋在江干。黃民誰識舊學士。白頭猶在老郎官。昨日江邊天使到。隨例霑恩着衣襖。皇華本是江南客。久待先皇對棊弈。筵中偶說當年事。三勢分明皆記得。我從失職別上臺。御書深鎖不將來。遙想棊圖在私室。天香散盡空塵埃。今日因君聊話及。翻作停杯向隅泣。人生不易逢聖朝。君恩未報雙鬢凋。金鑾殿花春灼灼。永熙陵樹夜蕭蕭。空嘆拖腸在泥土。不如舐鼎升煙霄。多病相如猶未死。追思往事欲魂消。星使今辰迴馬首。強對離筵滿傾酒。悲歌一曲從事書。唱與朝中舊知友。

還楊遂蜀中集

上玄茫昧胡爲乎。施設吾道生吾徒。否多泰少是天意。生有述作死不虛。聖人憂患方演易。賢者窮愁始著書。盡令富貴陷逸樂。蠢蠢戢戢如雞豬。泯然無物作時瑞。誰識鳳皇與騶虞。經史子集燦今古。粉繪帝道張皇謨。一言可採卽不朽。名姓張與日月俱。乃知天心厚我輩。窮辱不足形悲呼。夫君擢秀在江左。國小而逼何區區。科名始得值兵火。金陵坐見成丘墟。歸朝纔得一贊善。黜降重爲縣大夫。彰明僻遠在蜀道。又遇祿賊攻成都。徒行抱印入隴氏。乞食夷落何崎嶇。歸來朝責作主簿。朱衣暗淡髣髴毛疎。昨朝投我蜀中作。錚然一集如瓊琚。杜甫悲竄吟不輟。庾信悲哀情有餘。我逢聖代自多難。謾誇三入承明廬。近令編綴小畜集。文筆詩賦何紛如。才名官職不兩立。真宰折刻分毫銖。郎官疎遠旣未貴。縣吏禮數不足拘。

宋詩鈔初集

相逢且說文章樂。爲君酌酒焚枯魚。

騎省集鈔

徐鉉字鼎臣。會稽人。與弟鍇未弱冠。以文行稱。仕南唐三主。歷官至吏部尚書右僕射。機命制誥咸出其手。文章議論與韓熙載齊名。宋問罪江南。請使見太祖。乞存辨論。不屈。太祖亦嘉禮之。後隨後主歸宋。授太子率更令。改左散騎常侍。累封東海郡開國侯。檢校工部尚書。卒年七十六。精於篆隸。修許氏說文。自撰韻譜。江南馮延巳曰。凡人爲文。皆事奇語。不爾則不足觀。惟徐公率意而成。自造精極。詩治衍適麗。具元和風律。而無洩忍纖阿之習。初嗣主以讒貶移饒州。適周世宗兵過淮。鉉卽榜小舟歸昇州。賦詩有云。一夜黃星照官渡。本初何面見田豐。其伉直如此。大梁以後。氣稍衰。萃矣。蓋情鬱爲聲。悽楚宛折。則難言之意多焉。

寒食宿陳公塘上

垂楊界官道。茅屋倚高坡。月下春塘水。風中牧豎歌。折花閒立久。對酒遠情多。今夜孤亭夢。悠揚奈爾何。

登甘露寺北望

京口潮來曲岸平。海門風起浪花生。人行沙上見日影。舟過江中聞櫓聲。芳草遠迷楊子渡。宿煙深映廣陵城。游人鄉思應如橘。相望須含兩地情。

京口江際弄水

退公求靜獨臨川。楊子江南二月天。百尺翠屏甘露閣。數帆晴日海門船。波澄瀨石寒如玉。草接汀蘋綠似煙。安得乘槎更東去。十洲風外弄潺湲。

重遊木蘭亭

繚繞長堤帶碧潭。昔年遊此尙青衿。蘭橈破浪城陰直。玉勒穿花苑樹深。宦路塵埃成久別。仙家風景有誰尋。那知年長多情後。重凭闌干一獨吟。

送魏舍人仲甫爲蘄州判官

從事蘄春興自長。蘄人應識紫微郎。山資足後拋名路。蕘菜秋來憶故鄉。以道卷舒猶自適。臨戎談笑固無妨。如聞郡閣吹橫笛。時望青谿憶野王。

宿蔣帝廟明日遊山南諸寺

便返城闈尙未甘。更從山北到山南。花枝似雪春雖半。桂魄如眉日始三。松蓋遮門寒黯黯。柳絲妨路翠穆穆。登臨莫怪偏留戀。遊宦多年事事諳。

愛敬寺有老僧嘗遊長安言秦雍間事歷歷可聽因贈此詩兼示同行客

白首棲禪者。嘗談灞滻遊。能令過江客。偏起失鄉愁。室倚桃花崦。門臨杜若洲。城中無此景。將子剩淹留。

和殷舍人蕭員外春雪

萬里春陰乍履端。廣庭風起玉塵乾。梅花嶺上連天白。蕙草塔前特地寒。晴去便爲經歲別。興來何惜徹宵看。此時鴛侶皆閒暇。贈答詩成禁漏殘。

從兄龍武將軍歿於邊戍過舊營宅作

前年都尉沒邊城。帳下何人領舊兵。徼外瘴煙沉鼓角。山前秋日照銘旌。笙歌卻返烏衣巷。部曲皆還細柳營。今日園林過寒食。馬蹄猶擬入門行。

景陽臺懷古六言

後主亡家不悔。江南異代長春。今日景陽臺上。閑人何用傷神。

寄駕部郎中瞻

賤子乖慵性。頻爲省直牽。交親每相見。多在相門前。君獨疎名路。爲郎過十年。炎風久成別。南望思悠然。

秋日雨中與蕭贊善訪殷舍人於翰林座中作

野出西垣步步遲。秋光如水雨如絲。銅龍樓下逢閑客。紅藥塔前訪舊知。亂點乍滋承露處。碎聲因想滴蓬時。銀臺鎖入須歸去。不惜餘歡盡酒卮。

和明道人宿山寺

聞道經行處。山前與水陽。磬聲深小院。燈影迥高房。落宿依樓角。歸雲擁殿廊。羨師閑未得。早起逐班行。

晚歸

暑服道情出。煙街薄暮還。風清飄短袂。馬健弄連環。水靜聞歸櫓。霞明見遠山。過從本無事。從此涉旬間。

除夜

寒燈耿耿漏遲遲。送故迎新了不欺。往事并隨殘曆日。春風寧識舊容儀。預慚歲酒難先飲。更對鄉儺羨小兒。吟罷明朝贈知己。便須題作去年詩。

正月初答鍾郎中見寄

高齋遲景雪初晴。風拂喬枝待早鶯。南省郎官名籍籍。東鄰妓女字英英。流年倏忽成陳事。春物依稀有舊情。新歲相思自過訪。不煩虛左遠相迎。

江舍人宅筵上有妓唱和州韓舍人歌辭因以寄

良宵絲竹偶成歡。中有佳人俯翠鬟。白雪飄飄傳樂府。阮郎憔悴在人間。清風朗月長相憶。佩蕙紉蘭早晚還。深夜酒空筵欲散。向隅惆悵髮堪斑。

寒食日作

廚冷煙初禁。門閑日更斜。東風不好事。吹落滿庭花。過社紛紛燕。新晴淡淡霞。京都盛遊觀。誰訪子雲家。

賀殷游二舍人入翰林江給事拜中丞

清晨待漏獨徘徊。霄漢懸心不易裁。閣老深嚴歸翰苑。夕郎威望拜霜臺。青綾對覆蓬壺晚。赤棒前驅道路開。猶有西垣廳記在。莫忘同草紫泥來。

送歐陽大監遊廬山

家家門外廬山路。唯有夫君乞假遊。案牘乍拋公署晚。林泉已近洞天秋。海潮盡處逢陶石。江月圓時上庾樓。此去蕭然好長往。人間何事不悠悠。

秋日廬龍村舍

置卻人間事。閒從野老遊。樹聲村店晚。草色古城秋。獨鳥飛天外。閑雲度隴頭。姓名君莫問。山木與虛舟。

和蕭郎中小雪日作

征西府裏日西斜。獨試新爐自煮茶。籬菊盡來低覆水。寒鴻飛去遠連霞。寂寥小雪閑中過。斑駁輕霜鬢上加。算得流年無奈處。莫將詩句祝蒼華。

中書相公谿亭閑宴依韻

李建勳

雨霽秋光晚。亭虛野興迴。沙鷗掠岸去。溪水上塔來。客傲風欹幘。筵香菊在杯。東山長許醉。何事憶天台。

寄饒州王郎中效李白體

珍重王光嗣。交情尙在不。蕪城連宅住。楚塞並車游。別後官三改。年來歲六周。銀鈎無一字。何以緩離愁。

寄歙州呂判官

任公郡占好山川。谿水縈迴路屈盤。南國自來推勝境。故人此地作郎官。風光適意須留戀。祿秩資貧且喜歡。莫憶班行重迴首。是非多處是長安。

宣威苗將軍貶官後重經故宅

蔣山南望近西坊。亭館依然鑲院牆。天子未嘗過細柳。將軍尋已戍燉煌。史萬歲嘗謫戍燉煌。欵傾怪石山無色。零落圓荷水不香。爲將爲儒皆寂寞。門前愁殺馬中郎。

附池州薛郎中書因寄歙州張員外

新安從事舊臺郎。直氣多才不可忘。一旦江山馳別夢。幾年簪紱共周行。岐分出處何方是。情共窮通此義長。因附鄰州寄消息。接輿今日信爲狂。

寄江都路員外

吾兄失意在東都。聞說襟懷任所如。已縱乖慵爲傲吏。有何關鍵制豪胥。縣齋曉閉多移病。南畝秋荒憶遂初。知道故人相憶否。嵇康不得嬾修書。

送應之道人歸江西

會騎竹馬傍洪崖。二十餘年變物華。客夢等閒過驛閣。歸帆遙羨指龍沙。名題小篆矜垂露。詩作吳吟對綺霞。歲暮定知迴未得。信來憑爲寄梅花。

臨石步港

碕岸隳縈帶。微風起細漣。綠陰三月後。倒影亂峯前。吹浪游鱗小。黏苔碎石圓。會將腰下組。換取釣魚船。

病題二首

性靈慵懶百無能。唯被朝參遣夙興。聖主優容恩未答。丹經疎闊病相陵。脾傷對客偏愁酒。眼暗看書每愧燈。進與時乖不知退。可憐身計謾騰騰。

人間多事本難論。况是人間懶慢人。不解養生何怪病。已知命敢辭貧。向空咄咄煩書字。與世滔滔莫問津。金馬門前君識否。東方曼倩是前身。

寄江州蕭給事

夕郎憂國不憂身。今向天涯作逐臣。魂夢暗馳龍闕曙。嘯吟閑繞虎谿春。朝車載酒過山寺。諫紙題詩寄野人。惆悵懦夫何足道。自離羣後已同塵。

和州酬江中丞見寄

賈傅南遷久。江關道路遙。北來空見雁。西去不如潮。鼠穴依城社。鴻飛在泐寥。高低各有處。不擬更相招。

和鍾郎中送朱先輩還京垂寄

分司洗馬無人問。詞客殷勤輒棹過。蒼蘚滿庭行徑小。高梧臨檻雨聲多。春愁盡付千杯酒。鄉思遙聞一曲歌。且共勝遊消永日。西岡風物近如何。

送郝郎中爲浙西判官

大藩從事本優賢。幕府仍當北固前。花繞樓臺山倚郭。寺臨江海水連天。恐君到卽忘歸日。憶我遊曾歷二年。若許他時作閑伴。殷勤爲買釣魚船。

陪王庶子遊後湖涵虛閣

東宮園

懸圃清虛乍過秋。看山尋水上茲樓。輕鷗的的飛難沒。紅葉紛紛晚更稠。風卷微雲分遠岫。浪搖晴日照中州。躋攀况有承華客。如在南皮奉勝遊。

柳枝辭十二首

把酒憑君唱柳枝。也從絲管遽相隨。逢春只合朝朝醉。記取秋風葉落時。南園日暮起春風。吹散楊花雪滿空。不惜楊花飛也得。愁君老盡臉邊紅。陌上朱門柳映花。簾鉤半捲綠陰斜。憑郎暫駐青驄馬。此是錢塘小小家。夾岸朱顏柳映樓。綠波平幔帶花流。歌聲不出長條密。忽地風回見綵舟。

老大逢春。憶恨春。綠楊陰裏最愁人。舊遊一別無因見。嫩葉如眉。處處新。
濃濃堤岸柳含煙。疑是陽和二月天。醉裏不知時節改。漫隨兒女打鞦韆。
水閣春來乍減寒。曉妝初罷倚欄干。長條亂拂春波動。不許佳人照影看。
柳岸煙昏醉裏歸。不知深處有芳菲。重來已見花飄盡。惟有黃鶯嘯樹飛。
此去仙源不是遙。垂楊深處有朱橋。共君同過朱橋去。密映垂楊聽洞簫。
暫別楊洲十度春。不知光景屬何人。一帆歸客千條柳。腸斷東風楊子津。
仙樂春來按舞腰。清聲偏似傍嬌嬈。應緣鸚舌多情賴。長向雙成說翠條。
鳳笙臨檻不能吹。舞袖當筵亦自疑。唯有美人多意緒。解衣芳態畫雙眉。

貶官秦州出城作

浮名浮利信悠悠。四海干戈痛主憂。三諫不從爲逐客。一身無累似虛舟。
滿朝權貴皆曾忤。繞郭林泉已徧遊。惟有戀恩終不改。半程猶自望城樓。

過江

別路知何極。離腸有所思。登艫望程遠。搖櫓過江遲。斷岸煙中失。長天水際垂。
此心非橘柚。不爲兩鄉移。

贈維揚故人

東京少長認維桑。書劍誰家入帝鄉。一事無成空放逐。故人相見重淒涼。樓臺寂寞官河晚。人物稀疏驛路長。莫怪臨風惆悵久。十年春色憶維揚。

秦州道中卻寄東京故人

風緊雨淒淒。川迴岸漸低。吳州林外近。隋苑霧中迷。聚散紛如此。悲歡豈易齊。料君殘酒醒。還聽子規啼。

得浙西郝判官書未及報聞燕王移鎮京口因寄此詩問方判官田書記消息

秋風海上久離居。曾到劉公一紙書。淡水心情長若此。銀鈎蹤跡更無如。嘗憂座側飛鴉鳥。未暇江中覓鯉魚。今日京吳建朱邸。問君誰共曳長裾。

王三十七自京垂訪作此送之

失鄉遷客在天涯。門揜苔垣向水斜。只就鱗鴻求遠信。敢言車馬訪貧家。烟生柳岸將垂縷。雪壓梅園半是花。惆悵明朝樽酒散。夢魂相送到京華。

寒食成判官垂訪因贈

常年寒食在京華。今歲清明在海涯。遠巷蹋歌深夜月。隔牆吹管數枝花。鴛鴦得路音塵闊。鴻雁分飛道里賒。不是多情成二十。斷無人解訪貧家。

送客至城西望圖山因寄浙西府中

枚叟鄒生笑語同。莫嗟江上聽秋風。君看逐客思鄉處。猶在圖山更向東。

九日雨中

茱萸房重雨霏微。去國逢秋此恨稀。目極暫登臺上望。心遙長向夢中歸。茶蘼路遠愁霜早。兄弟鄉遙羨雁飛。唯有多情一枝菊。滿杯顏色自依依。

寄外甥苗仲武

放逐今來瘴海邊。親情多在鳳臺前。且將聚散爲閑事。須信華枯是偶然。蟬噪疎林村倚郭。烏飛殘照水連天。此中惟欠韓康伯。共對秋風詠數篇。

寄從兄憲兼示二弟

別路吳將楚。離憂弟與兄。斷雲驚晚吹。秋色滿孤城。信遠鴻初下。鄉遙月共明。一枝棲未穩。回首望三京。附書與鍾郎。中因寄京妓越賓。

暮春橋下手封書。海陵橋名。寄向江南問越姑。不道諸郎少歡笑。經年相別憶儂無。

亞元舍人不替深知。猥貽佳作三篇。清絕不敢輕酬。因爲長歌。聊以爲報。未竟復得子喬校書示問。故兼寄陳君庶資一笑耳。

海陵城裏春正月。海畔朝陽照殘雪。城中有客獨登樓。遙望天邊白銀闕。天帝以黃金白銀爲宮闕。白雲闕下何英

英雕鞍繡轂趨承明。閭門曉闕旌旗影。玉墀風細佩環聲。此處追飛皆俊彥。當年何事容疵賤。懷鋁晝坐紫微宮。焚香夜直明光殿。王言簡靜官司閑。朋好殷勤多往還。新亭風景如東洛。卽嶺林泉似北山。光陰暗度盃盂裏。職業未妨談笑間。有時邀賓復攜妓。造門不問都非是。酣歌叫笑驚四鄰。賦筆縱橫動千字。任他銀箭轉更籌。不怕金吾司夜吏。可憐諸貴賢且才。時情物望兩無猜。伊余獨稟狂狷性。褊量多言仍薄命。吞舟可漏豈無恩。負乘自貽非不幸。一朝削跡爲遷客。旦暮青雲千里隔。離鴻別鴈各分飛。折柳攀花兩無色。盧龍渡口問迷津。瓜步山前送暮春。去年三月三十日瓜步阻風。白沙江上曾行路。青林花落何紛紛。漢皇昔幸回中道。昇中廽駕東元遊之路。極目牛羊臥芳草。舊宅重游盡隙荒。故人相見多衰老。禪智寺山光橋風瑟瑟。今雨蕭蕭行杯已醒殘。夢斷征途未極離魂消。海陵郡中陶太守。相逢本是隨行舊。乍申拜起已開眉。卻問辛勤還執手。精廬外樹最清幽。一稅征車聊駐留。閉門思過謝來客。知恩省分寬離憂。郡齋勝境有後池。山亭茵閣互參差。有時虛左來相召。舉白飛觴任所爲。多才太守能搥鼓。醉送金船問歌舞。酒酣耳熱眼生花。暫似京華歡會處。歸來旅館還端居。清風朗月夜窗虛。駸駸流景歲云暮。天涯望斷故人書。春來憑檻方歎息。仰頭忽見南來翼。足繫紅綫墮我前。引頸長鳴如有言。開緘試讀相思字。乃是多情喬亞元。短韻三篇皆麗絕。小梅寄意情偏切。亞元詩云。借問小梅應得信。春風新自海邊來。此篇尤嘉。金蘭投分一何堅。銀鈎置袖終難滅。醉後狂言何足奇。感君知己不相遺。長卿曾作美人賦。玄成今有責躬詩。茲去春醉中贈醉妓長歌。酷爲喬君所賞。來篇

所引。故以謝之。報章欲託還京信。筆拙紙窮情未盡。珍重芸香陳子喬。亦解貽書遠相問。寧須買藥療羈愁。只恨無書消鄙客。子喬問藥物所要。又問置書。故有此句。游處當時靡不同。歡娛今日兩成空。天子尙應憐賈誼。時人未要嘲楊雄。曲終筆閣緘封已。翩翩驛騎行塵起。寄向中朝謝故人。爲說相思意如此。

送蒯司錄歸京

早年聞有蒯先生。二十餘年道不行。抵掌曾論天下事。折腰猶悟俗人情。老還上國歡娛少。貧聚歸資結束輕。遷客臨流倍惆悵。冷風黃葉滿山城。

還過東都留守周公筵上贈座客

賈生三載在長沙。故友相思道路賒。已分中年甘寂寞。豈知今日返京華。麟符上相恩偏厚。隨苑留歡日欲斜。明旦江頭倍惆悵。遠山芳草映殘霞。

送楊郎中唐員外奉使湖南

江邊微雨柳條新。握節含香二使臣。兩綬對懸雲夢日。方舟齊泛洞庭春。今朝草木逢新歷。昨日山川滿戰塵。同是多情懷古客。不妨爲賦弔靈均。

和表弟包穎見寄

平生中表最情親。浮世那堪聚散頻。謝眺卻令歸省閣。劉楨猶自臥漳濱。舊遊半似前生事。要路多逢後

進人且喜新吟報強健。明年相望杏園春。

使浙西先寄燕王侍中

京江風靜喜乘流。極目遙瞻萬歲樓。喜氣龍葱甘露晚。水煙波淡海門秋。五年不見鸞臺長。明日將陪兔苑遊。欲問平津門下吏。相君還許吐茵不。

驛中七夕

七夕雨初霽。行人正憶家。江天望河漢。水館折蓮花。獨坐涼何甚。微吟月易斜。今年不乞巧。鈍拙轉堪嗟。

贈浙西顧推官

盛府賓寮八十餘。閉門高臥興無如。梁王苑裏相逢早。潤浦城中得信疏。狼籍盃盤重會面。風流才調一如初。願君百歲猶強健。他日相尋隱士廬。

邵伯埭下寄南郵陳郎中

故人相別動經年。候館相逢倍慘然。顧我飲冰難輟棹。感君扶病爲開筵。河灣水淺翹秋鷺。柳岸風微噪暮蟬。欲識酒醒魂斷處。謝公祠畔客亭前。

謫居舒州累得韓高二舍人書作此寄之

三峯煙靄碧臨谿。中有騷人理釣絲。會友少於分袂日。謫居多卻在朝時。丹心歷歷吾終信。俗慮悠悠爾

不知珍重韓君與高子。殷勤書札寄相思。

舒人以潛曉天柱爲三峯。

和張先輩見寄二首

去國離羣擲歲華。病容憔悴媿丹砂。谿連舍下衣長潤。山帶城邊日易斜。幾處垂鈎依野岸。有時被褐到鄰家。故人書札頻相慰。誰道西京道路賒。

清時淪放在山州。邛杖紗巾處處遊。野日蒼茫悲鷓舍。水風陰濕弊貂裘。雞鳴候旦寧辭晦。松節凌霜幾換秋。兩首新詩千里道。感君情分獨知丘。

印秀才至舒州見尋別後寄詩依韻和

羈游白社身雖屈。高步詞場道不卑。投分共爲知我者。相尋多媿謫居時。離懷耿耿年來夢。厚意勤勤別後詩。今日谿邊正相憶。雪晴山秀柳絲垂。

送彭秀才

賈生去國已三年。短褐閑行皖水邊。盡日野雲生舍下。有時京信到門前。無人與和投湘賦。媿子來浮訪戴船。滿袖新詩好回去。莫隨騷客醉林泉。

移饒州別周使君

正憐東道感賢侯。何幸南冠脫楚囚。皖伯臺前收別宴。喬公亭下艤行舟。四年去國身將老。百郡徵兵主

尙憂更向鄱陽湖上去。青衫憔悴淚交流。

避難東歸依韻和黃秀才見寄

感感逢人問所之。東流相送向京畿。自甘逐客紉蘭佩。不料平民著戰衣。樹帶荒村春冷落。江澄霽色霧霏微。時危道喪無才術。空手徘徊不忍歸。

酬郭先輩

太原郭夫子。行高文炳蔚。弱齡負世譽。一舉游月窟。及我竄羣舒。向風心鬱鬱。歸來暮江上。雲霧一披拂。雷雨不下施。猶作池中物。念君介然氣。感時思奮發。示我數篇文。與我爭馳突。綵褥粲英華。理深刮肌骨。古詩尤精奧。史論皆宏拔。舉此措諸民。何憂民不活。吁嗟吾道薄。與世長迂闊。顧我徒有心。數奇身正拙。論兵屬少年。經國須儒術。夫子無自輕。蒼生正愁疾。

和集賢鍾郎中

石渠册府神仙署。當用明朝第一人。腰下別懸新印綬。座中皆是故交親。龍池樹色供清景。浴殿香風接近鄰。從此翻飛應更遠。徧尋三十六天春。

送黃梅江明府

江前爲江夏令。有善政。今更宰小邑。賦詩留別。作此和之。

封疆多難正經綸。臺閣如何不用君。江上又勞爲小邑。篋中徒自有雄文。書生膽氣人誰信。遠俗歌謠主

不聞一首新詩無限意。再三吟詠向秋旻。

和蕭郎中午日見寄

細雨輕風采藥時。褰簾隱几更何爲。豈知澤畔紉蘭客。來赴城中角黍期。多罪靜思如剉槩。救書纔聽似含飴。謝公制勝常閑暇。願接西州敵手碁。

送黃秀才姑熟辟命

世亂離情苦。家貧色養難。水雲孤棹去。風雨暮春寒。幕府才方急。騷人淚未乾。何時王道泰。萬里看鵬搏。

送王四十五歸東都

海內兵方起。離筵淚易垂。憐君負米去。惜此落花時。想憶看來信。相寬指後期。殷勤手中柳。此是向南枝。

夢游三首

魂夢悠揚不奈何。夜來還在故人家。香濛蠟燭時時暗。戶映屏風故故斜。檀的慢調銀字管。雲鬢低綴折枝花。天明又作人間別。洞口春深道路賒。

繡幌銀屏香靄間。若非魂夢到應難。牕前人靜偏宜夜。戶內春濃不識寒。蘸甲遞觴纖似玉。含詞忍笑膩於檀。錦書若要知名字。滿縣花開不姓潘。

南國佳人字玉兒。芙蓉雙臉遠山眉。仙郎有約長相憶。阿母無猜不得知。夢裏行雲還倏忽。暗中攜手乍

疑遲。因思別後閑牕下。織得迴文幾首詩。

和翰長聞西樞副翰隣居夜晏

開筵別有隣居興。卜夜應憐禁漏長。舊友不期爭命駕。新姬憑寵剩傳觴。香煙結霧籠金鴨。燭焰成花照杏梁。京邑衣冠多勝賞。鱸魚爭敢道思鄉。

和清源太保寄湖州潘郎中

老大離羣一倍愁。谿山風物且淹留。醞成春酒誰斟酌。抄得新書自校讎。莫似牧之矜曠達。須教子重讓風流。恩門舊分知難忘。題取新詩上郡樓。

送蒯員外東遊舊治

百歲猶強健。知君卽地仙。孤飛下華表。太息問桑田。故吏今誰在。高名昔共傳。伊余亦遺老。相送一潸然。

送王監丞之歷陽

歎息曾遊處。江邊故郡城。青襟空皓首。往事似前生。綠綬君重綰。華簪我尙榮。年衰俱近道。莫話別離情。

奉和武功學士舍人寄贈文懿大師

舊國荒涼成黍稷。故交危脆似琉璃。高人獨喜湯師在。手把新文數道碑。文似春花鋪曉陌。思如泉涌注長江。詩情道性知無夢。頻見殘燈照曙牕。

已潔心源超世表。卻緣詩句有時名。初聞行業如蒼宿。及見容顏是後生。

和錢祕監與邊

筵上詩題共筆牀。罇前酒興話高陽。心清自覺官曹簡。院靜先知節候涼。南國少年推貴重。東堂前輩讓賢良。好看雙鳳追飛處。胡粉新塗紫界牆。

送周郎中還司

憶在廬山始識君。當時唯擬共眠雲。那知身計關前定。卻向人間逐世紛。紫閣峯前欣欲往。銀臺門裏歎離羣。青囊舊有登真訣。莫遣閑人取次聞。

送高先輩南歸

鄉國悲前事。風光屬後生。名從天上得。身入故都行。草色初裁綬。鵬飛不算程。自憐枯朽思。相送剩含情。

送曾秀才

塗水神仙宅。仙山夾縣樓。吾孫好詩句。歸詠故鄉秋。紫竹遮書幌。紅蕉拂釣舟。東堂有平路。莫謁外諸侯。

寄玉笥山沈道士

珍重江南沈鍊師。未曾相識久相思。已全真氣能從俗。不墜家風善賦詩。玉笥共遊知早晚。金貂回顧覺喧卑。多慚書札遙相問。更望刀圭換白髭。

和蕭少卿見慶新居

湘浦懷沙已不疑。京城賜第豈前期。鼓聲到晚知坊遠。山色來多與靜宜。簪履尙應憐故物。稻梁空自媿華池。新詩問我偏饒思。還念鷓鴣得一枝。

又和

驚蓬偶駐知多幸。斷鴈重聯愜素期。當戶小山如舊識。上牆幽蘚最相宜。清風不去因栽竹。隙地無多也鑿池。更喜良隣有佳樹。綠陰分得近南枝。

送彭秀才南遊

問君孤棹去何之。玉筍春風楚水西。山上斷雲分翠靄。林間晴雪入澄溪。琴心酒趣神相會。道士仙童手共攜。他日時清更隨計。莫如劉阮洞中迷。

和明上人除夜見寄

酌酒圍爐久。愁襟默自增。長年逢歲暮。多病見兵興。夜色開庭燎。寒威入硯冰。湯師無別念。吟坐一燈凝。

送從兄赴臨川幕

梁王籍寵就東藩。還召鄒枚坐兔園。今日好論天下事。昔年曾受主人恩。石頭城下春潮滿。金柅亭邊綠樹繁。唯有音書慰離別。一杯相送別無言。

送陳先生之洪井寄蕭少卿

聞君仙袂指洪崖。我憶情人別路賒。知有歡娛遊楚澤。更無書札到京華。雲開驛閣連江靜。春滿西山倚漢斜。此處相逢應見問。爲言搔首望龍沙。

送龔明府九江歸寧

茂宰隨官去。扁舟著綵衣。溢城春酒熟。廬阜野花稀。解纜垂楊綠。開帆宿鷺飛。一朝吾道泰。還逐落潮歸。

和江西蕭少卿見寄二首

亡羊岐路媿司南。二紀窮通聚散三。老去何妨從笑傲。病來看欲嬾朝參。離腸似線常憂斷。世態如湯不可探。珍重加飡省思慮。時時斟酒壓山嵐。

身遙上國三千里。名在朝中二十春。金印不須辭入幕。麻衣曾此歎迷津。卷舒由我真齊物。憂喜忘心卽養神。世路風波自翻覆。虛舟無計得沈淪。

晚憩白鶴廟寄句容張少府

日入林初靜。山空暑更寒。泉鳴細巖竇。鶴唳眇雲端。拂榻安碁局。焚香戴道冠。望君如不見。終夕凭欄干。

題紫陽觀

南朝名士富仙才。追步東鄉遂不迴。丹井自深桐暗老。祠宮長在鶴頻來。巖邊桂樹攀仍倚。洞口桃花落

復開。惆悵霓裳太平事。一函真跡鎖昭臺。

贈奚道士名含象

奚生曾有洞天期。猶傍天壇摘紫芝。處世自能心混沌。全真誰見德支離。玉霄壁閉人長在。金鼎功成俗未知。他日鸞輪謁茅許。願同雞犬去相隨。

題白鶴廟

平生心事向玄關。一入仙鄉似舊山。白鶴唳空晴渺渺。丹砂流澗莫潺潺。嘗嗟多病嫌中藥。擬問真經乞小還。滿洞煙霞互陵亂。何峯臺榭是蕭閑。

奉和七夕應令

今宵星漢共晶光。應笑羅敷嫁侍郎。斗柄易傾離恨促。河流不盡後期長。靜聞天籟疑鳴佩。醉折荷花想豔粧。誰見宣猷堂上宴。一篇清韻振金鐙。

又和八日

微雲疎雨淡新秋。曉夢依稀十二樓。故作別離應有以。擬延更漏共無由。那教人世長多恨。未爲天仙不解愁。博望苑中殘酒醒。香風佳氣獨遲留。

和印先輩及第後獻座主朱舍人郊居之作

成名郊外掩柴扉。樹影蟬聲共息機。積雨暗封青蘚徑。好風輕透白練衣。嘉魚始賦人爭誦。荆玉頻收國自肥。獨坐公廳正煩暑。喜吟新詠見玄微。印以南有嘉魚賦及第。

和致仕張尚書新創道院

梓澤成新致。金丹有舊情。挂冠朝睡足。隱几暮江清。藥圃分輕綠。松窗起細聲。養高寧厭病。默坐對諸生。尚書時有瘖疾。

和尉遲贊善秋暮僻居

登高節物最堪憐。小嶺疎林對檻前。輕吹斷時雲縹緲。夕陽明處水澄鮮。江城秋早催寒事。望苑朝稀足晏眠。庭有菊花樽有酒。若方陶令媿猶賢。

陪鄭王相公賦簷前垂冰應教依韻

牕外虛明雪乍晴。簷前垂靄盡成冰。長廊瓦疊行行密。晚院風高寸寸增。玉指乍拈簷尚愧。金塔時墜磬難勝。晨飡堪醒曹參酒。自恨空腸病不能。

和尉遲贊善病中見寄

仙郎移病暑天過。卻似冥鴻避罽羅。晝夢乍驚風動竹。夜吟時覺露霑莎。情親稍喜貧居近。性懶猶嫌上直多。望苑恩深期勿藥。青雲歧路未蹉跎。

池州陳使君見示游齊山詩因寄

往歲曾遊弄水亭。齊峯濃翠暮軒橫。哀猿出檻心雖喜。傷鳥聞弦勢易驚。病後簪纓殊寡興。老來泉石倍關情。今朝池口風波靜。遙賀山前有頌聲。

再領制誥和王明府見賀

蹇步還依列宿邊。拱宸重認舊雲天。自嗟多難飄零困。不似當年膽氣全。雞樹晚花疎向日。龍池輕浪細含煙。從來不解爲身計。一葉悠悠任大川。

和方泰州見寄

逐客栖栖重入京。舊愁新恨兩難勝。雲收楚塞千山雪。風結秦淮一尺冰。置禮筵空情豈盡。投湘文就思如凝。更殘月落知孤坐。遙望船窗一點星。

奉使九華山中塗遇青陽薛郎中

故人相別動相思。此地相逢豈素期。九子峯前閑未得。五谿橋上坐多時。甘泉從幸余知忝。宣室徵還子未遲。且喜一杯消別恨。野花風起便離披。

南都遇前嘉魚劉令言游閩嶺作此與之

我持使節經韶石。君作閑遊過武夷。兩地山光成獨賞。隔年鄉思暗相知。洪崖壇上長岑寂。孺子亭前自

別離。珍重分岐一杯酒。強加澆飯數吟詩。

廬陵別朱觀先輩

桂籍知名有幾人。翻飛相續上青雲。解憐才子寧唯我。遠作卑官尙見君。嶺外獨持嚴助節。官中誰薦長卿文。新詩試爲重高詠。朝漢臺前不可聞。

文彘少卿。文山郎中。交好深至。二紀已餘。睽別數年。二子長逝。奉使嶺南。塗次南康。弔孫氏之孤于其家。覩文彘手書於僧舍。慷慨悲歌。留題此詩。

孫家虛座弔諸孤。張叟僧房見手書。二紀歡遊今若此。滿衣零淚欲何如。腰間金印從如斗。鏡裏霜華已滿梳。珍重遠公應笑我。塵心唯此未能除。

奉和右省僕射西亭高臥作

院靜蒼苔積。庭幽怪石欹。蟬聲當檻急。虹影向簷垂。晝漏猶憐永。叢蘭未覺衰。竦篁巢翡翠。折葦覆鸕鷀。對酒襟懷曠。圍碁旨趣遲。景皆隨所尙。物各遂其宜。道與時相會。才非世所羈。賦詩貽坐客。秋事爾何悲。

柳枝詞十首座中應制

金馬詞臣賦小詩。梨園弟子唱新詞。君恩還似東風意。先入靈和蜀柳枝。百草千花共待春。綠楊顏色最驚人。天邊雨露年年在。上苑芳華歲歲新。

長愛龍池二月時。毵毵金線弄春姿。假饒葉落枝空後。更有梨園笛裏吹。
綠水成文柳帶搖。東風初到不鳴條。龍舟欲過偏留戀。萬縷輕絲拂御橋。
百尺長條沈麴塵。詩題不盡畫難真。憑君折向人間種。還似君恩處處春。
風暖雲開晚照明。翠條深映鳳凰城。人間欲識靈和態。聽取新詩玉管聲。
醉折垂楊唱柳枝。金城三月走金羈。年年爲愛新條好。不覺蒼華也是絲。
新春花柳競芳姿。偏愛垂楊拂地枝。天子徧教詞客賦。宮中要唱洞簫詞。
凝碧池頭蘸翠漣。鳳凰樓畔簇晴煙。新詩欲詠知難詠。說與雙成入管絃。
侍從甘泉與未央。移舟偏要近垂楊。櫻桃未綻梅花老。折得柔條百尺長。

九日落星山登高

秋暮天高稻穗成。落星山上會諸賓。黃花泛酒依流俗。白髮滿頭思故人。
巖影晚看雲出岫。湖光遙見客垂綸。風煙不改年長度。終待林泉老此身。

十日和張少監

重陽高會古平臺。吟徧秋光始下來。黃菊後期香未減。新詩捧得眼還開。
每因佳節知身老。卻憶前權似夢回。且喜清時屢行樂。是非名利盡悠哉。

陳侍郎宅觀花燭

今夜銀河萬里秋。人言織女嫁牽牛。珮聲寥亮和金奏。燭影熒煌映玉鈎。座客亦從天子賜。更籌須爲主人留。世間盛事君知否。朝下鸞臺夕鳳樓。

送蕭尙書致仕歸廬陵

江海分飛二十春。重論前事不堪聞。主憂臣辱誰非我。曲突徙薪唯有君。金紫滿身皆外物。雪霜垂領更離羣。鶴歸華表望不盡。玉笥山頭多白雲。

和鍾大監泛舟同遊見示

潮溝橫趣北山阿。一月三遊未是多。老去交親難暫捨。閑中滋味更無過。谿橋樹映行人渡。村徑風飄牧豎歌。孤棹亂流偏有興。滿川晴日弄微波。

又和游光睦院

寺門山水際。清淺照屏顏。客櫂晚維岸。僧房猶掩關。日華穿竹靜。雲影過塔閑。箕踞一長嘯。忘懷物我間。

送陳祕監歸泉州

風滿潮溝木葉飛。水邊行客駐驂騑。三朝恩澤馮唐老。萬里鄉關賀監歸。世路窮通前事遠。半生談笑此心違。離歌不識高堂慶。特地令人淚滿衣。

又聽霓裳羽衣曲送陳君

清商一曲遠人行。桃葉津頭月正明。此是開元太平曲。莫教偏作別離聲。

安陽集鈔

韓琦字稚圭。相州安陽人。弱冠舉進士。名在第二。方唱名。太史奏日下五色雲見。累官至右僕射侍中。歷儀衛魏三國公。出備兩鎮。輔三朝。立二帝。決大策。安社稷。制西夏。出入將相。事具史傳。不載。卒年六十八。大星隕於治所。櫪馬皆驚。單贈尙書令。諡忠獻。詩率臆得之。而意思深長。有鍛鍊所不及。理趣流露。皆賢相識度。其題劉御藥畫冊語云。觀畫之術。維逼真而已。得真之全者絕也。得多者上也。非真卽下矣。人謂此術不獨觀畫。卽可觀人物。竊謂惟詩亦然。魏公勳業彪炳。直無暇於筆墨爭長。然語窺閫奧。無它。此道得也。

夜合

俗人之愛花。重色不重香。吾今得真賞。以矯時之常。所愛夜合者。清芬踰衆芳。葉葉自相對。開斂隨陰陽。不慚歷草滋。獨擅堯堦祥。得此合歡名。憂忿誠可忘。茸茸紅白姿。百和從風颺。沉水燎庭檻。薰陸紛纓裳。彌月固未歇。況茲夏景長。凡目不我貴。馥烈徒自將。仲尼失滅明。史遷疑子房。以貌不以行。舉世同悲傷。予欲先馨德。羣豔孰可方。直饒妖牡丹。須讓花中王。

蜂薑

事小不可忽。義或戒蜂蠆。蜂蠆之中人。始意脫已害。人兮怒一蟲。爲報速睚眦。白晝撻危巢。夜獨窮纖介。必獲而後已。立死已爲快。彼誠蓄微毒。謂已有所賴。失於小不忍。而自取糜壞。吁嗟陰巧徒。毒邁蜂蠆大。包潛中善良。斷腕未足駭。小或一身危。甚則家族逮。淵微如鬼神。無隙可漏敗。君子被戕賊。守道不爲怪。有時醜迹露。事或無可奈。一旦吾道行。乃置之度外。使其自愧縮。似不容覆載。非力不足較。顧有盛德在。陰巧旣常幸。蜂蠆胡不貸。

啄木

剝剝復卜卜。意若念良木。營營求蠹心。未獲空我腹。或露一檔紅。或展雙翅綠。捷緣都盧榦。響弄羯鼓曲。搜索不知疲。利觜信摧秃。忽爾破姦穴。種類無遺族。內孽固難辨。一發知潛伏。彼實害珍材。盡殄此非酷。直疑天意深。不使嗜梁肉。專爲衆蠹仇。待飲弗與足。如令知庶味。恣擇蟲與粟。杞梓任陰賊。長喙罷攻觸。飽食作羣飛。時下泉沼浴。歸鳴涼樹陰。暮趁高枝宿。

來鳳

來鳳趨社期。翩若天外至。徘徊大廈間。汲汲營巢意。中心有所託。自謂得其地。銜泥兩吻瘡。旦暮不少憩。主人愛高堂。病爾如疣贅。爾巢屢膚寸。長挺輒摧墜。胡爲不識嫌。又續前功棄。何處無蓬茅。自足爲生計。不爾卵而覆。其禍愈非細。予旣傷爾愚。竊復探爾志。孜孜不忍去。欲動主人義。萬一憐其勤。庶獲息我類。

巨棟既不撓。出處安且貴。其能無報乎。唯守信無貳。年年應候來。馴狎如兒稚。雙雙軒戶前。爲君作嘉致。不學君家客。去就惟勢利。微羽一知歸。至死不他詣。

答孫植太博後園宴射

花梢點紅牙。綠苗宴亭爽。塏棚雲列。呼賓習射次序升。體裁人人矜勇捷。六鈞力副百中藝。由基注目老羿拽。支左屈右何太工。象弭急收如列缺。須臾一鏑入鵠心。畫鼓連轟盡聲喝。後者審固意愈精。有時大呼劈箭筈。惜哉最是毫釐差。彩侯似動筈微撇。分明角勝各記量。將終或爲一箭奪。當筵主籌令難犯。大白時舉出正罰。此禮自古尤所重。矍圃去留宜有別。五善大抵主和容。不止穿楊與穿札。因憶當年黠羌叛。非才誤授將軍鉞。帳下貔貅十萬師。力過生犀心似鐵。大仁未許覆兇巢。飭謹封垂禦。侵越悍夫猛士志。待聘貯填憤氣何由洩。正值高秋天氣寒。塞場霜重嚴風刮。約束偏裨整隊兵。旌旗爍電戈矛雪。驅出長郊閱奇陣。離合應麾皆有節。次引精銳較絕技。控弦命中無虛發。氣豪馬健走危坡。直下千尋未嘗蹶。收軍校獵圍平原。犬順人呼鷹解紲。山麋衝軼犯勁矢。岡兔奔逃迷狡穴。大鵬盤空不輕搏。老狐仰視肝膽裂。駐鞍賞獲犒部曲。浪瀉酒車輪染血。將軍未酣衆心醉。耳後風生鼻頭熱。此日淮藩奉寬詔。朱輪慢碾行春轍。鈴索聲沈訟牒稀。優游大司養疎拙。斜蒿青青鱗鱠新。公醪香重醅才撥。射堂對客旦相娛。不妨樂事陶嘉月。襟懷聊與水雲閑。夢魂猶寄關山闊。逢辰未立赫然勳。破的求功真瑣屑。欲得心如外貌。

歡報國之誠盡摠豁。

廣陵大雪

淮南常歲冬猶燠。今年陰沴何嚴酷。黑雲漫天一月昏。大雪飛揚平壓屋。風力軒號助其勢。擺撼琳琅摧凍木。通宵徹晝不暫停。堆積樓臺滿溪谷。有時造出可憐態。柳絮梨花亂紛撲。乘溫變化雨聲來。度日階庭恣淋漓。幾縈寒霰不成絲。驟集疎簷還挂瀑。蟄蛙得意欲跳擲。幽鷺無情成挫辱。罾魚江叟冰透蓑。賣炭野翁泥沒輻。閭閻細民誠可哀。三市不喧游手束。牛衣破解突無煙。餓犬聲微饑子哭。我聞上天主時澤。亦有常數滋農穀。膏潤均於一歲中。是謂年豐調玉燭。此來盛冬過爾多。卻慮麥秋欠霑足。太守憂民仰天祝。願噓氛霾看晴旭。望晴不晴無奈何。擁被醉眠頭更縮。

和袁陟節推龍興寺芍藥

廣陵芍藥真奇美。名與洛花相上下。洛花年來品格卑。所在隨人趁高價。接頭着處騁新妍。輕去本根無顧藉。不論姚花與魏花。只供俗目陪妖姘。廣陵之花性絕高。得地不移歸造化。大豪大力或強遷。費盡擁培無豔冶。東君固是花之主。千苞萬萼從榮謝。似嬌東君汎愛心。枉殺春風不肯嫁。遂令天下走香名。髣髴丹青競誇詫。以此揚花較洛花。自合揚花推定霸。其間絕色可粗陳。天工着意誠堪訝。仙家冠子鏤紅雲。金線妝治無匹亞。旋心體弱不勝枝。寶髻欹斜猶墮馬。冰雪肌膚一縷斑。新試守宮明似赭。雙頭兩兩

最多情。象物更呈鞍面窟。樓子亭亭欠姿媚。特有怪狀堪圖寫。見者方知畫不真。未見直疑傳者詐。前賢大欲巧賦詠。片言未出心先怕。天上人間少其比。不似餘芳資假借。我來淮海涉三春。三訪龍興舊僧舍。問得龍興好事僧。每歲看承不敢暇。後園栽植雖甚蕃。及見花成由取捨。出羣標致必驚人。方徙矮壇臨大廈。客來只見軒檻前。國豔天姿相照射。因知靈種本自然。須憑精識能陶冶。君子果有育材心。請視維揚種花者。

苦熱

皇祐辛卯夏。六月朔伏暑。始伏之七日。大熱極炎苦。赫日燒扶桑。焰焰指亭午。陽烏自焦鑠。垂翅不西舉。炙翻四海波。天地入烹煮。蛟龍竄潭穴。汗喘不敢雨。雷神抱桴逃。不顧車裂鼓。豈無堂室深。氣鬱如炊釜。豈無臺榭高。風毒如遭蠱。直疑萬類繁。盡欲變脩脯。嘗聞崑閩間。別有神仙宇。雷散滌煩襟。玉漿清濁腑。吾欲飛而往。於義不獨處。安得世上人。同日生毛羽。

答章望之祕校惠詩求古瓦硯

魏宮之廢知幾春。其間萬事成埃塵。唯有昭陽殿瓦不可壞。埋沒曠野迷荒榛。陶甄之法世莫得。但貴美璞踰方珉。數百年來取爲硯。墨光爛發波成輪。求之日盛得日少。片材無異圭璧珍。巧工近歲知衆寶。雜以假僞窺錢緡。頭方面凸槩難別。千百未有三二真。我來本邦責鄴令。朝搜暮索勞精神。遺基壞地徧刈

窟始獲一瓦全。元淳薜斑着骨尙乾翠。夜雨點漬痕如新。當時此復近簷溜。印以篆字花其脣。磨礱累日喜成就。要完舊質知無倫。吾才寡陋不足稱。思與好古能文人。好古能文今者誰。武寧祕書章表民。無詩尙欲兩手拊。何況大雅之奏聞鏗純。

答陳舜俞推官惠詩求全瓦古硯

鄴宮廢瓦埋荒草。取之爲硯成堅好。求者如麻幾百年。宜乎今日難搜討。吾邦匠巧世其業。能辨瓌奇幼而老。隨材就器固不遺。大則梁棟細椽椽。必須完者始稱珍。何殊巨海尋三島。荆人之璧尙有瑕。夏后之璜豈無考。况乎此物出坏陶。千耕萬斲常翻攪。吾今所得不專全。祕若英瑤藉文纁。君詩苦擇未如意。持贈只虞笑絕倒。君不見。鎮圭尺二瑁四寸。大小雖異皆君寶。

觀胡九齡員外畫牛

丹青之筆奪造化。能者幾何登品錄。蛟龍獰惡鬼神怒。更工不接時人目。有形之物至者稀。是否難欺衆所矚。絳臺胡掾文章外。偏向畫牛其好酷。海內馳名三十年。得者珍藏過金玉。老來纔始着青衫。養親不及朝家祿。前日野服忽相過。云訪恩知走京穀。微風入指未能畫。示我蠟本數十幅。採摭諸家百餘狀。毫端古意多含蓄。鬪者取力全在角。臥者稱身全在腹。立者髣髴精神慢。背者分數頭項促。行者動作皆得羣。乳者顧視真憐犢。當流洄戲益自在。欲走或疑猶蓄縮。從容飲嚙得天真。荷鞭時有童兒牧。或橫一笛

坐牛背。便是無聲太平曲。江天雨雪易溟濛。風勢掀號。摧古木。欹斜蓑笠趁牛歸。蕭疎暮景。煙村宿。奇哉胡掾老筆。不可到。戴叟重生須死伏。吾觀諸牛之態。雖盡妙。尚有所遺。思未熟。牛於生民功最大。不盡牛功。牛亦辱。胡君胡君聽我言。別選輕綃成巨軸。寫出區區耒耜勤。貢知天下由吾方食足。

次韻和子淵學士春雨

天幕沉沉淑氣溫。雨絲輕軟墜雲根。洗開春色無多潤。染盡花光不見痕。寂寞畫樓和夢鎖。依微芳樹過人昏。堂虛座密珠簾下。試問淳于醉幾樽。

和春卿學士柳枝詞五闕

樓前輕雪未全銷。偷得春光入嫩條。似向東風猶綽約。可能渾忘舞時腰。陌闌宮古綠煙迷。惹盡春愁困拂堤。卻爲多情足離恨。故教溝水亦東西。章街風曉起新眠。寒食輕陰未雨天。無限青絲拂遊騎。一生芳意負金鞭。淡煙輕日簇誰家。微出青旗一帶斜。對景似嫌春意老。更搖疎影掃殘花。畫橋南北水連天。纔聽鶯聲又晚蟬。長使離魂容易斷。春風秋月自依然。

和春卿學士上元罷燈

絲竹沉聲月泛波。警宵方喜罷誰何。樓深酒密客留易。路遠香殘人去多。寒燭倚蓮猶結淚。淡雲歸隴不

停歌。那知夢穩瀛州上。正是鈞天九奏和。是夕館宿。聞宮中奏樂。

再賦柳枝詞二闕

曲江風暖曉陰斜。翠色相宜拂鈿車。自是春眠慵未起。日高人困又飛花。
葉葉新長約黛蛾。絲絲輕軟任風梭。啼鶯便學歌喉轉。知是春來舞意多。

上巳

遠道今逢被禊辰。雨餘風物一番新。等閑臨水還思舊。取次看花便當春。
絮雪暖迷西苑路。車雷晴起曲江塵。臺英正約尋芳會。誰是山陰作序人。

寓目

擁傳修途倦。逢春旅思長。遠煙含樹色。細雨起塵香。隴麥成行綠。林鶯並對黃。
揚鞭聊自慰。舉目見韶光。

使回戲成

專對慚非出使才。拭圭申好斂旌回。禮煩偏苦元正拜。慶廷元日拜禮最煩戶大猶輕永壽杯。永壽節名。慶主元辰其日以大使酌南欵枕頓無歸夢擾。據鞍潛覺旅懷開。明朝便是侵星去。不怕東風拂面來。

柳絮二闕

慣惱東風不定家。高樓長陌奈無涯。一春情緒空撩亂。不是天生穩重花。

絮雪紛紛不自持。亂愁縈困滿春暉。有時穿入花枝過。無限蜂兒作隊飛。

中秋月

月滿中秋夜。人人惜最明。悲歡徒自感。圓缺本無情。天外有相憶。世間多不平。嫦娥難借問。寂寞趁西傾。

謝丹陽李公素學士惠鶴

高籠攜得意。何勤玉樹慚。無可待君。只愛羽毛欺白雪。不知魂夢託青雲。孤標直好和松畫。清唳偏宜帶月聞。自有三山歸去路。莫辭時暫處鷄羣。

重九會光化二園

誰言秋色不如春。及到重陽景自新。隨分笙歌行樂處。菊花萸子更宜人。

春晴

霽色破春昏。高樓日未曛。林梢零舊雨。山頂入殘雲。醉粉勻花頰。風羅皺水紋。踏青人誤約。芳思幾紛紛。

春霖

咫尺東郊路。春霖絕未通。銷閑生弈思。醒睡費茶功。樓迥昏昏霧。窗寒霎霎風。待晴桑陌上。五馬恣瓏瓏。

登西大悲閣

藹藹西藍閣。煩襟一望開。山川歸盛德。姦傑委沉埃。城迥雲連堞。烽閑草蔽臺。誰知太守意。不爲納涼來。

新館

宴宇新成苦未嘉。忽膺朝委易軍牙。張侯暫喜留歡客。開檻憑誰種好花。北沼不難平釣岸。釣岸未成西峯猶欠入窗紗。城樓未立後賢政敏多餘暇。高會何妨月影斜。

北塘避暑

盡室林塘滌暑煩。曠然如不在塵寰。誰人敢議清風價。無樂能過白日閑。水鳥得魚長自足。嶺雲含雨只空還。酒闌何物醒魂夢。萬柄蓮香一枕山。

髮白有感

區區邊朔有何成。三失流年只自驚。無一事來頭尙白。白人頭處豈堪行。

感事

一來邊障地。走馬過三秋。萬緒事常擾。九分春又休。鷺花誰在目。霜雪只侵頭。縱得風光住。風光可奈憂。

北塘春雨

葉葉輕雲帳薄羅。坐看膏澤灑庭柯。風前芳杏紅香減。煙外垂楊綠意多。聲落簷牙飛短瀑。點勻池面起圓波。晴來西北凭欄望。拂黛遙峯濯萬螺。

寄題廣信軍四望亭

西北雲高拂女牆。危亭虛豁望中長。田間堤陌成新險。天外江川是舊疆。古道入秋漫黍稷。遠坡乘晚下牛羊。凭欄多少無言恨。不在歸鴻送夕陽。

閱古堂前植菊二本九月十八日花猶未開因以小詩嘲之

只趁重陽選菊栽。當欄殊不及時開。風霜日緊猶何待。甚得迎春見識來。

後園閑步

池圃足高趣。公餘事少關。幽禽聲自樂。流水意長閑。近竹花終俗。過欄草費刪。心休誰似我。官府有青山。

觀稼回北園席上

郊原飛隼拂晴霓。秋入豐年自慘悽。嘗酒管絃先社集。

北人社前一日親賓相會。謂之嘗酒。

捺卷禾黍極雲齊。雪鋪蕎麥

花漫野。黛抹蔓菁菜滿畦。區脫狴牢無一事。山翁贏得醉如泥。

壬辰重九卽席

中山風物有前緣。經賞重陽第五年。莫爲素毛悲晚歲。且吹黃菊酌芳筵。退求僻郡疑邀寵。甘老窮邊似好權。笑問此身何計是。不如嘉節倒垂蓮。

離天威驛

早發天威驛。深春尙薄寒。龍蛇盤道路。波浪卷峯巒。古木萌常晚。新流勢未湍。忠臣方叱馭。更險不辭難。

過故關

春入并州路。羣芳夾故關。前驕驅弩過。別境荷戈還。古戍餘荒堞。新耕入亂山。時平民自適。白首樂農閑。

出口

待曉出口。溟濛雨乍晴。始知經盡險。終得坦然平。草樹開春意。川原豁眼明。吏民當自信。竹馬不須迎。

次韻和都運崔諫議寄示立春前一日宿嵐谷山程

絕邑風霜正樹威。不知韶律起從微。十千酒且迎春酌。五九寒須伴臘歸。破屐好山連日上。費詩嬌雪着人飛。屬封所過皆蒙惠。民吏應如挾纊衣。

六月六日雨後過嶽廟遊從封寺觀稼席上

暑雨頻經信宿休。近郊方出釋潛憂。雖妨麥始三停穫。且見苗知一半收。農語有之。神嶽怖民藏電雹。老松憑寺偃蛟虬。佳游况遇從豐識。好飭千倉待有秋。

北園秋雨

輕雨來秋晚。郊園對客樽。暫和春氣味。將冷雪胚渾。聲入關榆苦。陰纏塞嶺昏。黃花應自笑。搖落獨承恩。

後園春日

并塞園林古。春來似不知。雨輕成凍易。樹老發花遲。劇事隨年倦。歡悰入病衰。芳時期強賞。宴鼓揭天槌。

過吳兒谷

曉入吳兒谷。危途信不虛。千峯疑絕路。一逕俯容車。山鳥過雲語。田夫半嶺鋤。時平盡周道。天險欲何如。

觀稼

一夕甘滋起瘁田。陡回災沴作豐年。便晴惟恐禾生耳。將熟偏宜穀捺拳。雲退不留驅旱迹。氣清渾露已秋天。衰翁豈獨同民樂。更覺詩豪似有權。

再出行田

豐歲觀農穫。先疇路不遐。子多宜晚穀。生拗就新麻。蕎麥方成齷。蔓菁未入楹。鄉民愚自詫。太守是吾家。

暮春康樂園

榆莢紛紛擲亂錢。柳花相撲滾新綿。一年寂寞頻來地。三月芳菲已過天。樹密只喧閑鳥雀。臺高猶得好山川。病夫不飲時如此。徒有詩情益自然。

庚申相臺閱稼

淫雨農疇害復收。彼何恩厚此何仇。高田穀穗拖牛尾。卑地莊窠沒獸頭。稔社徹宵喧鼓樂。災居無日苦飢流。如云禍福關爲政。安得豐凶在一州。

春陰馬上

正是風和日暖天。重陰凌擾苦纏綿。蕉心自結憑誰展。柳眼慵開只待眠。草溼謾鋪留醉席。榆寒難擲買春錢。幾時霞外氛霾散。放出紅輪一丈圓。

登廣教院閣

岑寂禪扉啓畫關。公餘爲會一開顏。高臺面壘包平野。老柏參天礙遠山。花去春叢蝴蝶亂。雨勻朝圃桔槔閑。徘徊軒檻何時下。直待前枝倦鶻還。

會故集賢崔侍郎園池再賦

門徑縈紆洞府間。了無塵外累幽閑。長楊十丈亂風雨。流水數枝鳴珮環。入戶好峯誰可畫。礙人新竹不容刪。池亭面面圓荷滿。薄暮飛香送客還。

涼榭池上二闋

游鱗驚觸綠荷香。水馬成羣股腳長。逐浪相追留篆跡。偃波垂露滿方塘。病襟思適繞東塘。水荇初花吐嫩黃。行困老樗陰下坐。兒童爭喜捨紅娘。

題玉泉院

兩行修柏夾雲根。引入蓮峯直下村。病骨醒魂安氣母。幽亭收景厭山孫。金堆望遠千灘出。玉溜聲喧萬馬奔。坐歎塵勞無計住。卻尋歸路日黃昏。

觀魚軒

雨後方池碧漲秋。觀魚亭檻俯臨流。時看隱苻駢頭戲。忽見開萍作隊游。喜擲舟前翻亂錦。靜潛波下起圓漚。吾心大欲同斯樂。肯插筠竿餌釣鈎。

九日水閣

池館隳摧古樹荒。此延嘉客會重陽。雖慚老圃秋容淡。且看寒花晚節香。酒味已醇新過熟。蟹黃先實不須霜。年來飲興衰難強。漫有高吟力尙狂。

九月四日會安正堂

秋光濃拂使君家。尙去重陽五日賒。且誦好詩成素飲。更先諸客對黃花。池萍漬雨錢錢密。塞鴈書空字字斜。但縱高吟開醉膽。莫驚搖落動悲嗟。

辛亥重九會安正堂

斯堂會許占風光。去年詩有。留與鄴都爲故事。年年常占好風光之句。須到重陽復命觴。坐上半非前歲客。杯中無改舊花香。初晴已過登高日。散慮宜趨自得場。唯有一時詩酒戰。願開強戶振雄鎗。

壬子十一月二十九日時雪方洽

近臘猶慳六出繁。忽驚盈尺及民寬。萬方蒙澤人人賀。通夕無風陣陣乾。危石蓋深鹽虎陷。老枝擎重玉

龍寒欲知靈鷲銀爲界。試陟高樓一望看。

再題狎鷗亭

危亭初起俯清潄。只得當軒幾醉吟。一日鄉園傷驟別。四年宮闕動歸心。簷前好竹今成篠。波下修鱗舊種針。鷗識再來猶不懼。向人馴狎似家禽。

郡圃春晚

溶溶春水滿方塘。欄檻風微落葉香。盡日楊花飛又歇。有時林鳥見還藏。沈痾不爲閑來減。流景知從靜處長。欲戰萬愁無酒力。可堪三月去堂堂。

書錦堂再賞牡丹

錦堂重賞牡丹紅。不惜殘英數日空。嘉豔豈無來歲好。清歡難得故人同。誰言山下曾爲雨。一春無雨。只恐身輕去逐風。共且對花開口笑。莫持姚左較雌雄。

暮春書事

榆莢空飛不算錢。韶光歸速置何緣。惜春情味過年少。戰酒英雄退日前。竹筍迸塔抽兕角。楊花鋪水漲龍涎。妖妍萬變成凋謝。長養須資大夏權。

北第同賞芍藥

芍藥名高致亦難。此觀妖豔滿彫欄。酒酣誰欲張珠網。醉西金細偏宜間寶冠。金線冠露裏更深雲髻重。
髻子蝶棲長苦玉樓寒。樓子鄭詩已取相酬贈。不見諸經載牡丹。

乙卯書錦堂同賞牡丹

從來三月賞芳妍。開晚今逢首夏天。料得東君私此老。且留西子久當筵。柳絲偷學傷春緒。榆莢爭飛買笑錢。我是至和親植者。雨中相見似濟然。

滄浪集鈔

蘇舜欽字子美。梓州銅山人。以父任補太廟齋郎。調滎陽尉。尋第進士。改光祿寺主簿。知長垣縣。遷大理評事。監在京店宅務。以范仲淹薦。召試集賢校理。監進奏院。舜欽所論侵權貴。而婦父杜衍與仲淹富弼在政府。爲時忌。會進奏院祠神。晏會不與者。銜劾舜欽。用鬻故紙公錢。召妓樂。醉歌狂悖。因欲搖動衍等。舜欽坐除名。後爲湖州長史。卒。年四十一。旣廢居蘇州。買水石作滄浪亭。益讀書。時發憤懣於歌詩。善草書。酣酒落筆。往往驚人。與梅堯臣齊名。時稱蘇梅。劉後村謂其歌行雄放於聖俞。軒昂不羈。如其爲人。及蟠屈爲吳體。則極平夷妥帖。蓋宋初始爲大雅。於古朴中具灑落淳畜之妙。二家所同擅。而梅之深遠閒淡。蘇之超邁橫絕。則又各出機杼。永叔所謂不能優劣者也。至情志忠惻。而議論當理。要又非詩人粗豪一流所比。詩有云。筆下驅古風。直趨聖所存。又曰。會將趨古淡。先可去浮囂。其本領卓越如此。

感興三首

後寢藏衣冠。前廟宅神主。吾聞諸禮經。此制出中古。秦嬴食先法。乃復祭於墓。漢衣以月遊。於道蓋無取。宣帝尊祖廟。失制徧九土。孝元酌前文。一旦悉除去。魏帝樂銅臺。遺令置歌舞。昏嗣竟從之。此事狂夫阻。

唐制益紛華。諸陵鎖嬪御。曠女日哀吟。於先亦奚補。吾朝三聖人。乘雲不可睹。威靈已霄漢。嗣皇念宗祖。繪事移天光。刻象肖神武。徧勅舊遊地。輸材起宮宇。階城釵以金。牆壁衣之黼。功既卽奉迎。法仗疊簫鼓。玩好擇珍奇。目奪不可數。三京佛老家。已有十數處。朝家雖奉先。越禮古不許。君不祭臣僕。父不祭支庶。丹楹豈非孝。聖貶甚蕭斧。大祀當以時。寢廟卽其所。惜哉共儉德。乃爲侈所監。痛乎神聖姿。遂與夷爲侶。蒼生何其愚。瞻歎走旁午。賤子私自嗟。傷時淚如雨。

昔在帝舜日。光宅闢四門。所貴無凶邪。德教日益敦。末世多濫姦。九重嚴大閹。扞掖主譏察。誰何辯語言。一關百力士。列立整石溫。設官按尺籍。唱號於未昏。唐末稍懈怠。嘗值外使奔。京城凶豪兒。奮劍闖帝藩。狂呼嘯虎豹。便欲傾乾坤。賴有宰相在。不然神器翻。我朝講制度。門籍反不存。近知賤丈夫。突入犯赤軒。陞官未暇執。嗷嗷何其誼。祖宗創業難。慎重在後昆。勇夫猶重閉。況乃天子尊。何羅猶宜察。況乃外寇屯。輿語一及此。舌出反自捫。吾家本寒微。世受朝廷恩。欲奏鷓鴣詩。當塗誰薦論。

警說聖所擇。愚謀帝不罪。況乎言有文。白黑時利害。前日林書生。自謂胸臆大。潛心撫世病。策成謂可賣。投穎觸諫函。獻言何耿介。云昨見凶星。上帝下警戒。意若日昏掇。出處恣蜂蠆。安坐弄神器。開門納珍賄。宗支若繫囚。親親禮日殺。大臣尸其柄。咋舌希龍拜。速速伐虎叢。無使自沉瘵。陛下幸察之。聰明卽不壞。如忽賤臣言。不瞬防禍敗。一封朝飛入。羣目已眦睚。力夫暮塞門。執縛不容喟。十手捽其胡。如負殺人債。

幽諸死牢中。繫灼若龜蔡。亦既下風指。黥而播諸海。長塗萬餘里。一錢不得帶。必令朝夕間。渴飢死於械。從前有口者。隨脰氣如韜。獨夫已去除。易若吹糠稗。奈何上帝明。非德不可蓋。倏忽未十旬。炎官下其怪。乙夜紫禁中。一燎不存芥。天王下牀走。蒼猝畏挂礙。連延舊寢廷。頓失若空寨。明朝黃紙出。大赦徧中外。嗟乎林書生。生命不可再。翻令凶惡囚。纍纍受恩貸。

慶州敗

無戰王者師。有備軍之志。天下承平數十年。此語雖存人所棄。今歲西戎背世盟。直隨秋風寇邊城。屠殺熟戶燒障堡。十萬馳騁山嶽傾。國家防塞今有誰。官爲承制乳臭兒。酣觴大嚼乃事業。何嘗識會兵之機。符移火急蒐卒乘。意謂就戮如縛尸。未成一軍已出戰。驅逐急使緣嶮巖。馬肥甲重士飽喘。雖有弓劍何所施。連顛自欲墮深谷。騎虜指笑聲嘻嘻。一麾發伏雁行出。山下奄截成重圍。我軍免胄乞死所。承制面縛交涕洟。逡巡下令藝者全。爭獻小伎歌且吹。其餘劓馘放之去。東走矢液皆淋漓。首無耳準若怪獸。不自愧恥猶生歸。守者沮氣陷者苦。盡由主將之所爲。地機不見欲僥勝。羞辱中國堪傷悲。

及第後與同年宴李丞相宅

十年苦學文。出語背時向。荅力不自知。藝園輒掉鞅。薄伎遭休明。一第君所唱。拔身泥滓底。飄迹雲霞上。氣和朝言甘。夢好夕魂王。軒眉失舊斂。舉意有新況。爽如秋後鷹。榮若凱旋將。臺府張宴集。吾輩縱譴浪。

花梢血點乾。酒面玉紋漲。狂歌互喧傳。醉舞迭闐伉。茲時實無營。此樂亦以壯。去去登顯塗。幸無墮素尚。

昇陽殿故址

昔在開元中。此名昇陽殿。西通大名宮。夾道直如箭。至尊黃金輿。乘春日幸宴。翠嬪戛鐘鼓。歡呼奏新徧。巧舞風燕翻。妖歌露鶯囀。酒光射錦幄。上下花會炫。雕盤堆繁英。豔粉弱自戰。天歡日無窮。臣諫莫敢獻。樂極哀繼之。在理亦可見。胡來塞宮闕。腥膻汚香薦。縱火寢廟平。揮戈君臣迸。庸嗣忽前醜。泚巢福更亂。冉冉竟覆亡。返爲耕牧便。瓦礫雖費犁。土壤頗肥衍。蓋由殺人多。膏血浸漬遠。燭燼今成堆。皆昔燕趙面。每因鋤耨時。數得寶玉片。今秋雨澤多。穀穗密如辦。農惟喜豐稔。吾獨憫遷變。不有失德君。焉爲穡夫佃。大國尙如此。小人易流轉。道德可久長。作詩將自勸。

藍田悟真寺作

旅食長安城。迴遑奔走無停行。清懷壯抱失素向。胸中堆積塵土生。偷閒得至玉峯下。爲聞悟真之寺之嘉名。杖筇赤腳渡藍水。細流激激心骨清。仰看蒼山高峯旁。白雲明滅藏日光。行人遙指置寺處。正在白雲之中央。逡巡緣棧更險絕。攀蘿捫壁隨低昂。明行咫尺乃相失。已與雲霧相翱翔。時聞啼鳥如吹竹。數步一休還縱目。行行未知高則危。下視昏煙覆平陸。滿巖佳樹光樸楸。赫赤如霞間濃綠。是時八月初。路旁已見芬芬菊。貪奇戀景不知倦。側睥又復心瑟縮。神魂飛下大壑幽。定省移時進雙足。寺門高開朝日

輝。丹青黥淡唐時屋。老僧引我周遊看。且云白氏子詩乃實錄。此詩疇昔予所聞。殷勤更向碑前讀。按言索像今無復。惟有流泉數道如車輻。我嫌世累欲暫居。又云此地無留宿。殿宇之後林莽中。日暮常有虎豹伏。鑿石龕邊崖至深。近有浮屠於此相根觸。快心宿忿兩不解。一乃顛擠死其谷。我聞爲之久顰蹙。此向期將避煩辱。不爲傷生事更多。爭如平地隨流俗。歎息回頭急出山。始覺全軀已爲福。

興慶池

餘潤漲龍渠。疏溜連清澗。助曉遠昏山。浮秋明刮眼。漁歸別浦閒。雁下滄波晚。岸北有高臺。離魂蕩無限。

長安春日效東野

前秋長安春。今春長安秋。節物自榮悴。我有樂與憂。窮閭何卑漏。時燕不見投。門庭謝過從。蘭萌舒綠柔。燕託喜廣廈。亦非善是仇。蘭生靜愈茂。堪將義爲儔。芳香誠可慕。對之獨窮愁。

太行道

行行太行道。一步三歎息。念厥造化初。夫何險此極。左右無底壑。前後至頑石。高者欲作天朋黨。深者疑斷地血脈。夜中巖下埋斗杓。日午陰壁風雪號。攀緣有路到絕仞。四望羣峯合杳如。波濤忽至逼側處。咫尺顛墜恐莫逃。嗟乎古昔未開時。隔截往來人。不思淳源一破山。嶽碎巧心遂去緣。嶮巖嶮不窮。甚可畏。悼此二者亡其宜。天地不自險。嶮由人爲之。彼車摧輪馬傷足。中路勿歎勿慟哭。世上安塗故有焉。孰

使汝行此道驅高軒。喪墜不收宜爾然。

對酒

丈夫少也不富貴。胡顏奔走乎塵世。予年已壯志未行。案上敦敦考文字。有時愁思不可掇。崢嶸腹中失和氣。侍官得來太行顛。太行美酒清如天。長歌忽發淚迸落。一飲一斗心浩然。嗟乎吾道不如酒。平褫哀樂如摧朽。讀書百事人不知。地下劉伶吾與歸。

夜中

夜分衆誼死。耿耿抱真履。中君湛以寧。不爲外官使。七兵乘間入。攻剽勢向圯。主將不謀陣。敵惡蕩然失。守邊藏避。駭浪奔騰。一刻萬里。紛紛變化無窮已。俄如獨繭絲。忽復滿天地。乳虎不受縛。狂龍難馴致。我思精甲以扞異類。邪慝弗萌。元辟復位。輔以逍遙之至道。爛然光輝照無際。

蜀士

蜀國天下險。奇怪生中間。有士賈其姓。抱才東入關。獻冊叩諫鼓。其言蔚可觀。願以微賤軀。一得至上前。掉舌滅西寇。晝地收幽燕。且云太平久。兵戰無人言。臣嘗學其法。自集數百篇。治亂與成敗。密然不可刪。三獻輒罷去。志屈心悲酸。將相門戶深。欲往復見攔。負販冒日熱。引重衝雪寒。鞿苦輦轂下。以圖晨夕餐。如此三歲餘。夜夜抱膝歎。義者或賑給。遂復歸巴川。嗟乎區宇大。此徒亦已繁。城市與巖穴。隱默孰辨旃。

幸得出自鬻。何惜置末班。吾相柄天下。處事當機先。古之設爵位。蓋欲英雄躔。次第立名級。不使智慮閑。稍有才器者。必以祿仕牽。所患在不出。既出那棄捐。放蛟入大水。驅虎還深山。失一故無害。其類莫可攀。

己卯冬大寒有感

延川未撤警。夕烽照冰雪。窮邊苦寒地。兵氣相纏結。主將初臨戎。猛思風前發。朝笳吹餘哀。疊鼓暮不絕。淹留未見敵。愁端密如髮。予聞古烈士。自誓立壯節。丸泥封函關。長纓繫南越。本爲朝廷羞。寧計身命活。功名非與期。冊書豈磨滅。然由任遇專。醜類易翦伐。訓士無他才。賞罰在果決。近聞邊方奏。中覆多沉沒。罪者旣稽誅。功者不見閱。雖使頗牧生。勇智當坐竭。或云廟堂上。與彼勢相戛。恐其立異勳。歛然自超拔。不知百萬師。寒刮膚革裂。關中困誅斂。農產半匱竭。我欲叫上帝。願帝下明罰。早令黠虜亡。無爲生民孽。

獵狐篇

老狐宅城隅。涵養體豐大。不知窟穴處。草木但掩藹。秋食承露禾。夏飲灌園派。暮夜出旁舍。雞畜遭橫害。晚登埤塢塢。呼吸召百怪。或爲嬰兒啼。或變豔婦態。不知幾十年。出處頗安泰。古語比社鼠。蓋亦有恃賴。邑中年少兒。耽獵若沉痼。遠郊盡雉兔。近水殲鱗介。養犬號青鷄。逐獸馳不再。勇聞此老狐。取必將自快。縱犬索幽邃。張人作疆界。茲時頗窘急。迸出赤電駭。羣小助噉噉。奔馳數顛沛。所向不能入。有類狼失狽。鈎牙咋巨頰。髓血相潰沫。喘叫遂死矣。爭觀若期會。何暇正首丘。腥臊滿蓬艾。數穴相穿通。城堞幾墮壞。

久此縱凶妖。一旦果禍敗。皮爲榻上藉。肉作盤中膾。觀此爲之吟。書以爲警戒。

舟中感懷寄館中諸君時得告之山陽挈家。

扁舟迎春色。東下淮楚鄉。側身風波地。回首英俊場。顧我本俗材。百事無一長。濫迹入冊府。舉動初不皇。乍脫泥滓底。稍見日月光。峻閣鬱前起。隱嶙天中央。春風花竹明。曉雨宮殿涼。溢目盡圖史。接翼皆鸞鳳。明窗置刀筆。大案羅縑紉。文字雖幼學。鈍慵今廢忘。不能溫舊習。考古評興亡。覲顏於其間。汗下如流漿。徒然日飽食。出入隨羣行。朝廷此多事。亦合強激昂。況有詔書在。爛然貼北牆。奮舌說利害。以救民膏肓。不然棄硯席。挺身赴邊疆。喋血塵羌戎。胸膽森開張。彎弓射攬槍。躍馬埽大荒。功勳入丹青。名迹萬世香。是亦丈夫事。不爲鼠子量。數事皆不能。徒只飽腹腸。有如鳧雁兒。嗉嗉守稻梁。歲月今逝矣。齒搖髮已蒼。於時旣無益。自合早退藏。諸君天下選。才業吁異常。願當發冊慮。坐使中國強。蠻夷不敢欺。四海無災殃。莫效不肖者。所嚮皆荒唐。又不耐羞恥。但欲歸滄浪。濡毫備歌詠。仰首看翺翔。舟中稍無事。思念益以詳。恨無一稜田。可以足糟糠。出處皆未決。語默兩弗臧。莽不知所爲。大叫欲發狂。作詩寄諸君。鄙懷實所望。

送李生

李生以病廢。東入徂徠峯。志氣尙突兀。形骸已龍鍾。男兒生世間。有如絕壑松。誤爲風雷傷。不與匠石逢。哀哉千尺榦。摧折似秋蓬。

哭曼卿

去年春風開百花。與君相會歡無涯。高歌長吟插花飲。醉倒不去眠君家。今年慟哭來致奠。忍欲出送攀魂車。春輝照眼一如昨。花已破。類蘭生芽。唯君顏色不復見。精魄飄忽隨朝霞。歸來悲痛不能食。壁上遺墨如棲鷗。嗚呼死生遂相隔。使我雙淚風中斜。

贈釋祕演

高車大馬闔上京。釋曰演者何聲名。當年余嘗與之語。實亦可喜無俗情。作詩千篇頗振絕。放意吐出吁可驚。不肯低心事鏘鑿。直欲淡泊趨杳冥。落落吾儒坐滿室。共論慤若木陷釘。賣藥得錢輒沽酒。日費數斗同醉醒。傷哉不櫛被佛縛。不爾烜赫爲名卿。數年不見今老矣。自說厭苦居都城。垂頤孤坐若癡虎。眼吻開合猶光精。雄心瞥起忽四顧。便擬擊浪東南行。開春余行可同載。相與曠快觀滄溟。

城南感懷呈永叔

春陽泛野動。春陰與天低。遠林氣藹藹。長道風依依。覽物雖慙適。感懷翻然移。所見既可駭。所聞良可悲。去年水後旱。田畝不及犁。冬溫晚得雪。宿麥生者稀。前去固無望。卽日已苦飢。老雉滿田野。斲掘尋鳧。此物近亦盡。卷耳共所資。昔云能驅風。充腹理不疑。今乃有毒厲。腸胃生瘡痍。十有七八死。當路橫其尸。犬彘咋其骨。烏鳶啄其皮。胡爲殘良民。令此鳥獸肥。天豈意如此。泱蕩莫可知。高位厭梁肉。坐論攬雲霓。

豈無富人術。使之長熙熙。我今餓伶俜。閱此復自思。自濟既不暇。將復奈爾爲。愁憤徒滿胸。嶮岵不能齊。

吳越大旱

吳越龍蛇年。大旱千里赤。尋常秔稼地。爛漫長荆棘。蛟龍久遁藏。魚鼈盡枯腊。炎暑發厲氣。死者道路積。城市接田野。慟哭去如織。是時西賊羌。凶焰日熾劇。軍須出東南。暴斂不暫息。復聞籍兵民。驅以教戰力。吳儂水爲命。舟楫乃其職。金革戈盾矛。生眼未嘗識。鞭笞血塗地。惶惑宇宙窄。三丁二丁死。存者亦乏食。冤懟結不宜。衝迫氣候逆。二年春及夏。不雨但赫日。安得涼冷雲。四散飛霹靂。霧霏消浸瀉。甘潤起稻稷。江波開舊漲。淮嶺發新碧。使我揚孤帆。浩蕩入秋色。胡爲泥滓中。視此久戚戚。長風卷雲陰。倚柂淚橫臆。

楊子江觀風浪

晚至瓜洲渡。繫舟泊西灣。日落暴風起。大浪得縱觀。憑凌積石岸。吐吞天外山。霹靂左右作。雪灑六月寒。吁嗟至柔物。威壯不可干。若爲神龍憑。氣勢非一端。大艦失所操。翻覆如轉丸。高山雖有路。輟險馬足酸。居朝號安逸。重祿多憂患。爭得清靜交。共騎雙翔鸞。矯翅入赤霄。不見此險艱。奈何蚩蚩衆。共處天壤間。因知古聖人。立法萬世安。濟川作舟梁。鑄鼎窮神姦。朝廷布禮度。粲粲莫可刪。後來漸破壞。所向行路難。凶邪得聘志。物命遭摧殘。視此念古昔。杖藜空盤桓。

中秋夜吳江亭上對月懷前宰張子野及寄君謨蔡大

獨坐對月心悠悠。故人不見使我愁。古今共傳惜今夕。況在松江亭上頭。可憐節物會人意。十日陰雨此夜收。不唯人間重此月。天亦有意於中秋。長空無瑕露表裏。拂拂漸上寒光流。江平萬頃正碧色。上下清澈雙壁浮。自視直欲見筋脈。無所逃遁魚龍憂。不疑身世在地上。祇恐查去觸斗牛。景清境勝返不足。歎息此際無交遊。心魂冷烈曉不寢。勉爲筆此傳中州。

越州雲門寺

翠嶂環合封白雲。中有蕭寺三爲鄰。雲門梁武所作。今分爲三寺相連。老松偃蹇若傲世。飛泉噴薄如避人。蒼猿嘯斷夜月古。丹花開徧陽崖春。盤桓數日不忍去。舟出耶溪猶慘神。

和韓三謁歐陽九之作

予方居憂艱。胸懷積瘡刺。昏明走日月。慘慘絕生意。闔門厭過從。揜耳避時事。韓子我所佳。招我勲有謂。城南訪永叔。共可豁蒙蔽。是時窮陰久。泥淖沒馬鼻。區區不憚遠。飢渴奔高誼。永叔聞我來。解榻顏色喜。殷勤排清罇。甘酸釘果餌。圖書堆滿牀。指論極根柢。伊余昏迷中。忽若出夢寐。劃然毛骨開。精神四邊至。旣歸尙冷然。數日飽滋味。韓子歎不足。作詩暢精義。爛如珊瑚鈎。光豔不可閉。迫余使之和。庶以同氣類。自顧屯鈍極。出語少姿媚。抉剔雖強成。徒使腸胃沸。永叔經術深。爛漫不可旣。雖得終日談。百未出一二。蒼皇逼行役。蕭颯包素志。不日便乖拆。安能訖精粹。他年老門牆。君子無我棄。

城南歸值大風雪

一夜大雪風喧。未明跨馬城南回。四方迷惑共一色。揮鞭欲進還徘徊。舊時崖谷不復見。縱有直道令人猜。低頭搶朔風。兩眼不肯開。時時偷看問南北。但見白羽之箭紛紛來。旣以脂粉傅我面。又以珠玉綴我顛。天公似憐我貌古。巧意裝點使莫偕。欲令學此男女態。免使埋沒隨灰埃。據鞍照水失舊惡。容質潔白如嬰孩。雖然外飾得整好。自覺面目如刀裁。又不知胸中肝膽挂鐵石。安能柔軟隨良媒。世人飾詐我尙笑。今乃復見天公乖。應時降雪故大好。慎勿改易吾形骸。

出京後舟中有作寄仲文韓二兄弟永叔歐陽九和叔杜二

久居倦京塵。歸心日傾寫。扁舟理棹楫。已與峻流下。斷岸如崩山。遠樹若奔馬。回頭雲間闕。出沒見圖畫。還家快雖整。去國傷以乍。況我二三友。眷戀數迂駕。前夕南巷堤。昨日東城舍。論精如可收。意密不見罅。恍忽夢寐中。蕭然已相捨。他人所至樂。惟我氣類寡。迂僻不能鑄。往往自嗟罵。平生居京都。正輩乃知者。異鄉孰與言。救謗定不暇。柔軟衆所佳。佞面誰可借。中懷百憂集。包釀似蘆鮮。身世苦飄浮。歲月不可把。後期浩難知。高吟但悲灑。

大風

秋半收穫登郊原。欹側小屋愁夕眠。是夜大風拔樹走。吹倒南壁如崩山。夢中驚起但呼叫。病僕未動徒

嗷喧驅令燃火徧照燎。瓦甃狼藉滿我前。披衣抱枕欲避去。去此乃是曠野田。況時風怒尙未息。直恐涇渭遭吹翻。露坐不免念禾黍。必已刮刷無完根。六事不和暴風作。嘗聞洪範有此言。昔時大風禾盡偃。上帝蓋直周公冤。方今天子至神聖。惟恐臣下辜其恩。是何此風乃震作。吹盡秋實傷元元。有能返風起禾者。亦足表異知所存。至誠皎潔固不昧。時雖今古同乾坤。

檢書

煩心思所持。屏事入小閣。臨撲下塵梁。侈哆張敗笈。雨爛百數蕃。蟲食三四夾。軒昂醉墨鬧。纖悉新書雜。魚子或破碎。蠶兒尙狎恰。快心伯長文。跋尾清臣榻。幼辭反知進。故句時自愜。墜亡多玩愛。存聚必券帖。疎密交及戚。前後生與殄。誨束儼父師。寒暑布兒妾。謔浪笑忽還。私匿情再接。愴事涕涔涔。憫時歎啗啗。一餉誠寂寞。千里遽會合。遊心到句涌。開眼見蒼雲。京華歷歷復。節物忽忽涉。恍爾驚異方。遁去乃幾臘。回頭厭巖積。舉體覺疲茶。束閣聊欠伸。夢斷風一颯。

別鄰幾子賦高山詩以見意

高山扶層巔。下與地盤結。氣貫不變移。澤枯乃朽裂。有如善人交。生死兩固節。語默無異方。黯沮在爲別。世風隨日儉。俗態逐勢熱。負子好古心。啼歎星斗滅。近得鄰幾生。胸懷貯霜雪。飢渴入冊書。趣向著羈絆。又與斯人離。先日心破折。古也當貽言。在子可捫舌。奈何區區誠。敢以御者說。器成必剏琢。德盛資澡刷。

空文謾徽墨。古訓乃佩玦。帝門急豪英。濟物無自子。

雜興

虎豹性食人。智者畜爲戲。形影本相親。愚夫見而畏。疑同不疑異。遠哉愚與智。

往王順山值暴雨雷霆

蒼崖六月陰氣舒。一霎暴雨如繩粗。霹靂飛出大壑底。烈火黑霧相奔趨。人皆喘汗抱樹立。紫藤翠蔓皆焦枯。逡巡已在天中吼。有如上帝來追呼。震搖巨石當道落。驚嗥時聞虎與羆。俄而青巔吐赤日。行到平地晴如初。回看絕壁尙可畏。吁嗟神怪何所無。

依韻和勝之暑飲

九夏苦炎烈。入伏氣候惡。况茲大旱時。其酷甚炮烙。爭得羿復生。射此赤日落。欲擘青天開。騰身出寥廓。狂走無處逃。坐恐肝腦涸。不如以酒澆。庶可免焦爍。相呼坐僧居。頃刻酬百酌。佳瓜判青膚。熟李吸絳膜。尙嫌味不爽。更與冰雪嚼。裂耳發浩歌。解顏縱善謔。逡趨無何鄉。回覺萬事錯。不知余中虛。外冷得所託。真氣潛遁亡。半夜忽發霍。嘔洩不暫停。迸筋走兩脚。初如巨繩纏。忽似秋蚓躍。委頓體不支。藜牀爲穿鑿。君言暑飲佳。但得一餉樂。艱難逾旬時。僅飲數斗藥。快意事皆然。遺殃慎無作。

答宋太祝見贈

窮冬三日雪。旅腸迫枯餓。不免東郭行。難效袁安臥。我謁故所宜。君來無乃左。復覓長句詩。如留萬金貨。恣睢莫能名。豪橫不可挫。怒犇時旁出。力羸復下墮。使人但驚絕。欲繼誰敢作。況君名家駒。少小聲已播。丈夫氣剛精。不必在長大。譬如利錐末。所向物已破。余資本滯濁。既壯困家禍。區區走俗格。僅若蠅循磨。詩枯實零丁。文僻又坎珂。翹然當路人。顧我甚涕唾。雅意返願交。得無自卑涴。俛首已內傾。撫躬輒私賀。無以答高誼。胸中強搜邏。披豁聊短篇。安足謂酬和。莞爾當棄投。毋留重吾過。

送李冀州詩

冠蓋傾動車馬稠。都門曉送李冀州。冀州綠髮三十一。趨趨千騎居上頭。眼如堅冰面珂月。氣勁健鶻橫。清秋不爲膏梁所汨沒。直與忠義相沉浮。干戈未定民力屈。此行正解天子憂。男兒勝衣志四海。實恥坐得萬戶侯。旆旌明滅朔野闊。笳鼓淒淒斷風愁。孤雲南飛莫回首。下有慈親雙淚眸。自古忠孝不兩立。功名及時乃可收。衆人刮目看能事。著鞭無爲儒生羞。

和鄰幾登繁臺壇

孝王有遺墟。寥落千年餘。今爲太帝宅。復此繁華都。踊髻冠舊丘。西人號浮圖。下鎮地脈絕。上與雲煙俱。我來歷初級。穰穰瞰市衢。車馬盡螻螳。大河乃污渠。躋攀及其顛。四顧萬象無。迥然塵盆隔。頓覺襟抱舒。俄思一失足。立見糜體軀。投步求自安。不暇爲他謨。平時好交親。豈復能邀呼。舉動強自持。恐爲衆擲揄。

一身雖蹙高。爭如且平居。君子不倖險。吾將監諸書。

依韻和伯鎮中秋見月九日遇雨之作

衆皆愛春發。枯葦我知惟。動兒女懷。天地昏酣醉夢裏。人有爽思皆沉埋。豈如秋風勁。利劍剗破天。膜清光開。衰根危蒂。掃除盡。辨別松竹并蒿萊。青娥供霜洗夜月。兼以皓露驅纖埃。常年此夕或陰晦。今歲澄徹特快哉。是時呼賓賞此景。漸見照我白玉杯。清輝向人若有意。經歷窗戶猶徘徊。放歌狂飲不知曉。爛熳酌客山嶽頽。時節飄流晦朔轉。已覺九日來相催。北軒隙地破蒼蘚。帶花移得黃金栽。倒冠露頂坐狂客。擷香咀蕊浮新醅。最憐小雨灑疎竹。爽籟颯颯吹醉顛。君時傳詩頗精麗。意苦泥淖不得來。開緘文采自飛動。欲和但愧頑無才。久之詎免強爲答。嫌春愛秋真可哈。

夜聞秋聲感而成詠同鄰幾作

八月天氣肅。萬物日已闌。庭前兩高桐。夜籟如哀絃。志士感節物。中夕耿不眠。起聽抱膝吟。悲烈聲相干。念此華葉改。想見顏色鮮。顧人生世間。榮悴理亦然。豈傷歲月速。愧無功名傳。少小學文章。出值用武年。儒官多見侮。敢爲戰士先。欲棄俎豆事。強習孫吳篇。迂鈍不可爲。屈曲性亦難。虛言盜祿食。實又畏上天。未能追世好。且樂樽酒閒。九日近不遠。同醉黃花前。

和聖俞庭菊

不謂花草稀。實愛菊色好。先時自封植。坐待秋氣老。類粧翠羽枝。已喜金罍小。嚴霜發層英。益見化匠巧。搖疑光艷落。折恐叢薄少。一日三四吟。一吟三四遶。賞專情自迷。美極語難了。得君所賦詩。爛漫愜懷抱。朗詠償此心。清樽爲之倒。

答梅聖俞見贈

自嗟處身拙。與世嘗齟齬。至於作文章。實亦少精趣。低摧朝市間。所向觸謗怒。夫子與衆殊。琢飾旣佳句。將然紙上動。讀畢恐飛去。自覺異平居。恍惚忘世故。迥如出泥塗。熏滌失臭污。衣之青霞裾。飲以紫蕊露。輜軒駕飛黃。蹠蹠上夷路。士貴知者稀。流俗豈足顧。雅意雖可珍。三復未敢報。退慚百不堪。尙恐君悔誤。

舟至崔橋士人張生抱琴攜酒見訪

晚泊野橋下。暮色起古愁。有士不相識。通名叩余舟。鏗鏗語言好。舉動亦風流。自鳴紫囊琴。瀉酒相獻酬。余少在仕宦。接納多交遊。失足落坑窞。所向逢戈矛。不圖田野閒。佳士來傾投。山林益有味。足可銷吾憂。

維舟野步呈子履

白日出高岡。遠野春氣動。蒼鳩鳴相歡。幽草色已弄。繫舟大河曲。登步目一縱。逍遙翫物華。所樂與君共。已忘竄逐傷。但喜懷抱空。古人負才業。未必爲世用。吾儕性疎拙。擯棄安足痛。四顧不見人。高歌免驚衆。

滯舟

落照滿長河。流水暖冲融。中有鳧鷖羣。上下隨和風。捕魚沒淺浦。矯翅入紫空。嬉遊意自得。肯顧冥冥鴻。伊余何所適。舟滯數見窮。十步九暗灘。咫尺不可通。獠工裂吻噪。捨楫將何從。巨絙挽屢斷。有如拔山峯。夕憂寇盜至。蹶弩映岸叢。徊徨但搔首。歎息無所容。曾無烏禽樂。虛在人曹中。

過濠梁別王原叔

交道今莫言。難以古義責。錙銖較利害。便有太行隔。予生性闊疎。逢人出胸臆。一旦觸駭機。四向盡戈戟。平生朋游面。化爲虎狼額。謗氣慘不開。中者苦病疫。遂令老成人。坐是亦見斥。旣出芸香署。又下金華席。摧辱實難任。官名亦非惜。罪始職於予。時情未當隙。今來濠川涯。日夜自羞惕。高風激頽波。相遇過疇昔。白壁露肺肝。晴雲見顏色。乃知天壤間。自有道義伯。明日又告行。吁嗟四海窄。

尹子漸哀辭有序

予昨得罪。子漸數相過。感慰激切。恐予重得罪於朝也。其意結括避慎。非昔時子漸也。與之劇飲。則必作薤露長歌。舉音淒斷。坐中不忍聞。已而有厭苦世故之說。予謂死者人之所惡。子何樂焉。對曰。吾未嘗死。安知死之不樂也。生理局促不足樂。見之矣。旣別才百餘日。子漸化去。豈其魄兆歟。予始聞之。怛然震起。爲出涕。徐又追其緒言。作哀辭以寄執紼者。

漂流江湖外。負罪氣慘悽。况聞故人死。驚呼不成啼。當案舍七筯。緬懷大河西。箴言尙在耳。鏗若環珮隨。

志氣凜已失。神魂飄何之。昔云死者樂。復以生爲悲。予知達士懷。將以二物齊。今也果何如。無乃往意迷。荆棘飽雨露。叢蘭委汙泥。紫鸞忽腸絕。永年賦狐狸。天理滌難聞。我意多乖睽。哀吟蒼山闕。注目白日低。不得慟寢門。雪涕江上隄。

天平山

吳會括衆山。戢戢不可數。其間號天平。突兀爲之主。傑然鎮西南。羣嶺爭拱輔。吾知造物意。必以屏大府。清溪至其下。仰視勢飛舞。偉石如長人。聚立欲言語。捫蘿緣險磴。爛漫松竹古。中腰有危亭。前對紺壁舉。石竇落玉泉。冷冷四時雨。源生白雲間。顏色若粉乳。早年或播灑。潤可足九土。奈何但泓澄。未爲應龍取。予方棄塵中。巖壑素自許。盤桓擇雄勝。至此快心膂。庶得耳目清。終甘死於虎。

奉酬公素學士見招之作

人生交分恥苟合。貴以道義久可要。世俗盈虛逐勢利。清風綿邈日以凋。長吟宇宙獨引領。浩浩萬古與我遙。安得此身有兩翅。颯然遠舉隨風飄。近逢公素我同好。厭憤偷俗常鬱陶。君方謫官鎮京口。我以重罪廢本朝。身雖俱在大江外。不得會合煩相邀。秋風八月天地肅。千里明迥草木焦。夕霜慘烈氣節勁。激起壯思衝斗杓。豈如兒女但悲感。唧唧吟歎隨螳蜎。擬攀飛雲抱明月。欲踏海門觀怒濤。念君治所近不遠。江山蟠闕氣象豪。樓頭陰明變霞霧。檻下日夕鬪蜃蛟。便將一往刷滯悶。去興草苗不可休。呼兒襆衣

辦舟楫。一日百里。豈憚勞。君方酒酣。亦思我。奔墨紙上爲長謠。上言風物麗復壯。下述宴集樂且遨。意我
羈愁正無賴。欲以此事相誇招。此篇筆絕墨未滲。我舟適到范老橋。古人千里有神會。以茲可信非相遼。
偶然不以窮見棄。曠然不以位自驕。開緘朗詠毛髮竦。通夕噤瘁睫不交。病膜誰將寶篋刮。痒背恰得仙
人抓。長川奔渾走一氣。巨鎮截嶺上赤霄。又如陰雲載雷電。光怪迸漏不可包。驚呼歎伏已不暇。焉敢有
意爭其高。卻疑欺我老困頓。故作大句來相慶。近罹罪辱舌雖在。每避嫌謗口已膠。更遭掀攪豈不畏。欲
取筆硯俱焚燒。旣承嘉命敢無報。將吐復茹移昏朝。留連日日奉杯宴。殊無間隙吟風騷。看君岸幘卷大
白。有似巨浸吸百潮。賓從傾頽尙未厭。直恐潰爛腸與脣。神迷耳熱眼生纈。嚼盡寶壓狂醒消。歡流樂極
古所誠。不免厭旦潛遁逃。還家數日卻愁寂。夢中猶奉笑與嘲。強爲短篇答高誼。鄙思軋軋空自撓。覽之
捧腹定絕倒。幸爲投棄毋傳抄。相思復思往相會。予今豈復如繫匏。行看雪夜景清絕。更乘逸興飛輕舸。

遷居

前歲旅淮楚。去年還上都。上都一歲內。前後七徙居。歲暮被重譎。狼狽來中吳。中吳未半歲。三次遷里閭。
京師重騰移。長物動數車。江湖亦稍便。一舟已有餘。破壞新器皿。散亡舊圖書。家人頗倦煩。行路亦歎呼。
吾知人之生。天壤乃遽廬。其間暫寄寓。一世還須臾。縱遊極南北。所歷足自娛。猶恨苦滯淹。舉動攜妻孥。
□□出八極。浩與元氣俱。仰首羨日月。晨夕苦奔趨。二物本無情。亦爲氣所驅。况我有血肉。又生名利區。

手足日不閑。在地無根株。流宕固宜矣。何必厭道塗。此身亦外物。安用傷羈孤。庸人所見狹。但以鄉井拘。屑屑寸粒食。何異雞在笊。擬隨犯斗槎。欲上浮海桴。寄語懷安者。嗟嗟爾何愚。

若神棲心堂

予心充塞天壤間。豈以一物相拘關。然放一物無不有。遂得此身相與閒。上人構堂號棲心。不欲塵累相追攀。冷灰槁木極潰敗。雖有善迹輒自刪。予嘗浩然無所撓。與子異指亦往還。卷舒動靜固有道。期於達者誠非艱。

郡侯訪予於滄浪亭因而高會翌日以一章謝之

荒亭俗少遊。遷客心自愛。繞亭植梧竹。私心亦有待。昨朝千騎來。趨趨擁林外。水禽駭笳鼓。野老瞻車蓋。公餘喜靜境。賓至因高會。跋石已行庖。臨流聊褫帶。優遊鄙情通。放曠未禮殺。酒醇引易醕。肉美舉必嘬。千臠恣食雞。二螯時把蟹。解顏閒善謔。傾耳得嘉話。暮夜歡未厭。徘徊意將再。見跋已矐騰。跨鞍極倒載。明日尙狂醒。嘉貺不遑拜。

送關永言赴彭門

鄙性背時向。處身介且迂。自固以爲節。人皆指爲愚。少年宦京邑。與衆頗異涂。一朝被放棄。漂然落江湖。江湖信美矣。心迹益更孤。永言金閨彥。器識當世無。機發弦上矢。辯走盤中珠。高風落溪山。恥與勢利趨。

殊科二十年。不肯仕京都。顧我窮悴者。一笑情相於。日日奉盃宴。但覺懷抱攄。瓊瑤照坐席。內顧瓦礫麤。未飲心自醉。相對氣已舒。得忘羈旅憂。蓋以道義俱。雲間宿古寺。花下招歌姝。勝境尋已遍。賞心未嘗辜。璽書趣赴治。候吏擁舳舻。秋風卷大旆。喧喧指東徐。郊亭對別酒。我獨增悲吁。人生大塊間。氣類有萬殊。賢愚各有合。唯予邈無徒。君子誤見知。交契若勘符。一旦又睽索。千里成闊疎。期君早自奮。佐時發雄圖。功成速收身。單舸還東吳。白頭青林下。罇酒相從娛。

夏熱晝寢感詠

盛夏日苦永。解帶坐小軒。對案不能食。揮汗白雨翻。軋軋過午景。宛轉無由昏。偃臥一榻上。既覺復夢魂。恬然世慮寂。時被蒼蠅喧。睡味勝仙去。忽悅難俱論。晨事如隔日。半雜夢寐言。人生貴壯健。及時取榮尊。夏禹惜寸陰。窮治萬水原。櫛沐風雨中。子哭不入門。况復庸下者。不出強趨奔。奈何但耽寢。懶惰守壤垣。念昔年少時。奮迅期孤鶩。筆下驅古風。直趣聖所存。山子逐雷電。安肯服短轅。使將決渤澥。出手洗乾坤。文章竟誤身。大議誰周爰。掉首下牢獄。殖殖如孤豚。法吏使除籍。其過祇一殮。賓朋四散逐。投竄向僻藩。九虎口牙惡。便欲膏其躡。上賴天子明。不使鉗且髡。此身自流浪。豈能濟元元。天下無所歸。汎舟旅江村。春雨看秧稻。落日自灌園。殊鄉寡朋友。孰辨石與珉。卷藏經濟術。強談奉狙猿。閒困尙有待。不忍沉湘沅。大暑晝閉戶。一徑惡草繁。出嫌烏啤噪。行見蛇蜿蜒。蠹書徒盈篋。濁醪徒盈樽。談笑誰可共。道義孰與敦。

終日對稚孺。千里遠弟昆。此心既無用。不寢徒自煩。况茲晝景長。但厭枕簟溫。北窗無纖風。返見赤日痕。流光何輝赫。獨不照覆盆。會當破氛祲。血吻叫帝閭。爛爾正國典。曠然滌羣冤。姦讒囚大幽。上壓九崑崙。賢路自肅爽。朝政不復渾。萬物宇宙間。共被陽和恩。

哭師魯

前年子漸死。予哭大江頭。今年師魯死。予方旅長洲。初聞尙疑惑。涕淚已不收。舉盃欲向口。荆棘生咽喉。憶初定交時。後前穆與歐。君顏白如霜。君語清如流。予年又甚少。學古衆所羞。君欲舉拔萃。聲耦日抉搜。不鄙吾學異。推尊謂前修。今踰二十年。迹遠心甚稠。後會國南門。夜談雪滿樓。青燈照素髮。酒闌氣益遒。昨君握兵柄。節制關外侯。予才入冊府。俄作中都囚。飛章力辨雪。危言動前旒。時雖不見省。凜凜壓衆媮。旋聞君下獄。六月送渭州。渭州舊治所。昔擁萬貔貅。堂中坐玉帳。堂下森蛇矛。令嚴山石裂。恩煦春色浮。豐生無根牙。衆言起愆尤。返來入狴犴。吏對安可酬。法冠巧追拍。刺骨不肯抽。削秩貶漢東。驅迫日置郵。窮途無一簣。百口誰相賙。諸子繼死亡。清血漬兩眸。貿然幾喪明。憤苦結不瘳。君性本剛峭。安可小屈柔。暴羅此冤辱。苟活何所求。人間不見容。不若地下遊。又疑天憎善。專與惡報讎。二豎潛膏肓。衆鬼來擲麻。棄局奔南陽。後事得所投。心膽尙卓犖。精明已彌留。生平經緯才。蕭瑟掩一丘。青天自茫茫。長夜何悠悠。萬物孰不死。死常在嚴秋。君齒方盛壯。衆期樹風猷。二邊況橫猾。四海皆瘡疣。斯時忽云亡。孰爲朝廷憂。

予方編吳氓日自親鋤耨無緣匍匐救兀兀空悲愁時思莊生言所樂唯蠲體物理不可詰此說誠最優

和永叔瑯琊山庶子泉陽冰石篆詩

一氣破散萬事起獨有篆籀含其真周鼓秦山壞已久下至唐室始有人宗臣轉注得天法質雖渾厚氣乃振人間所存十數處豐疎異體世共珍其中琅琊石泉記比之他法殊不倫鐵鎖關連玉鉤壯曲處力可掛萬鈞復疑蛟虬植爪角隱入翠壁蟠未伸近來俗眼苦不賞唯有風月時相親紫微仙人謫此守此地勝絕舊喜聞公餘往觀領賓從獵獵畫隼搖青春遠休車騎步泉側酌泉愛篆移朝昏揮弄潺湲玩點畫情通恍忽疑前身作詩緘本遠相寄邀我共賦意甚勤昨承見教久閣筆壓以大句尤難文

水叔近以書戒予作

詩·高風勝事日傾倒安得身寄西飛雲

答章傳

廢官旅吳門迹與世俗埽構亭滄波間築室喬樹杪窮經交聖賢放意狎魚鳥志氣內自充藜藿日亦飽不圖名利場有士同所好南閩章其氏傳名字傳道清晨闔予門疎爽見姿表大篇隨自出爛漫風力老安敢當所褒讀之欲驚倒開軒延與語指亦有深到半生踏京塵識予恨不早扶疎珊瑚枝本不自彫巧當珍玉府中何故委衰草秋風還故鄉無或難枯槁貴富烏足論令名當自保

寒夜

九河巨凍流長山。山高微黯石色頑。沙籠如煙吐朱灣。中天撻鼓雲垂關。壺炙不溫乳烏死。城上琴聲愁九子。羅幕翻風花滿波。玉塵灑窻溼明綺。獸角消紅犀鳳乾。縷生篆字香盤盤。坐聆翰音拂南極。馳念疆場中已酸。欲決沉雲叫陰帝。虜滅不使天下寒。

送施秀才

賤生罹凶喪。日與死亡逼。羈孤困猜嫌。動步畏蛇蝎。之子脫俗情。平生未相識。足繭千里來。顧我喜顏色。衣裘風霜凋。顏髮塵土蝕。開席揖之坐。意勤語膈塞。徐徐動辭氣。突兀露胸臆。紺囊出文章。發覆見寶碧。自羞無所有。曷以報相德。告行東風前。花草正狼藉。又無一樽酒。澆沃慰遠客。扁舟下長淮。企立空歎息。

送韓三子華還家

人在天壤間。共爲氣驅逐。歲月自崩奔。冉冉若轉轂。榮樂隨雲煙。凋零共草木。亨屯固常物。達者安可速。奈何此軀骸。未免混世俗。前年奔大凶。况復墮手足。零丁旅山陽。逐熱聚衰族。相逢眼盡白。閉戶甘退縮。左丞鎮京毫。相去路重複。數遣令子來。千里弔荼毒。子華勇此行。東下甚匍匐。入門未及言。相向且慟哭。嗟我顏色枯。鬢蒼髻雙禿。相別始踰年。世事何反覆。晤言出古表。但覺白日速。勘書春雨靜。煮藥夜火續。襟懷兩澄淡。炯炯抱明玉。時苦外物喧。又嗟別期促。和風送歸帆。盍動淮氣綠。早寄別後篇。微吟慰孤獨。

觀放陸

沉沉滄淮口。植木限衆流。啓閉固有時。出納千萬舟。眷予懷抱昏。羈別相牽鉤。觀此巨派注。頗覺滯悶瘳。喧騰怒霆起。始駭久不收。旣前目眩轉。足縮不敢留。朔雪下噴薄。散爲白霧浮。上懸赤油幕。旁斷縹玉旒。恐激地軸轉。人有魚鼈憂。驚嗟勢力壯。孰謂此物柔。吾思作至監。實以處上游。又欲接之口。沃蕩胸中愁。俄然漸枯涸。哮爾空泥溝。淳湫旣因人。開洩豈自由。立間見底裏。咄哉爲爾羞。

金山寺

孤峯湧滄江。突兀臺殿積。驚波四面起。日夜走礮礮。陰壑瀆風雲。陽崖產金碧。離披萬年樹。根抱太古石。脩廊轉峻閣。窈窕壓山脊。寶像浮海來。珠纓冷光滴。叩欄見鼉鼉。揚首意自得。偃蹇互出沒。日此飽餘食。又有翠羽禽。羣飛喜賓客。口銜紺蒂花。近我若相識。開軒必心絕。上下無異色。氣象特清壯。所覽輒快適。余心本高灑。誤爲塵土隔。不知人間世。有此物外迹。落日將登舟。低回空自惜。

秋夜

新秋積雨後。夜聞蚯蚓聲。似爭絡緯繁。不讓蟋蟀清。嗟爾微陋物。身與土壤并。藐然本無心。天時使之鳴。空庭雜槁葉。亦能感人情。老蛟蟄污泥。寂嘿不自驚。一旦走霹靂。飛雨洗八紘。幽蟠孰可聞。自有濟物誠。歲若弗大旱。此志豈忘行。

送黃莘還家

東風搖江波。碧草日夜芳。藹藹春物歸。遊子思故鄉。黃生士林華。志業收精剛。虎步南山隈。氣立衆獸旁。不肯受羈轡。但欲插翅翔。顧亦念所親。歸心劇風檣。想當舍檝初。喜氣充門墻。晨昏奉顏色。以時薦豆觴。雖享萬鍾祿。此樂不可償。予家白日出。偶來戀滄浪。因君江上別。撩我歸興長。

和菱磨石歌

滁州信至詫雙石。云初得自菱水濱。長篇稱夸語險絕。欲使來者不復言。畫圖突兀亦頗怪。張之屋壁驚心魂。麒麟才生頭角異。混沌雖死竅鑿存。瑯琊之郡褊且僻。得此固可駭衆觀。予嘗飛帆入震澤。窮探異境登龜鼉。太湖二山名。最出怪石。居民百戶石爲業。日夜采琢山不貧。山前森列戰白浪。猶似萬百鐵馬羣。雨昏浪打歲月古。千株萬穴僵復奔。自嗟才力本衰弱。安敢抵敵爲之文。况茲出產極易致。鄉俗見慣不甚尊。彼以至少合貴重。胡爲久棄如隱淪。偶逢精識見獎拔。衆目今乃稱奇珍。百人擁持大車載。城市觀走風濤翻。立於新亭面幽谷。共爲澡刷泥沙痕。涼泉下照嘉樹陰。翠影澄澹留煙雲。裹以篇章繪縑素。積歲汨沒一日伸。苟非高賢獨賞激。終古弃臥於窮津。世人愛憎逐興廢。使我吟歎傷精神。

頂破二山詩

北邑有頂山下潛子母虬。其子去爲雨。以救鄉人憂。前擘穹峯開。化出百丈湫。後因號破山。致祠獻庶羞。歲來省其母。風雹六月秋。煙雲騰踏去。不復經月留。邑民賴其靈。雖旱歲有收。因成兩佛宇。幽邃號勝遊。

礪泉走鸞車。松桂擁石樓。夜堂人噤滲。陰壁風颼颼。近年返暴雨。頗亦傷田疇。老農務祈禱。梵唄日不休。常爲釋徒利。乃作生民讎。嗚呼二虬者。其說何悠悠。

永叔石月屏圖

日月行上天。下照萬物根。向之生榮背則死。故爲萬物生死門。東西兩交征。晝夜不暫停。胡爲號山石。留此皎月痕。常存桂樹散疎陰。有若圖畫成。永叔得之不得曉。作歌使我窮其原。或疑月入此石中。分此兩曜三處明。或云蟾兔好溪山。逃遁出月不可關。浮波穴石恣所樂。嫦娥孤坐初不覺。玉杵夜無聲。無物來擣藥。嫦娥驚推輪。下天自尋捉。遠地掀江踏山岳。二物驚奔不復見。留此玉輪之迹在青壁。風雨不可剝。此說亦詭異。予知未精確。物有無情自相感。不問幽微與高邈。老蚌向月月降胎。海犀望星星入角。彤霞爍石變靈砂。白虹貫巖生美璞。此乃西山石。久爲月照着。歲久光不滅。遂有團團月。寒耀籠籠出輕霧。坐對不復嗟殘缺。蝦蟆縱汝惡。豈可能食此清光沒。玉川子若在。見必喜不徹。此雖隱石中。時有靈光發。土怪山鬼不敢近。照之僵仆肝腦裂。有如君上明。下燭萬類無遁形。光豔百世無虧盈。

演化琴德素高昔嘗供奉先帝聞予所藏寶琴求而揮弄不忍去因爲作歌以寫其意云

雙螭老師古突兀。索我瑤琴一揮拂。風吹仙籟下虛空。滿坐沉沉竦毛骨。按抑不知聲在指。指自不知心所起。節奏可盡韻可收。時於疎澹之中寄深意。意深味薄我獨知。陶然直到羲皇世。曲終瞑目師不言。忽

言昔常奉至尊。祥符天子政多暇。詔求絕藝傳中閣。紫宸伏退霜日紅。隨鞭入對蓬萊宮。平戎一弄沃舜聰。貂璫壁立亦動容。紫蘭之袍出禁府。聲華一日千門通。今來老病臥澤國。賞音不遇前事空。一雙玉鶴天上飛。人間但見枯死桐。幸逢寶器愜心手。因聲感舊涕灑胸。顧我踟躕不忍去。將行更欲留悲風。

寄王幾道同年

新安道中物色佳。山昏雲淡晚雨斜。眼看好景懶下馬。心隨流水先還家。步頭浴鳧暖出沒。石側老松寒交加。懷君覽古意萬狀。獨轉澗口吟幽花。

田家詞

南風霏霏麥花落。豆田漠漠初垂角。山邊夜半一犁雨。田父高歌待收穫。雨多蕭蕭蠶簇寒。蠶婦低眉憂繭單。人生多求復多怨。天公供爾良獨難。

丙子仲冬紫閣寺聯句

白石太古水。才蒼崖六月冰。昏明咫尺變。美身世逗遛增。橋與飛霞亂。才人兼獨鳥升。風泉冷相搏。美樓閣暮逾澄。反復青冥上。才躋攀赤日稜。唄音充別壑。美塏影弔寒藤。仙掌掛太一。才佛壇依古層。巖喧聞鬪虎。美臺靜下饑鷹。晴檻通年雨。才濃蘿四面疊。日光平午見。美霧氣半天蒸。潭碧寒疑裂。才鍾清遠自凝。陽陂冬聚筍。美陰壁夏垂繒。有客饒佳思。才高吟出遠凭。雄心翻表裏。美遠目著軒騰。岑寂來清夜。才

沉冥接定僧。宿猿深更杳。美子落木靜相仍。松竹高無奈。才煙嵐翠不勝。甘酸收脫實。美子坳隩布清勝。北野纔沉著。南天更勃興。恣睢超一氣。才醜黠起孤鵬。並澗寒堪摘。看雲重欲崩。行中向背失。美子呼處下高應。庭樹巢金爵。樵兒弄玉繩。斷香浮缺月。才古像守昏燈。乳管明相照。莎髯綠自矜。深疑嘯神物。美子歛欲敵肴陵。俯仰孤心撓。回翔百感登。畫圖風動壁。詩句涕霑膺。先公有留題。在澄心閣。歲月看流矢。才心腸劇斷絙。追攀初有象。悲潰遂相乘。故賞知無遁。遺靈若此憑。依然忍回首。美子愁絕下峻嶒。才

水輪聯句十六韻

痛矣真源喪。紛紜物象來。美子水輪今若此。世事亦宜哉。才上下車交輻。周旋斗轉魁。美子咸淵日微墮。仙窟月初開。才旁柅從爲用。垂絙重亦回。柄多初不曉。機密暗相該。美子圃外滄浪洩。庭間霹靂摧。玉飛千仞表。纓掛九泉隈。才翻覆殊難定。牽連巧自媒。建瓴今比速。抱甃此相哀。美子平眠曾無覺。深窺遂可猜。團團釋子壁。軋軋鴈王臺。才解見陶埏運。寧觀將轂推。造端緣有發。汲用始知材。美子本異道家意。定遭怡士哈。轉圓非雅具。欵器有深災。才持滿忘前監。相傾自下催。流風無以復。視此一徘徊。美子

薦福增聯句

躡壁皇都壯。才盤基紫宙雄。山河供遠目。王簷戶發高風。梯險三休上。美子輪開一氣中。門當谷子午。才影落陌西東。韻鐸翻天籟。緯危觚駐夕紅。側聆悲下俗。美子仰面識長空。絕若神擠至。才深疑壑暗通。人寰如

蟻垤繹 身世甚秋蓬。歎息興亡地。美子 沉吟製作工。清思抱明月。狂欲把飛鴻。去矣登臨興。美子 巍乎造化功。
涼襟當爽塏。幽意入鴻濛。頭角峯如揖。繹 丹青樹不同。城郭回迤邐。閣殿失穹隆。可使孤懷放。美子 胡爲萬
恨終。何當得壯士。提取出塵籠。美子

悲二子聯句 穆修伯長 凌孟陽伯華

有客自遠方。來以二子說。穆子病疾初。家事巨細缺。鄰人苦其求。美子 醫師久已決。案孟小大空。布被旁午
裂。餘喘尙能鼓。美子 老憤知已結。目淒望羊泓。髭斷反蝟苗。憂酸繫餘生。美子 嗥嗥留永訣。語妻後日計。書策
未可徹。教子立世資。美子 圓曲勿自說。吾屬何流離。衆人方草竊。凌子久道路。美子 十口著羈屑。恰枵重江間。
正值大飢節。旣無裹飯交。美子 疾走繼羸羸。又無執漿人。及時沃枯渴。惜哉損天命。美子 痛焉在親經。帝胡生
爾身。世復稱其傑。胸伏氣萬丈。美子 腸貯怨百折。艱難泊風波。憔悴墮霜雪。久僕勤龍鍾。美子 弱女癡蹙。文
隨寒餓空。道與煙焰滅。魂兮竟何歸。美子 去矣不得別。長府豈無財。莫濟醫藥切。太倉豈無粟。美子 莫解腹腸
熱。天子聖在上海內。清欲徹。伊人胡不官。美子 旣死安得活。朝青與暮紫。神喜天不軋。昂車與怒馬。美子 門滿
道不絕。之子苟間廁。斯民迺食養。高亢世弗親。美子 方嚴鬼所掣。敢言足才珍。寧免否來齧。思潛淚輒抽。美子
慘舊面成羞。舉目此牢落。側身今鄙媠。箴言耳空虛。美子 險論口歛。作詩告石梁。聊以慰寒骨。美子

地動聯句

大荒孟冬月。才末旬高春時。日腹昏盲偃。美子風口鳴嗚啞。萬靈困陰戚。才百植嗟陽衰。濃寒有勝氣。美子大

凍無敗期。六指忽搖拽。才羣蹠初奔馳。九銅落蟾吻。美子始異張渾儀。列宿犯天紀。才預驗漢志辭。民薨函

鼓舞。美子禁堞強崩離。坐駭市聲死。才立怖人足踣。坦途重車債。美子急傳壯馬歎。陵阜動撫手。才礫塊當揚

箕。停汚有亂浪。美子僵木無靜枝。衆啄不暇息。才杳嶂驚欲飛。踊墮撼鐸碎。美子安流蕩舟疲。倒壺喪午漏。才顛巢駭眠鴟。居人眩眸子。美子行客勞鬪兒。南北頓儵忽。才西東播戎夷。四鎮一毛重。美子百川寸涔微。斗藪

不知大。才軒幹主者誰。共工豈復怒。美子富媪安得爲。寧無折軸患。才頓易崩山悲。衆蟄不安土。美子羣毛難

麗皮。驚者去靡所。才仆或如見擠。轟雷下簷瓦。美子決玉傾倉粢。雙顛太室吻。才四躍宸庭螭。萬宇變旋室。

美子百城如轉機。念此大菑患。才必由政瑕疵。勝社勇厥氣。美子孤陽病其威。傳是下乘上。才亦曰尊屈卑。夫

惟至靜者。美子猶不可保之。況乃易動物。才何以能自持。高者恐顛墜。美子下者賞鎮綏。天戒豈得慢。才肉食

宜自思。變省孽可息。美子損降禍可違。願進小臣語。才兼爲丹扈規。偉哉聰明主。美子勿遣地動詩。才

瓦亭聯句

陰霜策策風呼號。羌賊膽開凶焰豪。美子赤膠脆折乳馬健。漢野秋稔黃雲高。才驅先老佺伏壯點。裹以山

壑鬼莫招。美子烽臺屹屹百丈起。但報平安搖桔槔。才喜聞羸師入吾地。主將踴躍士隨驕。美子神鋒前揮擁

勝勢。橫陣立敵俱奔逃。才不知餌牽落檻穽。一麾發伏如驚颿。美子重圍八面烏難度。相顧無路惟青霄。才

形窄束甲刺骨。皆裂不復能相慶。美子棄兵袞袞。今不殺部曲。易主無纖罽。才慟哭皇天未厭禍。空同無色勁氣消。美子狂童得志賤物命。隴上盤馬爲嬉遨。才蒼皇林間健兒婦。剪紙瀝酒呼嗷嗷。美子將軍疾趨占葬地。年年載柩爭成嶠。才朝廷不惜好官爵。絳蜜刻印埋蓬蒿。美子三公悲吟困數敗。車上輕重如鴻毛。才白衣壯士氣塞腹。憤勇不忍羞本朝。美子重瞳三顧可易得。亮輩本亦生吾曹。才窮居哀牢厭咄咄。歲月奔激朱顏彫。美子當年請行大明下。今日頽墮思南巢。才陽羨溪光逗蒼玉。尺半健鯽煙中跳。便欲買田學秧稻。不復與世爭鎬毫。奈何三世奉恩澤。肯以軀身辭枯焦。才以知出處繫大義。一飯四顧情如燒。賀蘭磨劍河飲馬。頸繫此賊期崇朝。歸來天下解倒掛。玉色藹藹宸歡饒。才筆傾江河紙雲霧。歎頌天業包陶姚。美子

淮上喜雨聯句

江淮經歲早。春暮忽然雨。美子亂點踰廣津。散灑入原土。才萬物氣稍蘇。厲妖莫能聚。美子羣山洗故塵。紫翠坐可數。才昏如籠纖紗。媚若映紺縷。美子碧瓦南崦中。重疊出迥覩。才扁舟凌空飛。白鳥入煙舞。美子遙林動新滋。顏色若可取。才碧草弄微芳。低昂欲來語。美子繁聲過沙頭。上下謳鷓鴣。才濃淡新畫成。快愜久病愈。美子念此時多虞。豈得歲少阻。才焦心閔疲農。虛口待香稌。美子縣吏事凶貪。氣若解縛虎。才惟於縱誅斂。乃能奮怒武。美子青天雖云明。疑不照艱苦。才此時忽霧霈。知有神物主。美子不然諸蒼生。性命委草莽。才本蹶邦豈寧。皮去毛安附。美子歌此告巨公。行當視前古。才

和石曼卿明河詠

八月銀河好。天高夜自明。樓臺通迥意。風露得餘清。幾爲浮雲亂。都宜小雨晴。離人強回首。耿耿邈無情。

師黯以彭甘五子爲寄。因懷四明園中此果甚多。偶成長句以爲謝。

憶向江東大守園。猗猗甘樹蔽前軒。風搖玉蕊霏微落。霜發金衣委墜繁。枕畔冷香通醉夢。齒邊餘味滌吟魂。天彭路遠無因得。猶賴君心記舊恩。

遊洛中內

洛陽宮闕鬱嵯峨。千古榮華逐逝波。別殿秋高風浙瀝。後園春老樹婆娑。露凝碧瓦寒光滿。日轉觚稜暖豔多。早晚金輿此游幸。鳳樓前後看山河。

送家靜及第後赴官清水

幾年塵土客京華。一日春乘犯斗槎。夢好夜歸全蜀道。眼明朝宴上林花。白頭佐邑非爲晚。藍綬還鄉亦可誇。况有雄圖看悟主。莫傷孤宦向天涯。

靜勝堂夏日呈王尉

虛堂吏事稀。吟臥欲忘機。窻靜蜂迷出。簾輕燕誤飛。煩心傾晚簟。倦體快風衣。更想霜雲外。同君看翠微。

黎生下第還鄉

人云之子賢。文采出巴川。失意聲名在。還家歲月遷。離懷春色裏。歸路夕陽邊。無廢青箱學。窮愁古亦然。
春日晚晴

人言春雨好。更好晚來晴。樹色通簾翠。煙姿著物明。得泥初燕喜。避弋去鴻輕。誰見危欄外。斜陽盡眼平。
遊南內九龍宮

昔帝龍驤後。因池大此宮。簫笳疊終日。旌仗展無窮。繪塑神靈集。飛潛爪角雄。陰軒常隱霧。暗堵亦含風。巨盜來移國。天王遽避戎。蒼黃狩巴蜀。倏忽陷河潼。閣殿回看遠。塵氛久見蒙。歸來故基在。不與往時同。疊瓦煙間碧。新蕈露下紅。波春蕩初月。沙晚發悲鴻。世變今無復。人愁杳莫終。樹穿瑤甃裂。碑碎玉樓空。九曲皆遺石。諸王祇斷蓬。興亡何足問。一一夕陽中。

送陳進士遊江南

昔也衣裾已化塵。驅車今去涉驚津。淮天蒼茫背殘臍。江路逶迤逢舊春。時有飄梅應得句。苦無蒸酒可霑巾。歸來莫戀溪山勝。楓鬼耶麻解笑人。

和馬承之古廟

廟貌空山裏。垣頽入徑斜。尙應名竹素。不復祭牲緘。木暗鴉呼鬼。庭荒雀啣蛇。有靈從寂寞。慎勿學凶邪。
和解生中秋月

不爲人間意。居然節物清。銀塘通夜白。金餅隔林明。醉客樽前倒。棲鳥露下驚。悲歡古今事。寂寂墮荒城。

宿太平宮

獨遊輞川

行穿翠靄中。絕磻落疎鐘。數里踏亂石。一川環碧峯。暗林麋養角。當路虎留蹤。隱逸何曾見。孤吟對古松。

過下馬陵

下馬陵頭草色春。我來懷古一霑巾。陵邊又有纍纍冢。應是當年取酒人。

覽含元殿基因想昔時朝會之盛且感其興廢之故

在昔朝元日。千門動地來。方隅正無事。輔相復多才。仗下簪纓肅。天中繖扇開。皇威瞻斗極。曙色辨崔嵬。赤案波光卷。鳴梢電尾回。熊羆驅禁衛。雨露覆蘭臺。橫賜傾中帑。窮奢役九垓。只知營國用。不畏屈民財。翠輦還移幸。旻天未悔災。羣心尊困獸。回首變寒灰。曾以安無慮。翻令世所哀。行人看碧瓦。獨鳥下蒼苔。雖念陵爲谷。遙知禍有胎。青編遺迹在。此地亦悠哉。

望秦陵

雄心雖蓋世。竟亦棄羣臣。役重傾天下。時危啓聖人。石麟空舉首。銀海罷流春。隴闕今無復。應深行路塵。

留題樊川李長官莊

杜曲東邊風物幽。我來繫馬獨淹留。門前翠影山無數。竹下寒聲水亂流。酒壓新陳常得醉。花開番次不知秋。主公堆案縈官事。早晚歸來今白頭。

宿終南山下百塔院

驅馬山前訪古蹤。僧居瀟灑隔塵籠。遶庭石甕谷間水。入戶鳴鳩堆上風。無限老松秋色裏。數聲疎鐸月明中。村雞坐聽三號徹。去去前朝氣味同。

宿華嚴寺與友生會話

危構嵒嶢出大虛。坐看斜日墮平蕪。白煙覆地澄江闊。皎月當天尺壁孤。疎磬悲吟來竹閣。青燈寂寞照吟軀。老僧怪我何爲者。說盡興亡涕淚俱。

送王揚庭著作宰巫山

蘭臺舊漫郎。爲邑上瞿塘。地僻風煙古。公餘日景長。江聲通白帝。山勢入青羌。落筆多佳句。時應滿錦囊。

晚意

晚色微茫至。前山次第昏。羸牛歸逕遠。宿鳥傍簷翻。盤喜黃粱熟。盃餘白酒渾。田家雖淡薄。猶得離塵喧。

春暮初晴自御宿川之華嚴寺

春莫曾無屬物心。野行聊得據鞍吟。路經廢苑情通古。水遶蒼山意共深。殘日花間浮暖豔。斷雲樓外卷輕陰。騷人自昔傷鷓鴣。休苦風前送好音。

次韻和師黯寄王耿端公

嫉惡曾收柱後冠。淹淪今未復榮班。青雲失路初心遠。白雪盈簪壯志閑。廐馬尙嘶驄奮迅。篋衣猶曝繡闌斑。風流縣尹多才思。時寄篇章與解顏。

聞京尹范希文謫鄱陽尹十二師魯以黨人貶郢中歐陽九永叔移書責諫官不論救而謫夷陵令因成此詩以寄且寬其遠邁也

朝野蔚多士。衰然良可羞。伊人秉直節。許國有深謀。大議搖巖石。危言犯采旒。蒼黃出京府。憔悴謫南州。引黨俄嗟尹。移書遽竄歐。安慙言得罪。要避曲如鉤。郢路幾束馬。荆川還泝舟。傷心衆山集。舉目大江流。遠動家公念。師魯父作牧於東川。深貽壽母憂。永叔有母垂老。橫身罹禍難。當路積仇讎。衛上寧無術。亢宗非所優。吾君思正士。莫賦畔牢愁。

暑景

溽暑倦幽齋。縱橫書亂堆。風多應秀麥。雨密不黃梅。乳燕並頭語。紅葵相背開。吟餘晴月上。涼思入樽罍。

夏中

院僻簾深晝景虛。經風時見動竿烏。池中綠滿魚留子。庭下陰多燕引雛。雨後看兒爭墜果。天晴因客曝殘書。幽棲未免牽塵事。身世相忘在酒壺。

夏意

別院深深夏簟清。石榴開遍透簾明。樹陰滿地日當午。夢覺流鶯時一聲。

和淮上遇便風

浩蕩清淮天共流。長風萬里送歸舟。應愁晚泊喧卑地。吹入滄溟始自由。

先公之愛馬以病寄他廐今死矣

先君所乘馬。其色白於銀。磊落龍之種。權奇世共珍。獨嘶如想望。久步見精神。方日照代夜。拳毛刷渭津。
先公在河東陝右。皆乘此馬。鬣寒如擁浪。蹄蹶不驚塵。潦倒已伏櫪。蒼黃仍借人。俄傳弊帷信。無復錦蒙親。倚棹思神駿。蕭然淚灑巾。

重過句章郡

曾隨使旆此東歸。日日登臨到落暉。疇昔侍行猶總角。如今重過合霑衣。窺魚翠碧忘形坐。趁伴蜻蜓照影飛。風物依然皆自得。歲華飄忽賞心違。

晚出潤州東門

京口古雄處。昔年嘗此過。風流看石獸。人事共江波。河轉路疑盡。日斜山更多。城樓鬱天半。回首恣吟哦。

無錫惠山寺

寺古名傳唐相詩。三伏奔迸予何之。雲山相照翠會合。殿閣對走涼參差。清泉絕無一塵染。長松自是拔俗姿。二邊羌胡日鬪格。釋子宴坐殊不知。

過蘇州

東出盤門刮眼明。蕭蕭疎雨更陰晴。綠楊白鷺俱自得。近水遠山皆有情。萬物盛衰天意在。一身羈苦俗人輕。無情好景無緣住。旅棹區區暮亦行。

秀州通越門外八九里臨水多佳木茂樹以使風不得停舟一賞愴然爲詩

密樹重蘿覆水光。珍禽無數語琅琅。驚帆瞥過如飛鳥。回首風煙空斷腸。

秀州城外九里有竹樹小橋予十八年前與友人解晦叔飲別於此今過之景物依然然而解生

已亡悲歎不足復成小詩

當年共醉此橋邊。道舊狂歌至暮天。得句旋題新竹上。移舟還傍亂花前。君埋塵土骨應化。我逐風波心欲燃。落日長號感人事。沙頭寂寞上漁船。

天章道中

畫鷁低飛湖水平。高低樓閣滿稽城。人遊鑑裏山相照。魚戲空中日共明。盡是荷風香不斷。忽逢溪雨氣尤清。藍輦卻上蘭亭步。猿鳥雲蘿伴此行。

望太湖

杳杳波濤閱古今。四無邊際莫知深。潤通曉月爲清露。氣入霜天作暝陰。笠澤鱸肥人膾玉。洞庭柑熟客分金。風煙觸目相招引。聊爲停橈一楚吟。

太禹寺

鑑湖盡處衆峯前。寺古蕭疎水石間。殿閣北垂連禹廟。松筠東去入稽山。坐中巖鳥自上下。吟久溪雲時往還。我厭區區走名宦。未能來此一生閒。

杭州巽亭

公自登臨闢草萊。赫然危構壓崔嵬。涼翻簾幌潮聲過。清入琴樽雨氣來。疇昔江山何處好。生平懷抱此中開。東南地本多幽勝。此向東南特壯哉。

松江長橋未明觀魚

曙光東向欲朧明。漁艇縱橫映遠汀。濤面白煙昏落月。嶺頭殘燒混疎星。鳴榔莫觸蛟龍睡。舉網時聞魚

鼈腥。我實宦遊無况者。擬來隨爾帶茶簪。

淮中晚泊犢頭

春陰垂野草青青。時有幽花一樹明。晚泊孤舟古祠下。滿川風雨看潮生。

湘公院冬夕有懷

去年急雪灑窗夜。獨對殘燈觀陣圖。今夕悲風撼軒竹。又來開卷擁寒爐。禪房瀟灑皆依舊。世路崎嶇有萬殊。

離京後作

春風奈別何。一棹逐驚波。去國丹心折。流年白髮多。脫身離網罟。含笑入煙蘿。窮達皆常事。難忘對酒歌。

答和叔春日舟行

幽人漂泊興無窮。弄水尋花處處同。春入水光成嫩碧。日勻花色變鮮紅。靜中物象知誰見。閒極情懷覺道充。寄語悠悠莫疑我。五湖今作狎鷗翁。

舟行有感

忽忽賞節物。區區何所歸。天陰鳥自語。水落岸生衣。客况知誰念。人生與願違。東風百花發。獨采北山薇。

淮亭小飲

山氣復清淮。亭臨亂石開。旅愁無處避。春色爲誰來。酒賴啼鶯送。歌隨去雁哀。相攜聊一醉。休使壯心摧。
壽陽閒望有感

維舟亭下偶登臨。下蔡風流古至今。遠嶺抱淮隨曲折。亂雲行野乍晴陰。幽人憔悴搔白首。啼鳥哀鳴思故林。觸處塗窮何足慟。直回天地入悲吟。

阻風野步有感呈子履

輕舟留滯已春殘。攜手悽悽田野間。盡日東風吹百草。有時雙鷺下前灣。古來少見如君困。世上應無似我閑。斗擲塵襟莫回首。謗書終不到溪山。

過泗水

五年六經此。仰首歎勞生。山是往時色。人皆今日情。機心去國少。塵眼向淮明。物理吾俱曉。漂流安足驚。
和丹陽公素學士晚望見懷

古郡登臨足勝遊。使君才調更風流。過雲送雨海山暗。斜日催蟬江樹秋。屢辱嘉招嗟放棄。又傳新詠慰淹留。霜天乘興當西謁。共醉城尖四望樓。

送子履

一舸風前五兩飛。南遷今去別慈闈。人生多難古如此。吾道能全世所稀。幸有江山聊助思。莫隨魚鳥便

忘歸。君親恩大須營報。學取三春寸草微。

題花山寺壁

寺裏山因花得名。繁英不見草縱橫。栽培剪伐須勤力。花易凋零草易生。

春睡

別院簾昏掩竹扉。朝醒未解接春暉。身如蟬蛻一榻上。夢似楊花千里飛。嗒爾暫能離世網。陶然直欲見天機。此中有德堪爲頌。絕勝人間較是非。

覽照

鐵面蒼髯自有稜。世間兒女見須驚。心曾許國終平虜。命未逢時合退耕。不稱好文親翰墨。自嗟多病足風情。一生肝膽如星斗。嗟爾頑銅豈見明。

秋懷

年華冉冉催人老。風物蕭蕭又變秋。家在鳳凰城闕下。江山何事苦相留。

中秋松江新橋對月和柳令之作

月晃長江上下同。畫橋橫絕冷光中。雲頭豔豔開金餅。水面沉沉臥綵虹。佛氏解爲銀色界。仙家多住玉華宮。地雄景勝言不盡。但欲追隨乘曉風。

病中得杜丞相見寄詩感而有作

易毀唯遷客。難諳是俗情。愁多怯秋夜。病久厭人生。委順聞之舊。衰羸見者驚。新詩如接待。吟罷涕淋纓。

滄浪懷貫之

滄浪獨步亦無惊。聊上危臺四望中。秋色入林紅黯淡。日光穿竹翠玲瓏。酒徒漂落風前燕。詩社凋零霜後桐。君又暫來還徑去。醉吟誰復伴衰翁。

和彥猷晚宴明月樓二篇次韻

溪聲來從一氣外。樓角插在蒼霞中。豔歌橫飛送落日。哀箏自響吹霜風。低昂黛色四山黯。凌亂纈紋疎樹紅。憑欄揮手問世俗。何人得到蟾蜍宮。

落晚天邊燕席開。溪山相照絕纖埃。綠楊有意簷前舞。涼月多情海上來。香穗綵斜凝畫棟。酒鱗環合起金壘。自疑身是乘槎客。泛徹銀河卻欲回。

依韻和王景章見寄

歲律崢嶸臘候深。一天風雪卷愁陰。故人默默懷交意。逐客悽悽上國心。千里相望空眇盼。當年下吏阻追尋。咄嗟謗口聞高誼。披豁羈懷見雅吟。學道元將禦窮困。浮生何必計升沈。世間機穽知難避。往者圖書可自箴。猶得雲山開醉眼。可無俗物撓冲襟。鵬來閒暇何須怪。鬼見邪歛豈易禁。楚客留情著香草。啓

期傳意入鳴琴。夫君自上丹霄去。莫忘雲泉寄好音。

答仲儀見寄

前歲京都吏議喧。勁弓摧翮雨連翩。男兒窮困終歸道。世路傾危自有天。雲壑已通塵外意。茅齋仍得日高眠。寄聲吾舅無相念。今作江湖九館仙。

雨中聞鶯

嬌駭人家小女兒。半啼半語隔花枝。黃昏雨密東風急。向此漂零欲泥誰。

秋雨

陰風攪林壑。驟雨到江湖。白日不覺沒。繁雲何處無。樓吟涼筆硯。溪夢亂菰蒲。聞說京華甚。污泥入敝廬。

懷月來求聽琴詩因作六韻

正聲今遁矣。古道此焉存。商緩知臣僭。風熏見帝尊。雄豪尙餘勇。淡泊忽忘言。繁極殊無間。來長若有源。已能通變化。直可探胚渾。此理師應得。西風獨掩門。

送黃通

浪遊天下訪知音。健節亭亭恥陸沉。當拜日官隨鶴版。此時孤宦入蛇林。羈愁雖得著書樂。風物能傷遷客心。願我冥頑如瓦石。爲君分袂亦悲吟。

秋宿虎丘寺數夕執中以詩見贖因次元韻

生事飄然付一舟。吳山蕭寺且淹留。白雲已有終身約。醪酒聊驅萬古愁。峽束蒼淵深貯月。巖排紅樹巧裝秋。裴回欲出向城市。引領煙蘿還自羞。

夢歸

兩隔疎鐘曉不知。春風吹夢過江西。雨聲破夢北窗響。臥憶江西路亦迷。

獨步遊滄浪亭

花枝低欹草色齊。不可騎入步是宜。時時攜酒祇獨往。醉倒唯有春風知。

初晴遊滄浪亭

夜雨連明春水生。嬌雲濃暖弄微晴。簾虛日薄花竹靜。時有乳鳩相對鳴。

遊招隱道中

揚鞭望招隱。塵思漠然收。雲接青林合。泉兼碧草流。疎鐘傳別壑。晚日動前樓。嘉遁平生志。吁嗟得暫遊。

揚州城南延賓亭

亂蟬咽咽柳霏霏。獨上危亭俯落暉。江外山從林下見。城中人向渡頭歸。風煙遠近思高遁。豺虎縱橫難息機。出處兩乖空自撓。傷哉吾道欲何依。

晚泊龜山

南灣晚泊一裴回。小徑山間佛寺開。石勢向人森劍戟。灘光和月瀉瓊瑰。每傷道路銷時序。但屈心情入酒盃。夜籟不喧羣動息。長吟聊以寄餘哀。

滄浪靜吟

獨遶虛亭步石缸。靜中情味世無雙。山蟬帶響穿疎戶。野蔓盤青入破窗。二子逢時猶死餓。三閩遭逐便沉江。我今飽食高眠外。唯恨澄醪不滿缸。

丹陽子高得逸少瘞鶴銘於焦山之下。及梁唐諸賢四石刻。共作一亭。以寶墨名之。集賢伯鎮爲之作記。遠來求詩。因作長句以寄。

山陰不是換鵝經。京口今存瘞鶴銘。瀟灑集仙來作記。風流太守爲開亭。兩篇玉蕊塵初滌。四體銀鈎薛尚青。我久臨池無所得。願觀遺法快沉冥。

遊雪上何山

今古何山是勝遊。亂峯縈轉繞滄州。雲含老樹明還滅。石礙飛泉咽復流。偏嶺煙霞迷俗客。一溪風雨送歸舟。自嗟塵土先衰老。底事孤僧亦白頭。

冬日偶書

謾走聲名三十年。亦曾文采動君前。玉顏皓齒他人樂。獨守殘燈理斷編。

寒夜十六韻答子履見寄

風雨夜寒新。空齋感慨頻。詩書窮不放。燈火靜相親。眺聽時懷士。低摧動畏人。魏文詩云。客漫書成咄。子常畏人。咄。遠吠厭猜猜。念昔罹憂患。惟君共苦辛。漂流數千里。會合十餘旬。各閱傷弓翼。聊同煦沫鱗。誰知公治罪。衆笑伯龍貧。隔絕今一水。睽離將再春。嘉篇數爲賦。尺牘亦相珍。倚伏時難定。屯亨理亦循。劍埋猶有氣。螻屈尙能伸。邦國方登俊。江湖且放神。不憂知在命。任重莫如身。白首襟期遠。青雲志業均。陶然任元化。慎勿損天真。

獨遊曹氏園因寄伯玉

去年把酒共裴回。今日尋幽獨此來。竹密似嫌閒客入。梅含應待主人開。贊謀盛府方投刃。捍患長隄正展才。早晚得歸如舊約。伴君池上倒樽罍。

小酌

寒雀喧喧滿竹枝。驚風浙瀝玉花飛。霜柑糖蟹新醅美。醉覺人生萬事非。

送人還吳江道中作

江雲春重雨垂垂。索寞情懷送客歸。不憤東流促行棹。羨他雙燕逆風飛。

題廣喜法師堂

我爲名驅苦俗塵。師知法喜自怡神。未如歡戚兩忘者。始是人間出世人。

詩僧則暉求詩

全吳氣象豪。詩思合翹翹。風雅久零落。江山應寂寥。會將趨古澹。先可去浮囂。好約長吟處。霜天看怒潮。

關都官孤山四照閣

勢壓蒼崖險可驚。攀雲半日到軒楹。旁觀竹樹回環翠。下視湖山表裏清。漸覺愁隨煙靄散。只疑身有羽翰生。他年君掛朱幡後。蠟屐筇枝伴此行。

清軒

誰鑿幽軒刮眼清。湖中嘉處更禪扃。龍聽夜講寒生席。鷗伴晨齋暖戲庭。水月澄明應作觀。雲山濃淡自開屏。我公亦爲留奇句。此地人間合有靈。

某爲世所棄。困居於蘇。平生交遊。過門不顧。長安侍讀葉丈。不以秦吳之遠。高下之隔。閱此窮悴。特貺以詩。然韻險句奇。不可攀續。仰酬高誼。強扶蕪音。

公鎮西都擁劇權。遠嗟窮苦寄新篇。氣雄迴出關河外。句險空驚魚鳥前。玉帳夜嚴兵似水。茅齋春靜草如煙。才愚榮悴皆殊絕。自笑相酬更斐然。

暑中閒詠

嘉果浮沉酒半醺。牀頭書冊亂紛紛。北軒涼吹開疎竹。臥看青天行白雲。

寄題趙叔平嘉樹亭

嘉樹名亭古意同。拂簷圍砌共青葱。午陰閑淡茶煙外。曉韻蕭疎睡雨中。開戶常時對君子。透軒終日是清風。盤根得地年年盛。豈學春林一餉紅。

西軒垂釣偶作

曾以文章上石渠。忽因讒口出儲胥。致君事業堆胸臆。卻伴溪童學釣魚。

夜聞笙酒有聲因而成詠

糟牀新壓響泠泠。欹枕初聞睡自輕。幾段愁悰俱滴破。一番歡意已籌成。空階夜雨徒傳句。三峽流泉無此聲。只待松軒看飛雪。呼賓同引甕頭清。

秋夕懷南中故人

向夕依欄念昔遊。蕭條節物更他州。池光不動天深碧。月色無情人獨愁。千里江山幽信絕。一場風露敗荷秋。征鴻急急知何事。斷續哀鳴過不休。